


KUFA MULATU

 Ni itumezi, Muzwale Neville. Halu yemeñi ona cwalo fa nako nyana cwale kwa tapelo. Halu inamiseñi litho za luna. Kana kuna ni kupo ye bulezwi, haiba ika zibahala ka lizoho le li nanuhile, ku Mulimu fela, kuli, “Ni—Ni. . .”? Buluka mwa munahano wa hao cwale so—so bata ku Mu kupa, ni ku si lumela ka pilu ya hao kaufela, ha Ni nze ni mi lapelela kwateni, nina.

² Ndate yakwa Lihalimu, lu . . . talima ye kuba lithohonolo leli cwalo, la kutaha kwa ndu ya Mulena, ka lizazi le li sabisa le, ni—ni kufumana Liseli la Mwana la Mulimu li benya, ni ku utwa Moya o Kenile u opela mwahala sicaba, ni ka kubulela ka sicaba, fela se—se si monyeha ka liseli la Mwana. Lwa itumela ku Wena ka se, liseli la Mwan’a Lihalimu le li benya mwa lipilu za luna. Mo lu itumela ku Wena ka zona! Cwale ki . . .

³ Sicaba sa hao si nanuzi fela mazoho a sona mwa kopano yee, kuli bana ni likupo, ze ba lakaza kuli Wena u ba alabe kakusasana cwana. Mi Na lapela, Ndate, kuli U alabe yeñwi ni yeñwi ya likupo za bona. Kuna ni zeñata hahulu, ze beilwe fa sipula, ni likupo zeñata hahulu kai ni kai, sicaba sa kula, sa nyanda; lipizo za luwaile, misipili yemitelele, mwendi ki ze mashumi aketalizoho ka zazi. O Mulimu, lu ka eza sikamañi? Lu zamaise fela, Mulena. Halu—halu zibi nzila ya kuya ka yona kamba sa kueza, kono Wena wa kona ku zamaisa lika ze, mi lu lapela kuli U lu fe zona. Kakuli, ki—ki takazo ya luna, Mulena, mufuta wa bupilo bo lunani mwa lifasi bu filwe ku luna ka Wena, mi lu bata kuitusisa bona kuli lu kuteke Wena ka bona. Cwale U lu zamaise mwa lika zeo, Ndate.

⁴ Lu fuyole kacenu halunze lu kopani hamoho ku to teezeza Linzwi la Mulena, ku to opela lipina, ku to lapela. Utwa litapelo za luna. Taba ni luna mwa lipina za luna, mi bulela ku luna ka Linzwi, kakuli lu likupa ka Libizo la Jesu. Amen.

Mwakona kuina.

⁵ Hani zibi fela sibaka kaufela ko Ni kona kuba ni lithohonolo lelituna mwa kuba, kufita mo ku kona kubela ka kuyema mwa—fa katala, ka ku komauna Sinkwa sa Bupilo kwa sicaba se si libelezi, se si lapile, se si nyolezwi. Mi ye ki lithohonolo lelituna.

⁶ Pili, Ni tabela kubuza haiba—haiba kuna ni yomukana wa lubasi lwa ba ha Wright, Hattie kamba Orville, kamba ufi kaufela? Hattie. Kana Orville utile ni wena, Hattie? Kihande, u mu buze haiba u ka taha kwa ndu, ona fa, ka se ne Ni mu bulelezi, wa ziba. Atahe kwa ndu, haiba a kona. Ni libezi kutaha ni yona, kakusasana cwana, sesiñwi sa kanja ka bona ko banani kwani. Kacwani Ni—Ni fela . . . Haiba uka kona, utahe fela ni mota ha uya kwandu kuli—kuli utoba ni- . . . kasamulaho wa sebelezo.

7 Mi cwale, Edith, kezela Hattie, yo lu ziba kuba sihole kuzwelela kwa bumbututu bwa—bwa hae. Mi yena seli musali cwale, mi u mwa buino bo bumaswe hahulu. Cwale Na, seli mwaha o felile, Ne ni ile kwani hana taselizwe maswe nako ya pili, mi kapili Na to lemuha butata bwa haem ka tuso ni muhau wa Mulimu. Cwale, luli, ki butata mañi bobuli ni mwana . . .

8 Wa ina, mahutu a hae angungahani hamoho, mi mane hakoni neba ku a kauhanya, ki bakeñisa kupyateha hahulu kokuli fa—fa musinga omutuna otaha kwa toho. Kono, seo sili sona, hakuna se si fosahalile ka mubili wa mwana, kwanda kukula luñañali lwa limbututu ha na kuma fa likweli ze silezi zakupepwa. A huwa ni kulila bupilo bwa hae kaufela, mane, kufitela . . . Ne lu mu lapelezi myaha yemiñata kwa mulaho, mi—mi ubile ya tabile kuzwelela ona fani, kufitela mwendi silimo se si felile fa.

9 Mi cwale seli kuyema kwa lupepo. Ka manzwi amañwi, cincheo ya bupilo bwa hae, mi misinga ya hae i mwa buino bo bu ipitezi luli. Mi kalibe yomunyinyani yani u keni mwa munahano wa kuli wa shwa, ha—ha na kupila fela, kuzwa fela ka hola iliñwi kuya ku yeñwi. Mi mwa ziba. Mi mbali ba baiketile, basali ba bana ni mata bana ni matata, fokuñwi una ni kutabiwa lindonga za muinelo wa mubili, ni—ni kuya mwa libaka za lipulumuki, ni kunga kufiwa lindonga za likalafo ni lika kaufela, ka nako yana.

Mutu una ni lincicheho zepeli za bupilo.

10 Bana ni cincheo kuzwa ku mushimani kutaha ku—ku muuna; kuzwa ku musali . . . kuzwa ku musizana kutaha ku musali. Ka lilimo ze sikisitini, ze sebtentini za kupepwa, baba inge likwata ze ifufela fela busihu. Mi—mi haiba mukona fela kuitiisa ni bona ka siyemo sani. Ni na ni mwana musizana fa siyemo seo cwale, Rebekah. Mu mu lapelele kwateni. Ni Billy, oh, mañi ni mañi wa luna, lu fitile mwa lilimo za kupateha zani. Mi—mi kacwalo lu lukela kuitiisa ni bona, ka kulemuha kuli ki nto yeñwi kuli—kuli bana—bana ni kufita ku yona.

11 Mi cwale, Edith, ni cincheo ya—ya mwa—ya myaha ye sebene. Myaha ye sebene kaufela, bupilo bwa hao bwa cinca. Kacwalo sebene ha i alulwa ka sebene, mwa bona, mi—mi iba tata nyana, mi yani ki cincheo yetezi. Mi ya—ya kataza basali. Baana kamita babanga ni mukwa wa mutakafululele ka ona ka nako yani, mi fokuñwi ba siya basali ba bona. Kono basali bona—bona ba yemanga lupepo kuzwa fani. Mi kaufela lu fita mwa lika zeo, mi luna ni kuziba kuli ki lika ze luna ni ku utwelana butuku, ni ku utwisisa lika zeo.

12 Mi Edith yomunyinyani ukeni mwa buino bo, mi ke la ota maswe, mane u bonahala bumaswe. Mi—mi—mi Na mi bulelela, busihu bobuñwi, isiñi kaufela mina hamoho, kono kambe ki musipili nyana kuya kwani . . . Ku yo ina ni yena, zazi li liliñwi ni busihu. Mi ni—ni musipili nyana kuzwa kwa tabernakele ye ni—ni litabernakele ze shutana, li—li litabernakele ze lutusana ni

zona kwanu, mina babañwi sicaba mu yange ku yo potela lubasi lwa ba ha Wright. Na sepa ne ba ka itumela ka zona. Mwa ya fela kwateni, mu yo ina ni bona fa nako nyana, ni ku ambola ni bona, mwa swalana mwa mazoho, mi inge fela mutu ya potela mulikana hae.

¹³ Lu—lu libalanga zeo kapili, mwa ziba. Mi ha li ezahalela kwa lapa laluna, lwa itumelanga. Mi lu swanela kuhupula, babañwi ba itumelanga, ni bona. Mi ni lubasi lwa bo Wright, Na sepa, ba ka itumela ka seo. Ni—Ni ziba kuli ne mu ka eza cwalo kambe mwa ziba kuli kuna ni buino bo bu cwalo. Kono ne mu sa zibi cwalo, kacwalo he—kabakaleo Na mi bulelela kakusasana cwana, ka zona.

¹⁴ Amu yo potela lubasi lwa bo Wright, mi mulike ku yo katulusa Edith. Cwale, musike mwa mu bulelela kuli u bonahala bumaswe. Mu mu bulelele kuli u “bonahala hande,” uka “ba hande.” Kakuil, mane u kaba fela hande haiba lu swalelela fela ku mutiisa cwalo. Zeo kona ze lubezi mo. Ki kezela luna, mi—mi luteni mo ku swalelela mwana yani. Inge fela mo Ni batela kuli mutu ani swale mi alapele ha Ni sweli kufita mwa miliko yaka, mi ni wena u bata mutu mwa matata a hao.

¹⁵ Mi—mi lubasi lwa ba ha Wright lubile fela—kale hahulu . . . ki loluñwi lwa mabasi a kale hahulu atahanga kwa kopano ye. Bona, Na sepa, ni Muzwale Roy Slaughter ni Kezeli Slaughter. Ne ni ba boni fa nako nyana yefitile, na ba kobeta hane ba kena mwahali. Na hupula, na kasibili, ha Ni taha ni mota mwa lilulu, “Ki lilimo zekai ze Ni boni Muzwale ni Kezeli Slaughter ha ba ina mwa libaka zabona mwa keleke mo, mwa matata ni masulungundu, kono niteñi ba sa zwelapili?” Mi ni lubasi lwa Wright, mi sina cwalo, mwa itumela kwa sicaba sani, mwa bona. Mi halu—halu boniseñi buitumelo bwa luna ku bona.

¹⁶ Cwale, kacenu, Ni na ni Liñusa le litelele. Li ambola fa kufa mulatu.

¹⁷ Mi—mi cwale, busihu bo, Ni utwa kuli kuna ni mulalelo ni kutapa kwa mautu, ni zeñwi cwalo. Kacwalo mulisana uka bulela, mi lukaba ni . . . lu ka taha lu ka tuluka. Mi haiba mu—haiba mu teñi, mutahe mi luikole li—li liñusa ku mulisana, lelizwa ku Mulena, mi cwale hape kuzwa kwa kutapa ni za—ni za mulalelo, busihu boo. Ina ni kuba—kuba busihu bo butezi luli bo bu patehile, kacwalo lu ka tabela kuba ni mina, haiba hamuna sibaka kwa kuya.

¹⁸ Mi lubata kuitumela ku Don Ruddell, ni—ni muzwale wa luna, ni Muzwale Jackson. Mi—mi mizwale ba ki mizwale ba luna, likeleke ze lu swalisana ni zona. Muzwale Jack Palmer fa, ya buluka si—si sikwata mwa Georgia. Mi lu—lu—lu bata kuitumela ku muuna yo ka lipilu za luna kaufela. Ka, linako ze luna ni lisebelezo, ha Ni kena, mi ba—ba tahanga ku to lu potela, mi lwa itumela ka zona.

¹⁹ Na bona, kakusasana cwana, mulikana ka yomunde, Dokota Lee Vayle ni musala hae. Ne ni bona Kezeli Vayle fani, pili, mi Ne ni sweli kotalima kafa ni kafa kubona ko ku inzi Muzwale Lee. Mi Ni na ni, mubulelelo wa kale wa kwa Mboela wa kuli, “za ku njomana ni yena,” mwabona, Ni sa mu fumana fela. Ne ni mu libelezi zazi ni zazi, kwa mukopano wani, kuli abe kwani ani tuse. Se nili, “Kihande, haiba Lee wa taha, uka to kutaza, mi Na ni ka lapelela fela bakuli.” Mi lwa mu kobeta, ni lika zeñwi kaufela, mi ne lu si ka mu fumana. Kacwalo, Ni—Ni nani, Ni na ni zona, za ku njomana ni yena, Ni sa mu fumana fela. Mi lu tabile ka kuba ni Muzwale ni Kezeli Vayle mwahali mo, kakusasana cwana.

²⁰ Mi mwendi kuna ni babañata mo bo lu sa utwisisi. Ni bona kezeli fa, Na lumela, yazwa kwa Chicago. Hani koni . . . Na ziba sikwata kwanu, kono ha Ni koni fela kubiza mabizo a bona hande. Kacwalo lwa—lwa itumela ku bona kuzwa kai ni kai, kaufela ko muinzi.

²¹ Ni bona mizwale mo, micaha bababeli baba nyinyani baba lukela ku beiwa fa bueteleli (banana mwa bulumiwa, cwalo) kakusasana cwana. Bababeli, mizwale yaluna ba bansu ba bazwa kwa New York, ba amuhezi fela mapampili a bona mwahala keleke ya Philadelphia, ni kufiwa keleke ye sina ko ba zwelela. Mi lu ka ba beya mazoho, kuli Mulimu a fuyole bulumiwa bwa bona mwa New York. Luna ni likeleke zepeli kamba zetalu fahalimu fani, Na lumela. Muzwale Milano una ni sikwata nyana kulo kwani, mi luna . . . lwa itumela kubona. Mi—mi kuna ni bababeli baba ka ya cwale ku yo eza, kuba ni lisebelezo za sicaba kwani. Mi lwa—lwa itumela ka lika zee.

²² Mulena ami fuyole ka kutala. Babañata hahulu; Ni talima kafa ni kafa ni kubona baba shutana, mi hamukoni fela kubiza mabizo a bona kaufela, kono Ni ziba kuli yena Wa utwisisa.

²³ Cwale, Na lumela, haiba kezela luna, mulizi wa piano, kamba alimuñwi wa bona uka taha kwanu ku to lu lizeza.

Cwale lishala la Mulilo ha li to swala
mupolofita,

Ku mu kenisa ka mwa swanela kubela ya
kenile,

Mi cwale Linzwi la . . . Linzwi la Mulimu lali,
“Ki mañi ya ka lu yela?”

Mi ki ha alaba ali, “Kina yo, u lume Na.”

²⁴ Mi, lu beya balumiwa mwa musebezi ka ku ba beya mazoho. Cwale, lu lemuha kuli nzila ya Mañolo ya ku keta mukutazi ka yona ki kubeya mazoho. Ni sepa kuli kwani kona koo mizwale ba luna ba Pula yamwa Mulaho, kamba sicaba sa Ndwatuna, ni zeñwi cwalo, ba lyangani; mi ha ba bona cwalo, kubeya mazoho, kuli ba beye limpo za moya. Cwale, ha lu lumeli kuli limpo

litaha ka kubeya mazoho. Lu lumela kuli . . . kubeya mazoho ki tumelelano ku se luboni kale. Mwabona? Ki, “Amen.” Mwabona?

²⁵ Cwale, hane ba beile mazoho ku Timotea, ni fahalimwa mizwale bani, ne ba lemuhile mwahala baana bani kuli ne kuna ni mpo. Muhupule, “U nyunga mpo ye li ku wena, ye zwa ku bo kuku hao ba basali Lois.” Mi ba bona se ku Timotea, mi kabakaleo ba bahu lu ba mu beya mazoho ni ku mu beya mwa bulumiwa. Isiñi kubeya mazoho ku mutu ya si ka boniswa kale sika, mwa bona. Mi ba kupa fela limbuyoti. Mi kaufela lu lumela cwalo. Kacwalo ha lu cali limpo za moya mwa batu; lu li lemuhla feela, ni kuba beya mazoho, ku ba lumeleza mwa musebezi, bao lu lumela kuli Mulimu u ezize lika ze cwalo kwa sicaba.

²⁶ Ni lemuhile, kakusasana cwana, kwa mulaho kwani, Muzwale McKinney ya zwa . . . Ni lumela kuli ki Kinney kamba McKinney, mubuleli wa Methodist yainzi kwa mulaho kwani, ya sa zo beiwa fela fa bueteleli mo, niyena, Ni lumela kuli yani ki yona, fa katala; kuli aine mwa Ohio, ni Muzwale Dauch ni Kezeli Dauch, ni sikwata se si zwa kwa Ohio.

²⁷ Oh, kaufela luna ha lu kopana hamoho, libaka zenyinyani ze taha hamoho, ki zende. Hakuna kopano; hakuna swalisano mwa sika kaufela, kono konji fela ku Jesu Kreste, ku felile, mwabona, fela “luinzi hamoho mwa libaka za Mahalimu.”

²⁸ Ku lukile, kezeli, haiba uka lufa . . . Ha lu opeleñi fela timana iliñwi ya yona, “Fani lishala la Mulilo ha li to swala mupolofita.” Halu iopeleñi hamoho cwale.

Cwale lishala la Mulilo ha li to swala
mupolofita,

Ku mu kenisa ka mwa kona kubela ya kenile,
Mi Linzwi la Mulimu lali, “Ki mañi ya ka lu
yela?”

Mi ki ha alaba ali, “Kina yo, u lume Na.”

Bulela, Mulena ka, bulela, Mulena ka,

Cwale mizwale ba ka taha, haiba mwa lata.

. . . mi Ni ka akufa ku alaba . . .

²⁹ Mutuhele mizwale yemiñwi ya bakutazi ba tahe, haiba ba kona, ba ba ka beya mazoho fa bona.

. . . Mulena ka . . .

Balikani ba tabernakele kwanu, Muzwale Ruddell, Muzwale Lamb, ni bona. Ona *kwanu*, haiba mu lata.

. . . mi Ni ka alaba kuli, “Mulena, ni lume.”

(Ka bunya cwale, shangwe.)

Oh, ma milioni cwale ba shwela mwa sibi ni
maswabi,

Muteeleze kwa sililo sa bona se si tomolisa pilu;
Amu akufe, mizwale, muakufele ku ba pulusa;
Alaba kapili uli, “Mulena, ki Na yo.”

Bulela, Mulena ka, bulela, Mulena ka,
Bulela, mi Ni ka akufa ku Ku alaba;
Bulela, Mulena ka, bulela, Mulena ka,
Bulela, mi Ni ka alaba, “Mulena, uni lume.”

³⁰ Ki wena mañi libizo, muzwale? [Muzwale uli, “Orlando Hunt.”—Mu.] Muzwale Orlando Hunt, yazwa kwa New York City. Kana ku cwalo? Mi Muzwale. . . [Muzwale yomuñwi uli, “Joseph Coleman.”] Joseph Coleman.

Cwale haiba mu ka sikuluhela fela kwa sicaba, mizwale baka.

³¹ Muzwale Hunt ni Muzwale Coleman, pizo ya Mulimu i mwa lipilu za bona. Mi sina ha lu sa opela fela pina yakuli, “Kuna ni ma milioni cwale mwa sibi, mi ba shwela mwa maswabi.” Ba utwile sililo se si tomolisa pilu sani. Mi lwa ba kupa: akufa, mizwale, amu akufele puluso ya bona! Mwabona, kapili u alabe uli, “Muluti, ki Na yo.” Kona mo ba alabela, kakusasana cwana.

³² Mi sina luna, kakuba mizwale ba keleke ye, ni sikwata se, kubeya se, ka kubeya mazoho fahalimwa bona ni ku ba fa tumelelo ya bulikani, ka kuba lipaki za Jesu Kreste, ka tuso ya luna mo, kuli lu ba tuse mwa lika kaufela ze kutekeha ni kuluka, mwa Evangeli. Litapelo za luna likana li ba ka tundamo kwa baana baa, kuli Mulimu aitusise bona kuli ba Mu kuteke. Mi cwale bulumiwa bwa bona bu hule ka butuna mwa New York. Mi cwale bupilo bwa bona—bona bu be sebelezlo yetezi ku Yena, banze ba tisa mañata mwa Mubuso. Ha ba pile bupilo bobutelele, bupilo bwa tabo. Mi Mulena Mulimu abe mata a bona ka Pata ya Hae ya kamita, ni ku bafa buiketo ni mata, ni kuba beya mwa sebelezo ya Hae kufitela Jesu Kreste aba bizeza kwa Hae ya Kuyakuile mwa Lihalimu la pumulo.

³³ Kopano ye cwale. . . halunze luinamisa litoho za luna, mi luna bakutazi lu ye kwapili ku ba beya mazoho.

³⁴ Ndata luna yakwa Lihalimu, lu beya mazoho a luna ku Muzwale Hunt, ka Libizo la Mulena Jesu Kreste, sina mo lu mu zibezi, Mulena, ubile ya lukile. Mi lu itumela ku Wena ka pizo ye mwa bupilo bwa hae, ya bulumiwa. Mulena, bulela ka yena muzwale yo, a wine mioya, a tise tukuluho, Mulena, ku babali mwa butanga, ibe matuku ni—ni minahano, ni mwa mibili ni mwa moya. Mulena, mufe bulumiwa bwa niti, kuli akone, kwa mafelelezo a musipili wa hae, atalime kwa mulaho ka musipili omutelele wani ni kubona kuli ukonile, ka muhau wa Mulimu, kuswasa sila kaufela. Ka Jesu Kreste Mulena luna, lwa kupa. Amen.

35 Ku Muzwale Coleman hape lu beya mazoho a luna, kakuba lipaki, Mulena, ka kufa mulao wa tumelelo kwa pizo ya hae, kuli luna, keleke ye, sikwata sa batu se, lu lumele ku yena kuba mutanga wa Kreste. Mi lu kupa kuli U mu fuyole ni ku mufa bulumiwa bo butuna, bo butuna, kuli aku winele mioya ku Wena, Mulena, ni kulamulela bazike, mi—mi a lobake mata a Satani, kupotoloha bupilo bwa sicaba sa fumaneha ni sona. Fa ku yena, Mulena, bwa miselo, buiketo bo bunde ni mata. Mi, hape, ha kafita kwa mafelelezo a musipili, Mulimu, lumeleza kuli akone kutalima musipili omutelele ni kubona foo, ka sishemo sa Jesu Kreste, u konile ku lobaka litamo kaufela za sila, kwa likute la Mulimu.

36 Ndate yakwa Lihalimu, baana ba cwale ha ba pile ni kubeleka mwa kutulo ya Mulimu. Mi limbuyoti za Hao li ine ni bona mi libe ni bona kufitela nako ye lu ka kopana kwa mautu a Mulena luna yomutuna. Ka Libizo la Jesu Kreste lwa kupa. Amen.

37 Mulimu aku fuyole, Muzwale Hunt, akufe bulumiwa bwa miselo yetezi. Mulimu aku fuyole, muzwale, ni ku kufa bu—bu bulumiwa bwa miselo yetezi, ni wena. Mulimu aku fuyole. Hape:

Cwale lishala la Mulilo ha li to swala mupolofita,

Ku mu kenisa ka mwa swanela kubela ya kenile,

Mi Linzwi la Mulimu lali, “Ki mañi ya ka lu yela?”

Mi ki ha alaba ali, “Kina yo, u lume Na.”

Oh, kubulela, mu . . . (Mi Ha bulele kwa lipilu zeñata zabanana.) . . . bulela, Mulena ka, (Kubizwa ki Mulimu!)

. . . mi Ni ka akufa ku Ku alaba;

Bulela, Mulena ka, bulela, Mulena ka,

Bulela, mi Ni ka alaba, “Mulena, uni lume.”

38 Mo lu itumela ku Mulena kakusasana cwana ka likute lelituna le, kwa keleke ye paka kulumiwa kwa bakutazi mwa simu ya lizazi la mafelelezo lee. Sishemo sa Mulimu si zamaye ni mina, mizwale baka! Ni sepa kuli Wa mi lumela kwa libaka za kwahule ni kwa lifasi kaufela, ba kutaze bufumu bo bu sa konwi kufumanwa butuna bwa bona bwa Jesu Kreste, ko bu tokwahala hahulu. Ku tokwahala hahulu, lifasi li cwalo kacenu.

39 Cwale, buñata luli bwa lika zende ze, lu swanela fela kunga *fa* hanyinyani *fani* hanyinyani, fa kukona ku li kondisa kaufela mwa sebelezo kakusasana cwana. Cwale kacenu luna . . . Ni bulela fa tuto yakuli Ni . . . Na fokuñwi ha ni tabelangi kutalimananga ni linako ze sabisa cwana zee.

40 Cwale, Sunda yefelile, haiba nji babañwi ba mina ne mu si yo mo mi—mi ne mu si ka utwa Liñusa la *Mututo Wa Bulalu*;

mi haiba mwa lata matepu, Ni lumela kuli muka ikola yona yeo, *Mututo Wa Bulalu*.

⁴¹ Luna ni sikamañi, mushimani ya kula fa, kamba nto yeñwi? Oh, mushimani yomunyinyani, wa sihole. Eehe. Mi Mulimu amu fuyole. Kona cwalo. Ku lukile. Kwa mafelelezo a sebelezo, lu ka lapelela bakuli, nihakuli cwalo, mwa bona. Kacwalo luna, cwale, luna lu . . .

⁴² Lwa mi kupa, mwendi haiba mu kona, munge Liñusa, fa *Mututo Wa Bulalu*, nako ya bulalu fani Liseli, Lingeloi la Mulena le li bizelize sicaba kwa mututo, ha li to bonahala patalaza Lona kasibili mwa lifasi, mwa mututo. Mwabona? Ni sepa kuli seo sa utwahala hande, ku na: mututo wa bulalu!

⁴³ Kana muka ikutwa bumaswe haiba Ni tubula koti yaka? [Kopano ili, “Batili.”—Mu.] Kwa cisa luli mwa tabernakele kakusasana cwana, mi buino bwa moya fela bo lunani ki—ki so kona ku fukisa moya. U lukela ku kasha moya ka mata a hao. Kacwalo lu lela ona cwalo, zazi leliñwi, kubeya sifukiso se si bata mo, lu sa ba fela ni lika ku lukiswa.

⁴⁴ Cwale, ne lu ka itumela, haiba mu—haiba mu tabela ku—ku utwa Liñusa, *Mututo Wa Bulalu*. Cwale, lubile ni kututa ko kuñata, kono lwakona kubeya lizoho laluna fa sibaka, nako, fa kututa ko kulaalu koo Mulimu, mwa mufuta wa Siita sa Mulilo, u tilo biza sicaba kuli ba kauhane. Mi cwale ki ku kauhanya sicaba.

⁴⁵ Mi lu fumana kuli, ha Na bizize mututo wa pili, Na ile fapila bona mwa Siita sa Mulilo, ni ku ba lumeleza ku . . . ku ba isa mwa naha moo kasumulaho A yo bonahala fapila bona, mwa mufuta wa Muuna yabizwa Jesu Kreste. Na zwile ku Mulimu, mi aya ku Mulimu. Mi ni . . . mi ki Ha haniwa. Mi ki Ha taha cwale ku to biza sicaba kuzwa mwa—kuzwa mwa buino bwa sihalihali bone ba keni ku bona, inge mo ne ba bezi ni zona mwa Egepita, ne ba file nzila ya sibi ni kwa—kwa mikwa ya Maegepita. Mi Mulimu aba bizeza kwande.

⁴⁶ Mi cwale lu fumana kuli, nako ya bubeli, ne ba filwe mwatasa butanga ka—ka Mpi ya Maroma. Mi ba kena mwa lituto za litumelo ni kuzwa mwa busepahali bwa milapelo, mi Mulimu hape a luma mututo usili. Mi ki . . . Ha bonahala mwa mufuta wa Muuna ya na zamaisa batu.

⁴⁷ Mwa mututo wapili, Nali Siita sa Mulilo. Mi, ha Na tile mwa lifasi, mwa naha kwa Na ba isize. Ha ki mufuta kwa bunde mo ikabela mwa Mileniamu, ko A sweli kuisa Keleke cwale. “Lu ka Mu bona ka Mwa inezi, mi lu ka ba ni mubili inge mubili wa Hae o kanya.”

⁴⁸ Mi kacenu, ka Liseli la Evangeli le li monyeha mwa Liseli, Siita sa Mulilo se si bonahala patalaza mwahala luna! Sayansi i Si boni. Si mwa mitende, ni mwahala lifasi kaufela. Mi Sona, bubeli bwa sayansi ni za moya, li si lemuhile ku ba Siita sa Mulilo

se si swana, ka lisupo ze swana ni lika ze swana ze Li ezize kamita. Mi cwale mwahala mazazi kuna ni kufiteleza hahulu tumelo ni lika zeñwi, ibo, Mulimu kamita wa itibahazanga ili Yena. Cwale lufumana cwana.

⁴⁹ Mi ha ki nto kwa kanya ni yeo ka kuziba kuli, “Tabernakele ya lifasi ye, zazi leliñwi,” mubili o fokola wo mo lu kulela ni kunyandela, “u ka cinciwa ni ku eziwa sina mubili wa Hae Tota o kanya; mi lu ka Mu bona ka Mwa inezi,” ni ku ba ni Yena mwa Naha ye lu tamehile ku yona kacenu. Oh, Ni ka . . . mane mwendi ni ikutwa inge lu ka yema ni kuopela kuli *Ni Tamehile Kuya Kwa Naha Ya Sepiso*. Ba ka opela cwalo mwa sebelezo ya kolobezo, nihakuli cwalo, kakuli yeo kona pina yaluna ya kolobezo.

⁵⁰ Cwale kwa mizwale, hamoho mo ni mwa naha ko ku ya matepu aa, mi koo ki lifasi kaufela. Mañusa aa ha fiwi ku mutu fela alimuñwi. Mi halu lati kuli batu ba nahane kuli lu ka kwata nyana fela cwalo, kamba sikwata sa bafitelezi ba tumelo baba kopani hamoho, “ka ku kauhana ili luna, mo ku bonahalela, kusina kuba ni Tumelo,” kamba ku kauhana ili luna kulwanisa mutu, kamba—kamba kulwanisa Mulimu, kamba kulwanisa Keleke. Luna lu ba Keleke. Kono lu lika fela kusupeza nzila, ka Moya o Kenile ni ka tuso ya Hae, libaka la ketululo yelunani ye kacenu. Luna, ha lu lumeli ku yona.

⁵¹ Lu lumela kuli likeleke kaufela li lukela ku tamahana hamoho, isiñi ku kauhana; ba Methodist kwa sikwata sa bona, ni ba Baptist ku sa bona, ni ba Oneness, ni ma Trinitarian, ni se lunani, kaufela zona li kauhani. Lu lumela kuli i lukela kuba hamoho, sina sikwata silisiñwi sesituna se si kopani sa Mubili wa Jesu Kreste, kulibelela Kutaha kwa kanya kwani. Ha ba lukeli ku kauhana, ni hanyinyani.

⁵² Mi se si li kauhanya, ku lukela kuba libaka la kuli lusike lwa kopana hamoho. Ka ku balisisa cwalo, Ni fumani libaka, ka kubala zateni, ha ki mibala ya litalo la luna; kakuli, mubala wa yelo, bunsu, bufubelu, ni busweu, kaufela zona li kauhani mwa likopano ze shutana. Ha ki mufuta wa lico ze lu canga; kaufela luna lu ca lico zeswana. Lu tina libyana ze swana, ni zeñwi cwalo. Kono Ni bona ko li inzi, ki mutu ya zwile mwa nzila yetomilwe ya tuto ya Evangeli, mutu kaufela.

⁵³ Mi ku lukela kuba nzila yeñwi ye paka niti ye lukile ni ye fosahalile. Mi nzila fela ye mukona kueza ka yona, ha ki kubeya toloko ifi kaufela kwa Linzwi, mu Li bale fela ona cwalo mo Li inezi ni ku Li lumela ona cwalo.

⁵⁴ Mutu ni mutu ubeya wa hae fela, mutolokelo wa hae, u Li eza kubulela nto yeshutana, ku li kutisa kwa kopano ya makalelo ya keleke ya Katolika. Kanti, keleke ya Katolika ilumela kuli Mulimu u mwa keleke ya Hae, “Mi Linzwi halina sa kueza ni sona; mi Mulimu u mwa keleke ya Hae.”

55 Mi luna Baipanguli, ka mo lu fumanela, mi sina Sinulo 17, kuli kaufela bona ba ipundekile hamoho, ni kuli keleke ya Katolika neli “mahe” wa likopano kaufela. Mi lubona kuli kopano ya Baipanguli, ibo ka bubofu, ka bubofu, ina ni sibupeho se si swana sa keleke ya Katolika. Bibeke i biza keleke ya Katolika kuli “lihule,” ni kubiza keleke ya Baipanguli kuli “mahule,” i bulela kuli lihule neli “mahe mahule.” Mi bani ki batu, yani ki musali wa libubo le li maswe ya sa pili ka buitamo bwa linyalo la hae.

56 Mi luna kaufela lu ipapata kuba Munyaliwa wa Krete, mi kanti ha luna niti. Ki sikamañi se si tisa ku sa ba ni niti? Ka kupila ka kushutana ni—ni mulao wa tomile Mulimu ku Munyaliwa wa Hae kuli apile ka ona. Wani kona muhupulo wa ka, yona Bibeke, mi Ki lona Linzwi la Mulimu leliisa palelwi, Na lumela.

57 Mi, kabakaleo, lu fumana kuli keleke ya Baipanguli, fa kuli ibe ni kopano, ya ikauhanya ili yona neba kwa Mañolo, kuli ipange katengo ka yona. Bakutazi, baba supilwe, ba ka kumalela kwa lika ze ba . . .

58 Cwale, ba taha kwa palo yaka ni mwa mizuzu, ka mianda anda, mi ba ni bulelela kuli, “Muzwale Branham, u tisa kangisano yani kwa sicaba. Hakuna ya ka yema fani kulwanisa Sani. Ba ziba kuli ki Niti.”

Kiñi, Ni li, “Kiñi, kiñi ha mu sa ezi cwalo?”

59 “Kihande, mwa bona, haiba Ni eza cwalo, Ni ka kupelela sinkwa. Hakuna nihaiba yomukana . . . Ni na ni bulumiwa. Ni lukela kufita ku Mulena, mi Ni lukela kuya kwa sicaba. Mi Hanina ku yemela zeo.”

60 Kana mwa lemuha fela kuli Krete ki yena muyemeli wa luna! Bibeke kona muyemeli wa luna. Mwabona?

61 Kono, ki, mwabona, kona kuli seo si nepela keleke ya—ya Baipanguli yona nto yeswana fela ni mo iinezi keleke ya Katolika.

62 Keleke ya Katolika haina taba . . . Kihande, Ha ni buleli kuli . . . Ha ni ezi cwalo ka kashwau, ka kubulela kuli habana taba ka se ibulela Bibeke. Ba—ba lumela Bibeke, kono, mwabona, bana ni . . . Kuyola kwa buapositola kona seo keleke ya Katolika i yemi kusona. Kwani ki ku kuyolisa ma pope, mi ba biza Pitrosi ku ba pope wa pili, ni kushetumuka cwalo. Cwale, bona, ba lumela cwalo. Bona, ba lumela cwalo ka tukufalelo.

63 Mi Baipanguli, mwabona, ba—ba kopana hamoho ni kuba ni kopano inge mo ne ba ezelize kwa Nicaea, Rome, kone ba ongaongile keleke ya—ya Katolika ka . . . kwa Katengo ka ba Nicaea. Mi lu fumana kuli bubeli bwa zona ki ze swana. Bubeli bwa zona ki ze swana. Ba siya Linzwi la Mulimu, kuli bapange kopano. Mwabona? Mi cwale ha itaha kwa Buniti bo butuna

bo bu bonahala bunca kacenu, Ki za bueñi ku bona, kakuli ba lutilwe fela ka sizo.

64 Haluna sizo kwanda Bibe. Haluna sika kwanda Linzwi la Mulimu le Likenile, mi foo kona fo lu yemi.

65 Mi cwale, kacenu, Ni bata kubala Mañolo nyana, fa muzuzu fela, kuzwa kwa Linzwi le li kenile, le li kenile la Mulimu, le li fumaneha mwa Buka ya Muhalalehi Luka. Kauhanyo ya 23 ya Muhalalehi Luka, fa mayemo, kuba ni—ni katala ka se Ni—Ni bata kubulela, muhupulo wa makalelo fa taba ye Ni bata kuambola ka yona. Mi musweli kuapula cwale ku Muñoli Luka, kauhanyo ya 23, mi Ni bata kubala timana iliñwi. Kona fela ze Ni tokwa ka mayemo a kakusasana cwana, kuli ni li tome fateni. Cwale lu bala ya 20 . . . kauhanyo ya 23, timana ya 33 mwa kauhanyo ya 23.

*Ha ba . . . fitile fa kalundu, kaka bizwa katendele
Kalvari, fani ba mu kokotela, hamoho ni lisinyi, se siñwi
ku la bulyo, mi se siñwi kuu la nzohoto.*

66 Cwale Ni bata kunga manzwi amane kuzwa fani, kuzwa mwa palo yeo, kuli ni beye se Ni bata kubulela, “fani ba Mu kokotela,” manzwi amane. Mi cwale tuto yaka i bizwa . . . Ni—Ni tisa kalimelo kwa likeleke za likopano za lizazi le, mi hape ni zeñata za ba icemeli, ka ku kokotela Jesu Krete sinca mwa lizazi le. Ku ba fa mulatu! Kakusasana cwana, i bizwa kuli: *Kufa Mulatu*.

67 Mi Ni bata kuitusisa yona hape inge kuli ki sibaka sa ndu ya sibaka sa kuta, kone kuna ni . . . Esi mane, katala ni keleke ki mwa kuzekela sibaka sa kuta. Bibe. Ibulenzi kuli, “Ki sipula sa katulo, kuli—kuli i lukela ku kalela kwa ndu ya Mulena.” Mi se si swana sina—sina lubona ni—ni muatuli, ni lipaki, ni zeñwi cwalo. Mi Ni nani, kacenu, ka bupaki bwaka, ki Linzwi la Mulimu.

68 Mi kalimelo yaka ni fa mulatu kwa likeleke za kacenu. Cwale Ha—Ha ni liki kutisa muezalibi ku se. Ni bulela fela se kwa keleke. Mi sina—sina kuba mwa—mwa—mwa matepu cwale, mi Ni—Ni ka lika kufeza kapili mo Ni konela. Ni fa mulatu lusika lo ka ku kokotelwa kwa bubeli kwa Jesu Krete.

69 Mi cwale ka kueza se mwa lusika lo lupila kulona loo, Ni—Ni eza se, Ni lukela kubonisa bupaki. Haiba Nina ni kutisa kalimelo ka kufa mulatu, una ni kubonisa bupaki bwa mulatu wa bubulai bo bu ezizwe. Ni—Ni nani, ku ba fa mulatu, Ni—Ni lukela kutisa bo—bona bupaki bwa ku li paka, kuli ki, kuli se Ni bulela si ka yema fapila Muatuli yomutuna. Zeo, mi Ni italima ili na kuba muatuli kwa . . . mwa kalimelo ye. Kuli, Linzwi la Mulimu, kakuba paki yaka, Ni fa mulatu lusika lo ka ku takisa.

70 Ni lukela kubonisa, mi ni ka bonisa, kuli moya o swana uteni fa sicaba kacenu o no tisize kutakiswa kwa pili, ni kueza lika ze swana. Ni—Ni lukela kueza cwalo, haiba ikaba ku takiswa, kuli ba takisize. Ni lukela kubonisa kwa—kwa sicaba kuli maikuto

aswana mwa sicaba kacenu asweli kueza lika zeswana, ka moya, ze ne ba ezize ka nama ka nako yani. Ne ba takisize, ka butu, Jesu Kreste, yena Mwana Mulimu. Mi cwale, kacenu, ka Linzwi le li swana, ni ka—ka Moya o Kenile o swana ni Linzwi le li swana, Ni—Ni lakaza ku bonisa likeleke fo—fo li yemi, kuli basweli kueza nto yeswana kacenu, mi Bibebe ibulela kuli baka eza cwalo, ni kubonisa kuli le kona lizazi le lupila ku lona.

⁷¹ Ne li si ke za ezahala myaha nyana yefitile. Nibulele kuli, myaha ye mashumi aketazoho kwa mulaho ne li si ke za ezahala, kono kacenu za zamaelela luli ni nako yateni. Mi ne li si ke za ezahala, mwendi, myaha ye lishumi kwa mulaho, kono za kona kuezahala kacenu kakuli—kakuli nako se ifelile. Lu—lu kwa nako ya maungulo. Mi Na lumela, kakuba mutanga Hae, kuli lu—lu sutelezi fela ku silela mwabuse bwa naha ye, ku Yeñwi.

⁷² Kabakaleo, nako ya kubaka, kwa naha, i felile. Ni lumela kuli naha ye haikoni kubaka. Ni lumela kuli se i silile museto mwahala sishemo ni katulo. Ni sepa kuli isweli ku pañata fa sikala.

⁷³ “Muzwale Branham, usika kalisa kale taba ya hao, uka bonisa cwani zeo?”

⁷⁴ Ona se fela, kuli luna ni mulatu wa libi zeswana za na sinyize Mulimu lifasi ka zona, mwa nako ya muunda wa lifasi. Luna ni mulatu wa libi zeswana za Na bulaezi lifasi la Sodoma ni Gomora. Mi, cwale, mi luna ni bupaki bo bu swana bwa moya kaufela bo bu beilwe fapila luna, ona bupaki bo bu swana kaufela bwa moya, bo bu zibahal kwa lifasi, bo bu tisize sishemo sa Mulimu fahalimwa masika ani. Kuli, hape, ku hana, kwatisa katulo. Kacwalo haiba lusika lo lu hanile sishemo se si swana sene si hanilwe mwa mazazi ani, Mulimu ukaba ni saluluti ku ba tuhelela kuya kusina katulo.

⁷⁵ Sina Jack Moore, mulikana ka, nako yeñwi naize, “Haiba naha ye i ka ya kusina koto yezwa ku Mulimu, konakuli Mulimu uka swanela ku zusa Sodoma ni Gomora ni kukupa swalelo ka ku ba cisa.”

⁷⁶ Cwale, lu ziba kuli ka moya baeza lika zeswana kacenu, kakuli basweli kueza cwalo, ni bona, ka mulelo o swana, mi ka mukwa o swana o ne ba ezize ka ona fa ku kokotelwa kwa Mulena, ka butu. Basweli kueza cwalo bakeñisa muna, bakeñisa bubofu bwa moya. Kuli, ha ba lati kubona. Habana ku Li teezeza.

⁷⁷ Jesu, mwa musipili wa Hae fa lifasi fa, Na ize, “Kihande kana Isaya na si ka bulela ka mina kuli, ‘Muna ni meeto kono ha mu boni, ni lizebe kono ha mu utwi.’” Mwabona?

⁷⁸ Libaka le li swana, ona—ona mulelo o swana ni minahano yeswana, ba sweli kutisa kutakiswa kwa Kreste hape, sinca, (sina mo lu fitela ku zona kasamulaho nyana), ka libaka le liswana lene ba ezize ka nako yani.

79 Hakuna se ba kona ku fumana ka ku Li nyaza. Ha ba lukeli kulika ku Li swabisa. Mi ba ziba kuli bupaki bu teni. Mi ba ziba kuli Biblele ibulela cwalo. Mi taba fela ye bakona kueza ki ku Li nyefula. Yeo ki niti. Kacwalo, mi ze kaufela, ki minahano yeswana.

80 Mi cwale, ka mayemo aa, Ni swabisa lusika lo ka ku kokotelwa kwa Jesu Kreste; ka ku takisa, ni kuba ni mulatu; ni masila, ka kuba bumaswe, lwa buitati, ka mazoho a kopano lu takisa Mulena wa Bupilo ya na bata ku Iponahaza ili yena kwa sicaba.

Mu li, “Ki Mutu ya swana?”

81 “Kwa simuluho nekuna ni Linzwi, mi Linzwi neli Mulimu. Mi Linzwi a ezwa nama, mi la iponahaza Lona liñi.” Linzwi ne li bonahalile mwa nama, mi ba nyaza nama ni ku i bulaya, kakuli Linzwi ne li bonahalile. Maheberu 13:8, iize, “Jesu Kreste ki ya swana maabani, kacenu, ni kuyakuile.” Ki Linzwi leli swana. Mwabona? Mi, ka libaka leliswana, balika ku kokotela Linzwi.

82 Cwale, kwa palo yaka, kuli ni kutele fa tuto ye Ni bata kunga. “Kwani,” manzwi amane, halu tolokeni, “kwani.” “Kwani,” muleneñi o kenile hahulu mwa lifasi, Jerusalem. “Kwani,” muleneñi wa bulapeli hahulu mwa lifasi. Kwani, “bona,” batu ba bulapeli hahulu mwa lifasi, kwa mukiti wa bulapeli, mukiti wa Paseka. “Kwani,” sibaka sa bulapeli hahulu, muleneñi o munde hahulu wa bulapeli, yona—yona yetuna hahulu ya likopano kaufela, yona toho ya zona kaufela. Kwani, “bona,” batu ba bulapeli hahulu mwa lifasi kaufela, ne ba kopani kuzwa mwa lifasi kaufela. Bona “ba kokotela,” lifu le li swabisa hahulu luli, ba bulaya, leo mutu na ka bulaiwa ka lona; mapunu, ba Mu tubula liapalo. “Na—Na hanile kunyefuliwa.” Bona . . . Sifapahano sina ni—ni lisila le li tatelizwe ku Yena; kono ne ba Mu tubuzi liapalo za Hae. Maswabi amatuna hahulu!

83 “Kwani,” muleneñi omutuna hahulu wa bulapeli, “bona,” batu baba itutile hahulu, “ba kokotela,” lifu leli swabisa hahulu ha butuku, “Yena,” Mutu yomunde hahulu. Haiba nji seo ha si ka likani ku nyaza lusika lo!

84 “Kwani,” kopano yetuna hahulu ya bulapeli, keleke yetuna hahulu mwa likeleke kaufela ya kopana hamoho mwa sibaka silisiñwi. “Bona,” batu ba bulapeli hahulu ba masika kaufela, batu baba lukela kuba balapeli luli ba Mulimu. Ba kopanela mwa mukiti o kenile o mutuna o ne ba nani, kwa kukeniswa kwa . . . kwa Paseka, ha ba tisiwa kuzwa mwa butanga kukena mwa tukuluho. Mi “kwani” ka nako yani, “bona” ka nako yani, batu ba bulapeli hahulu, mwa mukiti wa bulapeli hahulu, kwa sibaka sa bulapeli hahulu, ba tiseza Mulena wa Bupilo taba ye swabisa hahulu, ku ze ne ka ezahala, ka kutubula Mutu ni ku Mu paheka fa kota. Kakuli, “Ku kutwe,” kubulela mulao one ba lapela ka ona, “ku kutwe mutu ni mutu ya pahekwa fa kota.”

“Mi A ezwa sikuto bakeñisa luna.” Ba Mu tubula liapalo ni ku Mu nata, ni ku Mu soma, yena Mulimu luli wa Lihalimu; ba Mu tubula liapalo, ni ku Mu kokotela fa sifapano. Yena! “Kwani ba Mu kokotela,” mwatasa koto ya Maroma.

⁸⁵ Lifu leli maswabi hahulu kacenu halikoni ku ba ku kunupiwa. Lifu le li swabisa hahulu kacenu halikoni kuba kuhatiwa ka mota ni kubulaiwa, kutiba mwa mezi, ku ciswa ka mulilo. Kono lifu le li swabisa hahulu kacenu ki ku takiswa patalaza, koo lifasi kaufela la ku nyaza ni ku ku biza kuli una ni mulatu.

⁸⁶ Mi lifasi kaufela la beya mazoho a bona ku Muuna yo ni ku Mu biza kuba ni mulatu, kanti Nali ya sina mulatu. Mi A shwela mwatasa lila za sila, (isiñi balikani ba Hae, isiñi milao ya Hae), kono mwatasa sifapano sa sila. Mulena wa Bupilo, yena Mutu yomunde hahulu ku ba bakile bapila fateni, kamba bona baba ka pila fateni, Jesu Kreste. “Yena,” Mutu yomunde hahulu! Mubuluke seo mwa minahano halunze lu yaha sibaka seo kacenu.

⁸⁷ Munahane fela, fa sibaka inge Jerusalema, koo ka myaha ye mianda ye twenti-faifi, kamba kufitelela, kuli sicaba... kamba mianda anda ya myaha. Ni kona kuba ka butelele nyana fani. Hakulata i kona kuba eiti kamba myaha ye naini handeleti, kamba kufitelela. Hani zibi fela mukwa wateni, butelele bwatani, kuzwa ka nako ya Solomoni ha i yahiwa tempele. Na nahana, mwendi ka myaha ye mianda ye eiti, nto yeñwi ye cwalo.

⁸⁸ Mi ne ba libelela Mesia yana taha. Ne ba kopanezi kwani kwa milapelo ya Paseka. Munahane fela ka zona cwale! Toho ya Bafarisi kaufela, Basaduki, ni kaufela ze mu munani, kopano iliñwi yetuna, ya kulapela Mulimu. Sibaka se si kenile hahulu, Jerusalema, tempele ya Mulena, mi sicaba sa Mulena, sa nga Mulena Kasibili ni ku Mu kokotela, ka koto yetuna. Ki nto ye cwalo!

⁸⁹ Cwale manzwi amane ani, bona, “Kwani ba Mu kokotela.” Cwale, mu sa bonisa Bibebe, mwa bona. Ki manzwi fela amane, kono Bibebe ya tuluka ka Niti.

⁹⁰ Cwale, na, Ni lukela kuya kwahule, kutatulula ze Ni ambola fateni, kono Bibebe hailukeli kutatulula sika. Ki Niti fela, kacwalo ki—ki—ki Bibebe ha ilukela kutatulula sika kaufela. Ha—Ha i lukeli ku li tatulula, kakuli Kaufela zona ki Niti.

⁹¹ Ki a manzwi amane a liwenge lelituna la Niti. Ni ka lika ku Li tatulula. Mi ka kulika ku Li tatulula, ka swanelo, ikona kutala ndu ya libuka. Hakuna mukwa wa kuli ni tatulule manzwi amane ani. Kono cwale ki fo, ka tuso ya Hae Yana Li tisize ku ñolwa, kulika ku litatulula manzwi amane aa, ku atisa ka mukwa wa kuli sicaba si a utwisize.

⁹² Se lunani fapila luna cwale, luna ni sifapano sa pili se si beilwe fapila luna; kwa sibaka se *sikenile* hahulu, *sicaba* sa bulapeli hahulu, *lifu* le li butuku hahulu, ku *Mutu* yomunde hahulu. Oh, ki tuto ye ipitezi luli. Mawi, oh, mawi, ki maswabisa!

⁹³ Cwale ha lungeni, pili, linzwi la pili, “kwani.” Halu amboleñi ka ona fa mizuzu yelikani lu si ka tisa kale kalimelo ka kufa mulatu. Lu ka shetumuna taba ye ni ku mi bonisa sene ba sweli kuezwa, mi lu ka fumana haiba kalimelo ya ka ka kufa mulatu i lukile kamba nee. “Kwani,” Jerusalema, sibaka se si kenile hahulu, kakuli tempele neili teñi; sibaka se si kenile hahulu, kakuli, ki, tempele, yeneli teni. Mi Majuda kuzwa mwa lifasi kaufela ba kopanela mwa sibaka silisiñwi se, libaka za kukopanela za kulapela. Sibaka se. . . situna hahulu sa kulapelela sene siliteni, neli kwa Jerusalema. Tempele neili kwani. Zeo kikuli, “Ku ñozwi, ‘Batu kaufela ba lukela kulapelela kwa Jerusalema,’” ku lukile, kakuli ki sibaka sa milapelelo.

⁹⁴ Mi kacenu mwa ba utwa, alimuñwi wa bona ubata ku bulela, bona, “Oh, lutaha kwa mikopano yemituna ye,” koo likopano ze lina ni zona. Mi—mi cwale luna ni—ni ku kwalula kwa. . . kwa Munzi wa Vatican, ni—ni kubeya mapope ba fa bueteleli, ni zeñwi cwalo. Bona, mañi ni mañi uli, “Kaufela luna lu lukela kuya kwa mafulo a ba Methodist, kamba kwa—kwa mukopano wa ba Bible Baptist.” Kamba—kamba, “Kaufela luna lu lukela kuya kwa—kwa Rome, mi kwani ko kuna ni sibaka sesituna,” se ba biza kuli, “Bukreste.”

⁹⁵ Ka nako ya ndwa ya mafelelezo, fani Rome hana wile, masole ba si German ba. . . Buñata bwa mina bashimani mwa ziba ka zona. Masole ba si German bani ba yo amuhela tuso kwa Munzi wa Vatican kwani, ni ku kunupa ma America hane ba ya kwapili. Muzwale Funk, ni Muzwale Roberson, ni babañata, ni Muzwale Beeler, ni buñata bwa mizwale bani bene bali mwa ndwa yani, ba ziba. Mi kana mwa ziba? Lu file litaelo kuli basike ba kunupa munzi wani. Ma American, ne mu yemi kwani, mi ne mu bile ba ba zumiwa. Kono kwa West- . . . Topo ya Westminster Abbey kwani kwa. . . mwa England, ne mu kunupile fani handende; kwani kona koo Baipanguli ne ba kopanezi. Kona kuli nekuli hande ku kunupa fani, kono isiñi ku kunupa fa Vatican. Kakuli, ka kuba Mueteleli wa naha Roosevelt. . . Ne ni utwile likande la hae fani—ha li patalazwa busihu bwani, lene li bizwa kuli Kuambolela Kwa Liiso. Ki hali, “Fani Rome ha wa,” ki hali, “ki maswabisa luli, kakuli Rome kona toho ya Bukreste kaufela.” Kana mwakona kunahana kuli Muipanguli a bulele cwalo?

⁹⁶ Kacwalo siemba sesituna sa bulapeli bwa Sikreste, kihande, luka ba ni—luka beya seo sina Jerusalema, haiba mu lata kuezwa cwalo. Haiba mutabela kuezwa cwalo, ha lu beyeni zeo kwa Jerusalema. Toho ya zeñwi ze kaufela, ba—ba—ba Sanhedri,

ni—ni ba Bafarisi, ni ba Basaduki, kaufela bona ba ya kwa Jerusalema. Yani neli yona nkambe yetuna luli.

⁹⁷ Mi mwa bupilo bwa kopano, mu lukela ku lumela kuli Keleke ya Roma ya Katolika kona mahe wa zona kaufela. Luli ki cona. Mi ne i kalezi kwa Pentekota. Kwani kona ko ne ba fitile ha ne ba ikongakongile. Cwale luna, Baipanguli, ki likezeli fela ze nyinyani ze zwa mwa keleke yani. Mi cwale ha lu buleleñi kuli ne ikaba kwani kwa Vatican, kacenu.

⁹⁸ Kamba, kwani kwa Jerusalema, sina mo ne kuinezi ka lizazi lani, “Fani batu kaufela hane ba lukela kutaha kwa Jerusalema ku to sebeza. . . kulapela.” Ki kabakalañi hane ba eza cwalo mwa mazazi a— Jesu? Ki kabakalañi hane ba bulezi kuli batu kaufela ba lukela ku lapelela kwa Jerusalema? Kakuli, kuna ni fela sibaka silisiñwi seo Mulimu aka kopana ni mutu, sani si mwatasa mali a sitabelo. Ki kabakaleo ne ba na ni kutaha kwa Jerusalema.

⁹⁹ Mulimu haana ku kopana ni mutu kai kamba kai konji mwatasa Mali. Ha u sulula Mali fafasi, kona kuli sibaka sa makopanelo a hao ni Mulimu sa ngiwa. Mulimu na ezize keto ya Hae ya pili mwa simu ya Edeni, kuli mutu na ka Mu lapela feela mwatasa mali a suluhile a sitabelo. Mi sani kona fela sibaka ko Mulimu na kopana ni mutu nako yani, mi sani kona fela sibaka sinosi koo Mulimu a kile a kopana ni mutu.

¹⁰⁰ Mi sani kona fela sibaka sinosi ko Akopana ni mutu kacenu, ki mwatasa Mali a suluhile a Sitabelo. Mwabona? Ha nina taba kamba uwa Methodist, Baptist, Presbyterian; haiba mwakona kulibala lifapahano za mina, Katolika ya Roma, kaufela se muli sona, mi utahwe mwatasa Mali a suluhile, Mulimu uka kopana ni luna mwani. Mwani kona ko lukona ku kopanela ni kopano fa mayemo a swana. Kono, ku si cwalo, Hana ku kopana bakeñisa fela kuli u wa Methodist; Haana ku kopana bakeñisa fela kuli u wa Pentekota. Uka kopana ni wena mwatasa buino bobuñwi, bwani ki, mwatasa Mali a suluhile, fo libi za hao ha li bakezwi ni ku kufezwa fa Pila Hae, konakuli, ka Mali. Mi Mali kamita a fapila Hae, mi kabakaleo Ukona fela ku kubona ka Mali a suluhile ani. Mi so li busweu sina litwa, mwabona, ha u ipulezi libi za hao. Kusicwalo, ha uyo mwateñi, ha ukoni ku kopana.

¹⁰¹ Ki kabakaleo ha mu sa boni lika ku ezahala mwa likeleke. Ba ipulela kuli ba lumela Mali, kono ba hana mulelo luli wa kukena mwa Mali; lona Linzwi. Mwabona? Kuna ni fela nzila iliñwi yeo Mulimu aka kuteka Linzwi lani. Hamuna ku kuteka Linzwi lani, mutahe mubulele kuli, “Ni wa Katolika ya Roma. Ni bata kuli se si ezahale.” Hamukoni kueza cwalo. Methodist, Baptist, kamba Mapentekota, hamukoni kueza cwalo.

¹⁰² Nzila fela ye kona kueza ka yona ki ka sishemo sa Mulimu, ka muhau wa Hae, una ni kutaha ka kufitela mwa Mali a suluhile a Jesu Kreste, uli, “Mulena, Ni bulela sepišo.” Mwabona? Mi

cwale haiba luli u mwatasa Mali ani, Mulimu utamehile kwa Linzwi lani. Kono, pili, u lukela kuba mwatasa Mali ani. Mwa bona cwale?

¹⁰³ Ki kabakaleo ha ba sa lumeli mwa limakazo. Ki kabakaleo ha mu sa lumeli ku za buipiteli. Kona ha ba li nyaza. Libala le liswana le ne ba li nyazeza kwa mulaho kwani, kona libaka le liswana le ba li nyazeza ni kacenu. Bana ni mulatu sina mulatu mo ukona kubela. Kakuli, mwatasa Mali a suluhile fela!

¹⁰⁴ Mi bani bene ba ka nyamatala, muzwale yomuñwi yomunyinyani ya na ka nyamatala, ka buishuwi, kuli ange Mulimu ka Linzwi la Hae, ni kuzwela kwande kwani ku yo ipulela libi za hae, ni kulibala lituto za litumelo ze kaufela ni lika zeñwi, ni kuyema fani mwatasa Mali ni ku Li lumela, konakuli ba ta mu biza kuli “ki mufitelezi wa tumelo.” Ba bata ku mu beya mwa sitopa sa . . .sina hane lu ka bulela cwalo; ha ki linzwi lelinde la kuitusisa fa katala, kono fakuli mu utwisise, yena ki “muicemeli.”

¹⁰⁵ Kasamulaho wa zeo kaufela, hanili kaufela luna lu baba ipitezi? Mwabona, mulumeli ki muipiteli ku ya sa lumeli, mi ya sa lumeli ki muipiteli ku mulumeli, kona kuli ki mañi ya ipitezi he? Mwabona? Mulimi ki muipiteli ku muuna wa pisinisi; muuna wa pisinisi ki muipiteli ku mulimi, mwabona, kona kuli ki mañi he, nihakuli cwalo?

¹⁰⁶ Na mi bulelela, piliso ki ndwa ya mutu anosi ni Mulimu, kihona, mutu anosi, “lu ipatele piliso yaluna ka sabo ni ku ngangama.” Mi ha Ni zibi mayemo amañwi, kakuba muluti, kakusasana cwana, kamba kakuba mukutazi yazwa ku Kreste, kufita ku li beya fa Linzwi. Hanikoni ku li beya fa sika sisili fela.

¹⁰⁷ Cwale lufumana fani, cwale, kuli neli fela mwatasa mali, koo Mulimu na kopana ni mulapeli, kacwalo ne ba kopanela kwa Jerusalem.

¹⁰⁸ Mi Kreste ki Ngunyana yefilwe ki Mulimu ya Sitabelo. Mi kacenu kuna ni fela sibaka silisiñwi ko Mulimu akopanela ni mutu, mi sani si mwatasa Mali a Jesu Kreste. Kai ni kai, ku nyazizwe; Mulimu haana ku li utwa. Wakona kueza maikuto a mifuta kaufela, ni mikwa kaufela ya milao mwa bulapeli, ni ku njanja, ni kutulaka, ni kuba ni mali ni mulilo ni musu, ni lika zeñwi kaufela; kono haibile fela bupilo bwani ha bu swani ni Linzwi, mi Mulimu handende inza nyaka zibahazo ya bupilo bwani, kona kuli hakuna tuso mane ya kulika-lika, kakuli u fande. Mi Mulimu haana ku li katana konji ha li ka fita mwatasa sibaka sa Mali ani. Yeo ki niti.

¹⁰⁹ Kacwalo, mwa bona, mwa Mañolo, luna ni Jerusalem, Keleke ina ni; ki mwa Lihaliimu, Jerusalem wa Lihaliimu, koo Mulimu ki Mulimu. Mi, kacenu, haliyo mwatasa tuto yeñwi ya tumelo kamba nto yeñwi, ye lu lika kueza kuba Jerusalem. Lu ka tabela, ba Methodist, lu kona ku tabela cwalo,

cwale, inge ka kuba ni—ni nkambe yetuna ya Methodist kuba Jerusalema. Ba Katolika ba kona kutabela kupanga Rome. Ni—ni libaka ze shutana ko luna ni nkambe ya luna, lu tabela kueza kuli . . . kambe ibe yona Jerusalema. Kono Bibebe ibulela, kuli, “Jerusalema wa luna u zwa kwa Lihalimu, yeli mahe balumeli kaufela.”

¹¹⁰ Cwale, mi Krete ki Ngunyana ye lukisizwe ya Mulimu. Mulemuhe mo ne li swanela kubela cwale, kubonisa kuli Jerusalema na kafela. Lili? Na banga teñi kufitela ka nako yani. Mali a ngunyana nali fela hande kufitela lizazi lani, kono cwale kwa sifapano a cinca. Mulao wa kale felile. Nekuna ni omunca, mi ni—ni Ngunyana nali fa Sitabelo. Ngunyana, Ngunyana ya sitabelo, neli mwa sibaka. Ne ba sweli kunyaza ni kueza lika zeswana ze ne banani kueza. Yeo ki niti.

¹¹¹ Mulimu a fuyolwe, ka kubona Liseli lelinde la Lihalimu le mwa lizazi la maungulo cwana! Kakuli, likeleke lieza nto yeswana ni kacenu. Kufitela hola yeo bulapeli bwa kopano bu nyazizwe ni ku pakiwa hande kuli li takisa Linzwi la Krete, kuzwa fani kutaha Linzwi, mi ki Linzwi feela. Kuzwa, ka nako ye ngu ya kale ya paseka ishwa ni Krete aba yena Ngunyana yaluna, ka lizazi la ku kokotelwa. Mi zazi leo kopano i takisa Linzwi la Mulimu ni kuamuhela tuto ya tumelo mwa sibaka sa Linzwi, lani kona lizazi Linzwi ha liba ni mata atezi. Zeo se li ezahalile cwanoñu.

¹¹² Mulemuhe, sa bubeli. Pili, “kwani,” Jerusalema. Sa bubeli, “bona,” bona. Bafi? Ki Majuda, bona balapeli. Munahane ka zona! Balapeli bona kasibili ne ba bulaya yena Luli yene ba ipapata kuli ne ba lapela. Kana mwakona kunahana nto ye cwalo, kuli neli baana baba butali, bene ba lutilwe, bene bana ni madigiri a bu dokota mwa lituto kufitela hane ba ka . . . Bona, neba na ni kuzwa mwa lusika loluñwi ba si ka . . . kamba—kamba mushobo, mane ba si ka ba kale muprisita. Neba na ni kuba Malivi. Bo ndata bona neli baprisita. Bo kuku a bona neli baprisita. Bokuku wabo-kuku-wabo-kuku-wabo-kuku abona nebali baprisita. Mi neba na ni kupila bupilo bo bu cwalo, kufitela, neba nyazo iliñwi ka bona, ne ba ka pobaulwa ka macwe. Hakuna sishemo se ne si filwe. Kukena? Kiniti, kono ki kuluka kwa kuikeza. Ne ba na ni kueza cwalo, kubonisa pata ya bona kwa keleke ya bona. “Mwahali ku bona,” Jesu naize, “mu tezi fela masapo a batu baba shwile.”

¹¹³ Mo ne Ni ka tiseza kalimelo ka kufa mulatu ona foo! Mi mutu ya ziba kuli Yeo ki Niti, Linzwi le kuba la Niti, ni ku keshebisa ka Lona, kubonisa pata fapila kopano yeñwi, uh-huh, Ni na ni tukelo ya ku ba fa mulatu, ona fa Linzwi la Mulimu.

¹¹⁴ Mulemuhe, “bona,” balapeli, baana bene ba libelela sepiso, batu bene ba li libelela, mwahala myaha ni masika, mi kusina sa kueza kwanda ona mwa mukopano wa za bulapeli wani. Kono

ne ba abile Linzwi kuya ka tuto ya za bulapeli, mi ba latehelwa ki Niti Yateñi luli. “Bona,” baprisita, bulumiwa bwa lizazi lani! “Kwani,” kwa nkambe yabona, “bona,” bulumiwa bwa lizazi lani, ne bu *bulaya* Mulimu luli, yena *Ngunyana* kasibili. Yena luli Yene ba ipapata kuli ne ba lapela, ne ba mu bulaya.

¹¹⁵ Mi, kacenu, Na fa mulatu kwa sikwata sa bakutazi baba supilwe se; mwa lituto za litumelo za bona ni likopano, basweli ku takisa, kwa sicaba, yena Mulimu ya swana yo ba ipapata kuli ba lata ni ku sebeleza. Na fa mulatu bakutazi ba, ka Libizo la Mulena Jesu, fahalimwa tuto ya bona, ye bulela kuli “mazazi a limakazo a felile,” ni kuli “kolobezo ya mezi ka Libizo la Jesu Kreste ha isika likana mi ha isika luka.” Ku ifi ni ifi kaufela ya Manzwi, e ba cincanisize ka lituto zabona, Na ba fa mulatu, ka kuba ni mulatu, wa Mali a Jesu Kreste mwa mazoho a bona, ka ku kokotela sinca Mulena Jesu, ka nako ya bubeli. Ba sweli ku kokotela Kreste, kwa nyangela, basweli kuamuha lika ze ba swanela kufa ku bona. Mi ba yolisize sika mwa sibaka sa Yona; tuto ya tumelo, kwa kabubo.

¹¹⁶ Kwani bona, “bona,” bona bene ba lukela kuziba hande. Haiba kuna ni mutu ya na lukela ku ziba hande, ne i lukela kuba bakutazi bani. Haiba kuna ni mutu ya lukela ku ziba hande, i lukela kuba bakutazi ba lizazi lee. Haiba kuna ni ya lukela kuziba, ki—ki—ki mabishopu, ni bahulu ba mabishopu, mi—mi ni bakutazi, ni baituti babatuna mwa lituto za bulapeli, ba na ni kuziba ka shutano. Kono kiñi ha ba za zibi? Uh! Ki twaniso yecwani! Ki sikamañi se lunani fapila luna fa kono ki—ki twaniso! Ba bulela kuli ba lapela Mulimu, mi basweli kubulaya Mulena wa Bupilo. Bona, “kwani ba Mu kokotela,” mi fa hape *baeza* lika zeswana, kakuli Yena ki Linzwi.

¹¹⁷ Sani kona Sali sona, ki ponahazo fela ya Linzwi. Mi sani kona Sali sona kacenu, ponahazo ya Linzwi, kulika kufumana mutu mo a ka iponahaza Iliyena.

¹¹⁸ Mi sicaba se si beya kopano kwahule ni Mulimu. Mi—mi haiba kuna ni se si ka ezahala, mi si bulelwa mwa kopano, ba li nyaza kuzwa kwa katala, kuzwa kwa katala, ni kubulela kuli, “Ki tumelo ye fitelezi. Muinele kwahule ni yona!” Ka kueza cwalo, ba kokotela Jesu Kreste ka silimo sa 1963, mi bana ni mulatu sina batu bani ka . . . lizazi lani. Yeo ki pulelo yemaswe, kono ki niti. Fa . . . Ona cwalo kona mo ba ezeza kacenu.

¹¹⁹ Mi fa mayemo aa, fa mayemo za ku takisa Kreste, fa mayemo a kunga Linzwi ni ku Li isa kwahule ni sicaba; kona luli ze ne basweli kueza kwani. Lona Linzwi luli leo Mulimu na bonisa ka Mwana Hae Tota, ku bonisa kuli Nekuli cwalo, mi Yena yene ba ipapata kuli ne ba lata, yena Jehova yana iponahaza Iliyena ka Mañolo, a eza ona cwalo sa Na bulela kuli Uka si eza, ona seo luli sa na bulezi Mulimu kuli Uka si eza, ni ku Si monya fapila

bona. Kakuli lilato la batu ba likeleke ze bona, ni lika ze cwalo, ba bulaya Mulena wa Bupilo.

¹²⁰ Mi Ni nyaza sikwata se si swana kacenu, ni ku ba fa mulatu, bana ni mulatu fapila Mulimu, ka Linzwi la Mulimu, kuli basweli kueza nto yeswana. Lusika lo lu omanyizwe kale. Muhupule Maheberu 13:8, “Yena wa swana maabani, kacenu, ni kuyakuile.”

¹²¹ Ne ba Mu holofalize cwani? Bakeñisa kuli lituto za bona za litumelo ne li sa Mu amuheli, mi mwatasi a lipilu za bona ne ba ziba shutano. Kana Nekudema, mwa kauhanyo ya 3 ya Muhalalehi Joani, na si ka libulela hande nji? “Muluti, luna, Bafarisi,” bakutazi, baluti, “lu ziba kuli U muluti ya lumilwe ki Mulimu, kakuli hakuna mutu ya kona kueza lika Zo eza konji haiba Mulimu u ku yena.” Mwabona? Ne ba li paka hande ka alimuñwi wa baana ba libubo la bona, ni kukaana . . . bakeñisa lituto zabona, ba kokotela Kreste.

¹²² Mi kacenu hakuna mubali ya sa koni kubala Likezo 2:38 mo Ni kona ku I balela, ni zeñwi za Yona, ka kuswana fela mo Ni kona ku I balela. Kono bakeñis lituto zabona za litumelo, mi bakeñisa matikiti abona a likopano oba nani mwa lipokoto zabona, linombolo za sibatana ze balwezi kaufela ko baya ni makadi a tutengo twa; mi ka kunga lika zeo, ba i kokotelela sinca Jesu Kreste, ni ku Mu takisa fapila babañata, ni kunyefula Mulimu ya swana yana sepisize kueza Se, kutisa sinyeho fa batu.

¹²³ Cwale, kwani, “bona,” isiñi muezalibi. “Bona,” yani ki, keleke ya lizazi lani, ne ba fumani mulatu ni Mutu Yanali yena Linzwi. Kana ku cwalo? Ne ba fumani mulatu ni Mutu Yanali yena Linzwi. Cwale ba fumana mulatu ni Linzwi le li beleka ku mutu. Mwabona, ba li shutanisa fela. Mane, ku mutu, Yo, Moya o Kenile u beleka ku yena, kona ponahazo ya Mulimu.

¹²⁴ Ne ba zibile cwani kuli Nali yena Kreste? Kakuli misebezi ya Hae ne i paka sa Nali sona. Ki hali, “Ki mañi ku mina ya ka ni bonisa kuli Ni na ni sibi? Haiba ha Ni si ka eza fela ona cwalo sa bulezi Mañolo kuli Ni ka eza! Mi ki . . . Yomuñwi a Ni bulelele fo Ni fosa, haiba ha Ni si ka bonisa sisupo kaufela sa kuli ki Na Mesia, kuli Kina Ya swana yo no sepisize.”

Bali, se bali, “Kihande, luna ni Mushe. Lu lumela ku Mushe.”

¹²⁵ Ali, “Kambe mu lumezi Mushe, ne mu ka Ni lumela. Haiba mina . . . Mushe na boni lizazi la Ka mi a lakaza ku—ku pila mwa lizazi le. Mushe na bonezi fahule, ni bapolofita. Mi ki fo he cwale, mupila bukaufi ni Lona, ni kulinyaza.” Ali, “Mina baipei,” ali, “mwakona kulemuha sisupo sa lihalimu, kono hamukoni kulemuha sisupo sa nako.”

¹²⁶ Ki zeo foo, sisupo sa nako. Ne si Mu beile mwa sibaka se si cwani? “Mufitelezi wa tumelo, mutu ya takani.” Eehe, ba fumana mafosisa ku Mutu Yanali yena Linzwi.

¹²⁷ Nali yena Linzwi. Muhalalehi Joani, kauhanyo ya 1, ya paka cwalo, “Kwa simuluhu ne kuna ni Linzwi, mi Linzwi nali ku Mulimu. Mi Linzwi a ezwa nama, mi a to yaha ku luna.” Nali Linzwi la Mulimu lelipila, kakuli Na bonisa Mulimu ku yena Kasibili. Na ipile ka kutala luli kwa—kwa Linzwi la Mulimu, kufitela Yena ni Linzwi li ba ze yeswana. Mi ona seo kona se ilukela kuba Keleke kacenu, kuli Linzwi la Mulimu ki le liswana.

¹²⁸ Kana ukona kuba cwani siemba sa Linzwi lani kanti u latula lika kaufela za Lona? Mi libaka le si ezizwe, ha ki kuli sicaba; kona libaka ha Ni nahana kuli Mulimu na bulezi ku na ka kubiza sicaba sa Hae kuli “Maricky” ni “Maricketta.” Ki bakeñisa ona likopano za buitati ze, bana ni sicaba se si pila kwande kwani ka mo ba pilela ka yona. Ba takisize Niti. Mi sicaba sa I biza bunyefuli, mi ba I eza kuba bunyefuli, nitaluse. Ba Li biza bufitelezi bwa tumelo, ni zeñwi cwalo, mi ba sa zibi kuli basweli kunyefula yena Mulimu yaswana yo ba yelanga kwa keleke ku yo sebeleza.

¹²⁹ Kabakaleo, Ni fa mulatu sikwata sa baituti ba sa bulapeli se kacenu. Ni fa mulatu lusika lo, ka Libizo la Jesu Kreste, ka mata a Linzwi la Mulimu. Musweli mwa Mu takisa hape.

¹³⁰ Mulemuhe, “Yena wa swana maabani, kacenu, ni kuyakuile,” Linzwi la Mulimu li pakilwe ku mutu.

¹³¹ Mubapise ma Kalvari amabeli ni litaba za ona. Muhupule, “Kakuli Na ikezize Iliyena kuba Mulimu, haluna kulumela kuli Muuna yo alu buse.” Neli taba mañi ye ne ba fumani, mwa kuta kakusasana wani, ha ba takisa Jesu? Kuli, “Na ikeza Kuba Mulimu.” Na li Mulimu. “Mi Na tula mulao wa Sabata.” Kanti Na li yerna Muña Sabata. Ne ba Mu nyaza bakeñisa kuli Na Ikeza sina Mulimu. “Hauna tukelo ya kueza se. Hauna tukelo. Baprisita ba luna babatuna, haiba ku na ni se si lukela kutaha, si na ni kutaha ka baprisita baluna.” Cwale mubapise seo ni Kalvari kacenu.

¹³² Fani, Mulimu, ne si tabisize Ndate hahulu, Mulimu, ona Moya, kuli a zuse Mwana Hae Tota; a apesa Maria, ka Moya o Kenile, mi atisa mubili ono ka Mu sebeleza ni kubeleka mulelo wa Hae ku Yena. “Mulimu nali ku Kreste, mutalelela wa toho ya Bumulimu ka mubili, ku Yena,” ku bonisa seo Mulimu nali sona, kwa sicaba, kutuhela kuli—kuli lifasi kaufela lizibe seo Mulimu na bata kuli mutu kaufela abe sona: mwana mushimani, ni mwana musizana. Anga Muuna alimuñwi ni ku li cwalo. Mi bakeñisa kuli Na sa kopani ni ba litulo za kopano, ba Mu nyaza ni ku Mu kokotela.

¹³³ Cwale mubapise Kalvari yani ni kacenu. [Hakuna manzwi fa tepu—Mu.] Bakeñisa ku akaleza fela, bakeñisa ku sa izeza ngana kwa baituti baba lukela kuziba Linzwi la Mulimu ni mulelo wateni; bakeñisa se, Mulimu wakona kunga sikwata nyana sa

batu seo Akona kubeleka ku sona, kokuñwi, ni kuiponahaza Iliyena, ya ka ikokobeza ili yena kwa Linzwi. Mi hakoni kubulela kuli ha ku cwalo.

¹³⁴ Ne ba si ke ba bulela kuli Na si ka eza cwalo, kakuli kopano ya bona ne ili paka. Ne li li fapila bona. Ne ba sa li latuli. Ne ba sa latuli mubulelelo wa Hae, kakuli, lona Linzwi luli lene ba bulela kuli ne ba lumela, neli Lona lene Li paka kuli Nali cwalo. Kakuli, Mulimu na ngile Linzwi le ne li lukela kuba Mesia ni ku Li bonisa kufitela ku Mutu, mi nebana ni ku Mu bulaya. Kona fela nzila inosi yene bakona kuya ka yona, neli kubulaya Mesia. Mi ba lieza ka bubofu ni kusa ziba, hakuna taba ka mo ba itutezi. Nebali baba butali, baba talifile; kubulela ka lifasi.

¹³⁵ Sina hane lu bapanyize busihu bobuñwi, fani Liseli ha li to monyeha ku mucaha wa mufumi, mutalime sa na ezize. Na hanile; muuna ya butali. Paulusi, muuna yomuñwi ya butali, Liseli la mu monyeha. Ki sikamañi sa na ezize? Na Li amuhezi. A libala, kaufela za na ziba, kuli akone kuziba Kreste. Sani ne si ezize bupilo bwa hae kuba bwa bo bu swanela Evangeli. (Liñusa la Sunda yefelile busihu.)

¹³⁶ Ki Sani fani kacenu. Si taha mwendi ku mutu yomuñwi yomunyinyani, ya zwile kwateni, nana ni pizo ya Mulimu, ka mwa na utwezi, yaile kwasikolo sesiñwi sa bulapeli ni kuituta lituta zeñwi za litumelo. U swanela kupila ka lituto za litumelo zeo kamba aitobohe kadi ya hae ya kopano. Haiba aeza cwalo, u swaiwa ka swayo yensu, hakuna ya ka itakaleza kuba ni yena, kakuli sapili na fumaneha kusili mo cwale ha sa li wa kwani. Ba sa lemuhla fela kuli kuna ni sesi fosahalile ni muuna yani, kipeto ha bana kuba ni yena mwa kopano yabona. Mi, kopano ibata fela sisupo silisiñwi, seo kikuli, haiba ulumela ze ba lumela.

¹³⁷ Haiba una ni kadi, haiba ki wa Methodist, haiba una ni kadi . . . ki wa kopano isili, kamba waba Oneness, kamba waba Trinitarian, kamba kaufela s'a kona kuba sona, keleke ya Mulimu, kamba mwa litulo za Mapentekota, ni likwata zani kaufela. Haiba u ba kadi, uka ikutwa kuli nkambe yetuna i mu tatubile, ni kulika booko bwa hae, ni ku mufa tatubo ya bakuli ba mwa toho, ni kubona haiba I.Q. ya hae ipahami luli mi ki ya kwanisa kubulela fapila bona. Haiba ha ana, ba ka mu hana. Yeo ki niti.

¹³⁸ Kono, mwa bona, kopano ilukela kotalima lizoho la Mulena, kuina haiba Mulimu u mufile mayemo a hae kamba nee. Kona se lu swanela kotalimanga seo. Kono kacenu ba kokotela yena—yena—yena Mwana Mulimu sinca. Mi, mutu wa kona, ka sishemo sa Mulimu, kubizwa ki Mulimu, kulumeleza Mulimu ku iponahaza Iliyena ku yena. “Misebezi ye Ni eza mu ka ieza ni mina,” Na ize. Mulemuhe mufuta wa lizazi le lupila ku lona!

¹³⁹ Bona, ba nga, ba—ba nganga ona—ona Kalvari luli, lwa kona kakusasana cwana, ni libaka luli. Cwale, ne ba ziba kuli yani

neli Niti; kono bakeñisa lifufa, la ketululo. Ki sikamañi sa na ba bulelezi Jesu? “Haiba Ni leleka mioya yemaswe ka munwana wa Mulimu, konakuli mina—mina mu i leleka ka sikamañi? Yo abe muatuli wa mina, mwabon, haiba Na ni leleka mioya yemaswe ka munwana wa Mulimu.”

140 Cwale, inge fela mo ne mu ba utwela ha ba bulela kuli, “Kana wakona kupaka kuli ki munwana wa Mulimu?” Ni tabela kubona, Ni tabela ku utwa puzo yani ye ne ba Mu buzize. Nebali baba butali hahulu ka seo.

141 Mulemuhe, “Kakuli Na ikezize Iliyena kuba Mulimu,” mi Nali Mulimu. “Mi haluna ku Mu tuhela kuli a lu buse.”

142 Kono cwale taba yateni, muhuwo o swana wa kale wa taha hape, “Bibele yani ne i ñozwi ki mutu,” ba bulela. “Halu lukeli kupila ka Sani.” Yani ki ya Mulimu. Lani ki Linzwi la Mulimu. Ki Mulimu, yena Kasibili.

Ne ni sweli kuambola ni mutu maabani, yanaize, “Kihande, ki mutu fela ya na ñozwi Bibele.”

Se nili, “Eeni, uteni ya na iñozwi. Libizo la Hae, lu Mu ziba ka kuba Mulimu.”

143 Ne i ñozwi ka sisiyananga lilimo zelikana fo sauzande mwahala yeñwi, ona Mañolo, kuzwa ku Jobo, kutaha musipili kaufela kwa Testamente ye Nca, mi ya ñola ka mianda ka—ka . . . ni mianda anda ya myaha fahali; mi i ñozwi ki baana ba ba shutana, mi mane ba sa zibani, mwa libaka ze shutana za naha, mi hakuna nihaiba Linzwi li liliñwi la Teni le li lwanisana ni leliñwi. Ni bata kuli mutu atahe mwatasa Mali a Jesu Kreste ni ku ikungela sepiso ifi kaufela Mwani! Mulimu utamehile ku Li tokomela.

144 Kono habana kueza cwalo. Ba ka taha, bali, “O Mulena, Ni bata kueza nto yeñwi. Uni fe mpo yetuna. Haleluya, Mulena! Kanya ku Mulimu, Ni lumela kuli Ni na ni yona. Haleluya!” Halina kubeleka. Mwakona kutisa ngana yeñata hahulu, kono halina kubeleka.

145 Mulimu una ni kulemuha kubaka kwani. Mulimu una ni kueza cwalo. Ne luka bulela zeñata mwa mukoloko wani, kono Ni sepa kuli mwa—mwa utwisisa.

146 Mutalime, kono cwale habana kuba ni Linzwi le li ba busa. Ni li, “Mañi ni mañi wa mina amu kute. Mu kolobelizwe ka mafosisa. Mu kolobelizwe mwa keleke ya Katolika.”

147 “Ki wena mañi kuli u lu bulelele zeo?” Ha ki na; ki Linzwi. “Kono Na ku bulelela, lwa—lwa lumela. . .” Hanina taba ka se mu lumela; ki se ibulela Bibele. “Kono ha lu lukeli kupila ka Seo.”

148 Ha u eza cwalo, u ba mwatasa katulo ya Bibele ye. Kakuli, “Yo kaufela yaka zusa Linzwi lililiñwi ku Lona, kamba ku ekeza leliñwi ku Lona, ze swana li ka zwiswa kwateni, kwa siemba

sa hae, sa mwa Buka ya Bupilo,” abe mukutazi, mutu wa za bulapeli, kamba yo kaufela ali yena. Mu lukela kutaha mwatasa zamaiso ya Linzwi le, kakuli Ki Mulimu. Bibebe ibulela kuli Ki Mulimu.

149 “Haluna ku lumela kuli I lubuse.” Ba ikungela lituto zabona za litumelo, ni likopano, ni lika zabona—zabona zenyinyani ze balumela kuzona, mi se liamuhezwi ki tutengo twa batu, ni ku li amuhela mwa sibaka sa Linzwi la Mulimu.

150 Ki sikamañi sene ba ezize? Neba ngile Barabasi, yena sibulai, kufita kunga Mwana Mulimu, ka lizazi la sifapahano sa pili.

151 Mi kacenu banga linzwi la mutu, ili buhata ni nzila ya lifu, ni kuhana kunga nzila ya Bupilo, Linzwi la Mulimu. Ni kalimela lusika lo, ku lu fa mulatu, ka Linzwi la Mulena, kuli ba fosa. Bana ni mulatu wa ku takisa, kamba kulika ku kokotela Moya.

152 Ba biza ancafazo, kai ni kai. Kana mu ka ba cwani ni ancafazo kanti Linzwi Kasibili halikoni kubeleka mwahala sicaba? Ni tabela kuli yomuñwi a ni alabe. Likona kuba cwani, kanti mu latula Ancafazo Luli? Kihande kana mupolofita na bulezi ka yona, “mifuta ya bulapeli.” Mikwa ya bona luli, kwa mulaho kwani, ne ba latula Linzwi la Bupilo. Mikwa ya bona, kacenu, i latula lika ze kona kubatiseza ancafazo; lituto za litumelo za bona ni mikwa. Eeni, sha.

153 Banga kopano ni lituto za litumelo za bona mwa sibaka sa—sa Linzwi, mi sani sa kokotela Linzwi la Hae ni kutokwisa Linzwi la Hae mata kwa sicaba. Ha ba bona Linzwi la Mulimu ka swanelo ni ku ikopanya fela Ili lona, kuli Mulimu na file sepiso ya kuli Uka eza se, mi fa Usweli wa eza cwalo, mi ba Li seha ni kuba kwahule ni Lona, ki bunyefuli. Mi balika ku kokotela Linzwi Kasibili.

154 Ki kabakalañi haba Li kokotela? Ha ba koni ku kokotela Linzwi kusina ku kokotela Mulimu. Ne ba ka kokotezi mubili o no lwezi Mulimu, Mwana Mulimu. Ne ba kokotezi sani, kono ha ba koni ku kotela Mulimu. Nana ni kuba cwalo, ka nako yani, bakeñisa kuba Sitabelo, kutisa bana babañata baba lelezwi kwa Bupilo Bobusafeli. Neba na ni kueza cwalo ka nako yani, kono haba koni kueza sani cwale. Habakoni kueza cwalo, kakuli Linzwi Kasibili likana lipila. Kono bona . . .

155 “Ki sikamañi se ba eza? Kana ba cwani? Ki sikamañi so bulela he, mukutazi? U yaha cwani katala fa, kuli ba Mu kokotele, kanti?”

156 Basweli ku takisa mata a Evangeli fa sicaba, ka lituto za litumelo za bona. Sani kona sifapahano. Ona mo kufumaneha sicaba mwa libaka za kubatiseza litupu zetuna, ze bizwa likeleke, likopano, ni kulala mululwani wa lituto za litumelo, mi sani ne si na ni . . . Linzwi la Mulimu halikoni kuba ni mata fahalimwa bona, kakuli ba—ba nyaza lika luli zeo Kreste na

bulezi kuli lika ezahala. Fela ha li tahi kuya ka lituto za litumelo za bona.

157 Mi mane neba Jesu na si ka taha ka kutwisiso bona ku ya ka mwa Na ka tela. Na tile ka nzila yana Mu lumile Mulimu, mi Na tile ka swanelo ni Linzwi. Ki kabakaleo Na bulezi kuli Na “Li patezi meto a baba butali ni ba ngana, ni ku Li patululela kwa banana ba bakona kuituta.” Kana mwa utwisisa?

158 Oh, ba kokotezi mubelekelo o mata wa Linzwi. Nina ni sishañata sa Mañolo fa. Ni kona fela kubulela amabeli kamba amalalu a ona. Ba Li kokotela.

Mu li, “Kana ba kokotela cwani Linzwi?”

159 Fani Jesu na bulezi kuli Yena wa swana maabani, kacenu, ni kuyakuile, Maheberu 13:8; ba li, “Ka mukwa o cwalo Ki mwa inezi.” Mwabona? Ku lukile.

160 Mi Jesu ali, mulao wa Hae wa mafelelezo kwa Keleke, “Muye mwa lifasi kaufela,” Mareka 16, “muye cwale mwa lifasi kaufela, mi mu kutaze Evangeli. Lisupo ze li ka latelela baba lumela. Lifasi kaufela; kwa sibupiwa kaufela!” Mi ha li si ka fita kale mane neba fahali. Mi kuna ni ma milioni a shwa, mwaha ni mwaha, ha si ka utwa fateni neba Libizo la Jesu. Kacwalo, isali litaelo ze zibahala. Isali taelo ya Mulimu. “Lifasi kaufela, ni ku kutaza Evangeli kwa sibupiwa kaufela. Ya lumela mi akolobezwa ukapiliswa; yasike kulumela ukabeiwa mulatu. Mi lisupo ze li ka latelela baba lumela: Ka Libizo la Ka ba ka leleka mioya; ba ka bulela ka lipuo lisili; ha ba ka swala linoha, kamba kunwa lifanu, halina ku ba tiseza kozi; Ha ba ka beya mazoho a bona fa bakuli, bao ba ka foliswa.”

161 Mi ba li, “Zani neli za lusika *lwani*,” mi ba fa taelo ya Mulimu kuba ye sina mata ku Se, mi ba kokotela mata a Linzwi kwa sicaba. Amen.

162 Pitrosi naize, ka Lizazi la Pentekota, ana ni linotolo za Mubuso; za na sa mufile fela Jesu, “Kaufela so ka bulela fa, Ni ka si bulela kwahalimu Kwani.”

163 Mi ka Lizazi la Pentekota ba buza ze ne ba ka eza kuli ba amuhele Moya o Kenile, kuli ne ba ikona Ona hahulu; inge ba talima babañwi baeza ze ne ba ka biza bukuba; kutantalika, ni kutulaka, ni kuwa, ni kueza inge kuli ba kozwi.

Mi bona, bali, “Baana ba bakozwi veine yenca.”

164 Kono nekuna ni muuna yana yemi, wa libizo la Pitrosi, yana nani linotolo za Mubuso, mi ali, “Ba ha ba si ka kolwa,” Likezo 2, “mo mu hupulela, kakuli isali hola ya bulalu mwa musihali. Kono se kona se ne si bulezwi.” Mwabona, kukutela kwa Linzwi hape, kubonisa kuli Moya u sa li Linzwi, mi Linzwi li sa li Moya, ili Linzwi la Mulimu. “Mi ku ka ezahala, sina mo ku bulelezwi ki mupolofita Joele, Joele 2:38. ‘Ku ka to ezahala mwa

mazazi a maungulo, kubulela Mulimu, Ni ka sulula Moya wa Ka fahalimwa libupiwa kaufela.”

¹⁶⁵ Muteeleze mupolofita yani ya yemi fani. Amu mu talime, asa sabi, inza yemi fahalimwa sikwata sani, ni ku ba nyaza, aba fa mulatu. Ali, “Le ki Liño! Se kona se ne si bulezwi ki mupolofita! ‘Ni ka sulula Moya wa Ka fahalimwa libupiwa kaufela. Bana ba mina ba bashimani ni basizana ba ka polofita. Fa batanga ba Ka ba baana ni ba basali Ni ka sulula Moya wa Ka; mi Ni ka tahisa limakazo mwa lihalimu, ni mwa lifasi; ni mulilo, ni musu, o bonahala inge tukundukundu.” Ku Li bonahalisa ka Linzwi, kuli Neli Linzwi.

¹⁶⁶ Mi ba seha ni ku Li bona bukuba, mi ba ya kwa katulo. Mi munzi wa cisiwa, mi ba ca bana ba bona. Mi kacenu ki sicaba se si hasanezi mwa lifasi kaufela, ku bonisa Moya o Kenile u sa li yena Linzwi la Mulimu, le litisa Linzwi le ku ba le Li pila.

¹⁶⁷ Jesu Krete nali Mutu, Mutu, Mulimu. Haleluya. Nali ponahazo ya Mulimu. Nali Mulimu mwa mubili, kuli abonahalise Linzwi la Mulimu la lusika lwani, kuli lusika lwani lubone sepiso ya Mulimu ya lusika lwateni.

¹⁶⁸ Mi Moya o Kenile ki nto yeswana ni kacenu. Ki Moya wa Mulimu fa Linzwi leli ñozwi, kulika kufumana mutu ya ka iponahaza Iliyena kwa lusika lo, ili kupaka kuli Wa swana maabani, kacenu, ni kuyakuile. Muñoli Joani 14:12, “Misebezi ye Ni eza muka ieza ni mina.” “Jesu Krete ki ya swana maabani, kacenu, ni kuyakuile.” Mwabona, ka tundamo kulika kufumana nzila ya Lona kuli i Iponahaze kasibili.

¹⁶⁹ Mi ne ba si ka li eza. Batu ne ba hupula hahulu likopano za bona, liyaletlo zazona zene banani, ni zeñwi cwalo, zebizwa “likeleke,” kuli basike ba li teezeza. Kona mo ba sa ezeza ni kacenu, nto yeswana, ku kokotelela sinca.

¹⁷⁰ Pitrosi, ka Lizazi la Pentekota, na ize, “Mina baana baba pila mwa Jerusalem, mwa Judea, muteeleze kwa manzwi aka. Ba ha ba si ka kolwa. Haiba mukona kuyema mukuzize, Ni ka mi bonisa seo sili sona.” Mi uzwelapili ku ba taluseza.

¹⁷¹ Lipilu za bona ha ne li tezi, ba si no uwa Cwalo, bali, “Ki sikamañi se lukona kueza kuli lupiliswe? Ki sikamañi se lukona kueza kuli lu amuhele Se? Lwa kolwa kuli linzwi la hao li lukile.”

¹⁷² Mi ali, “Mubake, mañi ni mañi wa mina, mi mukolobezwe ka Libizo la Jesu Krete kwa swalelo ya libi za mina, mi mu ka amuhela mpo ya Moya o Kenile. Kakuli se ki sa mina ni bana ba mina, babali kwahule, mane ni babañata be Mulena Mulimu wa luna uka biza. Se kona se ba lukela kueza. Kubaka, ni ku kolobezwa ka Libizo la Jesu Krete.”

¹⁷³ Mi, kacenu, keleke ya Katolika ya Roma ili añuzi, “Ndate, Mwana, Moya o Kenile,” kunga sibaka sa Sani. Mwa sibaka sa Zeo, ki mulalelo. “Labula lulimi u amuhele silaalu, mi muprisita

unwa veine, mi mu ba hamoho.” Ki “mulalelo,” mwa sibaka sa kuba Moya o Kenile, u bizwa, “Silalu se si kenile.” Mi ni “Ndate, Mwana, Moya o Kenile,” kolobezo ya silaalu, kanti mane ha i si ka bulelwa mwa Bibe. Libizo la Ndate, Mwana, Moya o Kenile ki yena Mulena Jesu Kreste. Mi ha mu bonisa zeo kwa lusika lo lu sitani loo . . .

¹⁷⁴ Sina Pitrosi hana ize, “Mu ipabalele kwa mushobo o sitani woo.”

¹⁷⁵ Ha u ba bonisa Zona, ki sikamañi se ba eza? Ba ka Li keshebisa, ni kubulela kuli, “Keleke ya luna ha iluti litaba Zeo ka nzila yani.” Kona kuli una ni mulatu, una ni mulatu wa ku takisa kwa Jesu Kreste, ka kunga mata a Mulimu kuzwa mwa sicaba. U takisa Linzwi sakata ku bona, mi u ipa mulatu ili wena kwa kopano ya henu, u ba kenya mwa katwa ka lifu.

¹⁷⁶ Sina hane Ni bulezi ka mukutazi yani la Sunda yefelile, neli Martin Luther King kwani ni sicaba sesinde sani, ku ba kenya mwa kalaba ka lifu. Oh, haiba mutu na ka bulela fela ni muuna yani! Kambe Ne ni ka kona. Ka musunga nyana fela wa taba ya sikolo, mwabona, kamba zeñwi . . . Ki shutano mañi? Mawi, kibumai! Haiba sicaba hasina pilu sakata ya kufumaneha ni mutu bakeñisa mubala wa hae, ba nyazizwe mi ba shwa, ni hakuli cwalo. Naha ya ba fa tukelo. Musike mwa li lwanisa. Musike. Kucwani haba mutu na ka li ba Irish kaufela kamba mutu yomuñwi, ma German kaufela, kamba yomuñwi fela, ulukela ku ketululwa? Sani ne si sike sa bilaeza Bakreste. Ne ba ka zwelapili cwalo. Mi muuna yani ki Mukreste. Kakuba—kakuba mukutazi, ha lukeli ku isa sicaba sani kukena mwa sibaka musnga. Li ka tiseleza lifu la bo lululule. Li ka kalisa cinceho yeñwi. Mi ki maswabisa ha ba eza cwalo.

¹⁷⁷ Taba yeswana ya ezahala ona fa, ki nto yeswana hape. Yeo ki niti. Mwabona? Sicaba, kuli kambe ne ba ka talima fela fa Niti ni kubona seo Niti ili sona. “Keleke ya luna ha ilumeli cwalo. Luna ni nzila yeñwi.” Kihande, ha ki yona nzila ye lukile. Ha ki yona taba.

¹⁷⁸ Na ize, “Mubake, mi mu kolobezwe ka Libizo la Jesu Kreste kwa swalelo ya libi.” Cwale habana kueza cwalo. Oh, cwale ki sikamañi se ne ba ezize? Cwale yeo ki nto iliñwi fela, fa mianda anda. Lu ka fita ku zona, mwendi, kapili mo lu konela.

¹⁷⁹ Cwale ku kokotelwa kwa bubeli, kanti. Haiba mutu u amuhela “Ndate, Mwana, ni Moya o Kenile,” tu—tu tuto ya tumelo mwa sibaka sa Linzwi, malumbatina mwa sibaka sa Libizo, ki sikamañi sa eza kwa sicaba? U takisa mata a Linzwi kwa sicaba, ha bulela, kuli, “Mareka 16 neli fela kwa lusika *lwani*.”

¹⁸⁰ Mi Mulimu nabulela, Yena kasibili fani, Jesu inza ambola ni bona, ali, “Muye cwale mwa lifasi kaufela, mi mukutaze Evangeli kwa sibupiwa kaufela. Ya lumela mi akolobezwa u

kapiliswa; yasike kulumela u kabeiwa mulatu. Mi lisupo ze li ka ya ni ba . . .” Kuisa kai? Naha kaufela, tuto ya tumelo kaufela, lulimi kaufela, lusika kaufela, batu kaufela, yona Evangeli ye swana. “Mi lisupo ze li ka ya ni ba ba balumela.” Mi mutu ha lika kupuma Sani mwa Bibebe, u takisa mata a Evangeli kwa kopano yani. Kacwalo Na mi fa mulatu, ka Libizo la Jesu Krete! Muna ni mulatu wa kubulaya Mulena!

¹⁸¹ Keleke ne i Mutoile. Kiñi? Nali yena Mulimu wa bona luli. Ne ba Mu toile, ni ku Mu latula kuba Mesia wa bona. Batili, sha, ne ba sa lati Mesia ya cwalo.

¹⁸² Mi kacenu keleke ieza lika zeswana. I latula Linzwi. Ha ba Li lati. Li lwanisana ni ze ba lutilwe ku lumela ka lituto za litumelo za bona.

¹⁸³ Mi Linzwi ki yena Mesia. Mwa lumela cwalo? Kihande, ponahazo ya Linzwi kona kuli ki sikamañi? Ki ku bonahalisa Mesia, ili ona Moya o Kenile mwahala luna. U sweli ku iponahaza Iliyena, kulika cwalo, kaufela Kwa kona kufumana lambi Ya kona kutalima ku yona, ye si na masila a musili wa lituto za litumelo ni lika zeñwi, Ikona kufa Liseli hande.

¹⁸⁴ Muhupule, “ne ba zuhile ni kutukisa lilambi za bona,” ni kutapisa mingomo ya musu, kono nako se ifelile. Kacwalo mutu ha bona ba Lutheran bani, ba Presbyterian, ba Methodist, balika kutaha mwa mazazi a maungulo a ku to amuhela Moya o Kenile, kiñi, mwa ziba kuli ha ba U amuheli. Kihande, bakona kubulela ka malimi ni kutulaka tulaka, kono mutalime se si ezahala. Bona kaniti . . . Ki sisupo sa nako ya maungulo. Lu kwa mafelelezo.

¹⁸⁵ Ka nako kaufela, ba—ba Keleke bakona ku utwa butata, ya kuli, “Taha kwa Lihalimu!” Amen.

¹⁸⁶ Zetokwahala feela ki kuba mwa sikuka. Moya o Kenile fa u eza Jesu Krete kuba wa niti mwahala lika zeo Akona kubeleka ka zona, inza iponahaza Iliyena; ataha fafasi, a swanisiwa siswaniso sa Hae, ku si bonisa, kuli sayansi ikone ku si swanisa, kubulela ka sona, ni lika zeñwi kaufela, kubonisa handende sa Na bulezi kuli Uka eza. Kueza lika luli za Na bulezi kuli Uka eza, ka Mañolo. Cwale, isiñi tuto yeñwi ya tumelo, kamba muhupulo fela wa ikupulezi mutu, mali amañata, mulilo, ni musu, ni lika zeñwi; kwanda bupaki bwa Mesia bwa Mañolo. Bana ni malikanyiso amañata, ni balikanyisi, ni—ni zeñwi cwalo; kono seo fela si eza Linzwi la niti ku monyeha ka bukwalu bwa Lona, yani ki niti, lu lumeleze batu kuba ba moya, baba kona ku atula mwahala bunde ni bumaswe. Mwabona?

¹⁸⁷ Ba Mu latula! Ba latula Mesia wa bona, “Ne lu sa Mu lati.” Mi taba yeswana ki ye ba eza ni kacenu, “Kihande, kambe Ne ni kaya kwani ni yo eza inge sikwata sani, Ha ni Si lati ni hanyinyani.” Ku lukile, kona kuli hamuna Sona, ni hanyinyani. Ku felile. Mwabona? Ki nto yeswana ni cwale.

188 Ni ha Na zibahalizwe hande, ne ba sa Mu lati. Ne ba Mu toile. Neli sikamañi sani? Lu biza balisana ba bona kuba sishañata sa “linoha.” Mi ali, “Mina sikwata sa mamota a basizwe busweu. Ha mu sesiñwi kwanda kuba mabita. Za kwande za mina ki batu baba itutile hahulu ni mikanjo ni makola a fetukile, mi za mwahali kuna ni masapo a batu baba shwile.” Na si ka nyanyabeka. Mugalilea alimuñwi yomunyinya, mwana mubeti, kono Na si ka keshebisa nihaiba hanyinyani. Na ba bulelezi.

189 “Musike mwa nahana,” Joani naize, mutwaleti wa Hae, naize. . . Ki usili ya na si ka keshebisa nihaiba hanyinyani. Ki hali, “Musike mwa taha kwanu ni ku bulela mo mu bezi ni Abrahamama kuli ki ndata luna. Mulimu wakona kuzusa bana ba Abrahamama ka ona macwe aa.” Eeni, sha. “Silepe se si yendekilwe kwa mubisi wa kota, mi kota kaufela ye sa beyi miselo ika kumulwa ni ku nepelwa mwa mulilo.” Eeni, sha. Mulimu ha keshebisi, ha bondololwi mi u buhali ka Linzwi la Hae. Eeni, sha.

190 Mulemuhe, Jesu, na pakile ka Mañolo! Kana mwa ni utwa? [Kopano ili, “Amen.”—Mu.] Jesu na zibahalizwe ki Mulimu, ka Mañolo, kuli Nali yena Mesia. Kana ku cwalo? Lu ka fita fa kufa mulatu kwa Pitrosi, mwa mizuzu yelikani, mi mu ka fumana haiba neli cwalo kamba nee. Na zibahalizwe handende, kuli Nali yena Mulimu ya bonahalile ku Mutu, ya bizwa Mwana Mulimu. Yeo ki niti. Nihaike, Na zibahalizwe hande ni kupakiwa ki Linzwi la sepiso, kuli Nali yena Mesia. Mushe ali, “Mesia yo, ha Ka taha, Ukaba mupolofita,” mi lika ze kaufela li ka ezahala.

191 Musali yomunyinyani mi. . . inza yemi fa lisima, ni buino bwa masila bwani kaufela za nali sona, sani ne si talusa sikamañi? Kuli Mulimu mwa mazazi a maungulo aa uka biza bayambaeli.

192 Muhupule maabani busihu, kwa sinawenga. . . Kamba, nako yeñwi ha Ni kutaza kwanu. Kwa mulalelo wa sinawenga, ne ba bulezi mo ne ba bulelezi. “Ni ezize mukiti omutuna, ni zeñwi cwalo. Mi baana ba kaufela, Ni ba kupile, mi mañi ni mañi nana ni buinyazo. ‘Ha ni koni kutaha, kakuli ne li ka sinya lituto za litumelo. Hani koni kutaha, kakuli Ni na ni. . . Kona ni sa zo nyala; musala ka ha na ku ni lumeleza kutaha. Mawi, Ni—Ni nyezwi kwa keleke kwanu. Boma neli ba Methodist, kamba ba Baptist, kamba ba Katolika, kamba Muip—. . . Hani koni fela kuyemela Zani.’”

193 Mi ali, “Mi ha mu na kutaha. Mi ha muna ku to tamuna kwa mulalelo wa Ka! Kono zwela kwani u bize mahule ni baitamaeli, ni macakolwa, ni kaufela bo kafumana. U ba tise, mi Ni ka ba beya hande. Ni lukisize mulalelo wa Ka, mi ni Bona—Bona baenyi ka. . . Tafule yaka i lukisizwe, mi ku kaba mutu fani.” Ne ba si ka taha. Na sweli ku ba nyaza Majuda bani.

194 Kucwani he kacenu? “Ni—Ni—Ni wa Presbyterian. Ha—Ha ni koni. Ni wa Methodist, Lutheran. Ni wa oneness. Ni wa twoness.

Ni wa se. Hani koni. Hani koni.” Ki fo he cwale. Hauna kubatani kwani kanti! Ona cwalo kona mwa Na bulelezi. Ku lukile.

¹⁹⁵ Ka kupakiwa ka swanelo, ki Mesia. Kupakiwa ka swanelo, Linzwi, lona Linzwi le li sepisizwe. Yena Mulimu yana sepisize Linzwi, kuli se kona sa ka ba sona Mesia, ki yo Ataha mi ayema ka swanelo. Ali ku bona, “Cwale, Ni palezwi kai? Haiba ha mu Ni lumeli ka kuba Mutu, mulumele misebezi ye Ni eza; kakuli ki lika ze bulelela yo Nili Yena. Ki yona ye bulela kuli ki Na Mesia. Ha mu lati ku Ni lumela, kakuli mu nahana za Josefa kulo kwani. . . . Mi Ne ni pepezwi kwani mwa katungu nyana, mi—mi Bondate ba mutose ki ba ki—ki babeti kulo kwani. Mi—mi mina. . . .”

¹⁹⁶ Ha Na tile kwa Galilea kwani, bona, mi ne ba ka eza. . . . Ki hali, “Yela, Mutangana yo ki mañi? Ki mañi Yo? Kihande, Muuna yo, nji cwani. . . . Kana Ha kikuli Josefi ni mizwale ba Hae kaufela bateni kwanu? Kana likezeli za Hae haliyo ni luna? Hanili Mahe ki Maria, mi Ndatahe ki Josefa? Kanti, ki kai ko mu zusize Mutangana ya cwalo? Ki sikolo mañi Kwa zwelela? Haana kadi ya kopano. Yena, Haana mapepa a mupaka. Kanti Mutangana ya cwana yo. . . . Mu mu ngile kai mutu ya cwana yo, kanti?”

¹⁹⁷ Mi Bibelet ibulela kuli Na fi—Na filikani. Ki hali. . . . Misebezi yemiñata Na si ka ieza; mi A sikuluha fela ni kuzwa ku bona. Ki hali, “Mupolofita ha kutekiwi haabo mwa sicaba sa habo, mwabona, mwa naha ya hae,” mutalime, “kamba naha ya hae tota.”

¹⁹⁸ Ki Yani fani, paki ye pakilwe hande, ki Mesia. Na si ka itumba ka butu bwa Hae. Na ize, “Hakuna se ni kona kueza kwanda se Ni bona Ndate a eza.” Mi A ba swabisa kuli ba buze haiba yani neli yena Mesia.

¹⁹⁹ Ni mutalime musali wa libubo leli maswe yani; na li zibile. Yena, na si ka apeswa ki lituto. Lambi ne si. . . . Na fosahalile ka muikutekelo, eeni sha. Hakuna mutu ya na ka lumeleza zani. Milao ya Mulimu i nyaza sani. Na fosa ka mukutekelo. Kono yena. . . .

²⁰⁰ Mwabona, Mulimu ha ku atuli ka. . . . soli sona. Wa ikola. . . . Ha atuli butuna bwa hao kamba u yomunyinyani cwani. U atula pilu ya hao, so bata kuba sona.

²⁰¹ Mi na sa lati lika zani kaufela. Mi cwale Se ha si to utwahala fapila hae, Sani kona sa na bata. Hakuna taba kamba nali sikamañi ka nako yani, na itukisize kutaha. Mwabona? Mulimu u atula pilu. Mutu u atula mibonahalelo ya kwande. Mulimu utalima fa pilu. Hakuna taba kamba nali sikamañi; Liseli lani la monyeha, mi ani neli mafelelezo. Na amuhezi bu—bu—bu—butokwa bwa Bupilo Bobusafeli.

²⁰² Oh, mawi, se mo sibezi se, ku na, mwabona, kubona ni kuziba kuli ki Niti. Nika—Nika yema ka Se. Ni ka tuhela. . . . Mulimu wa Lihalimu uka zusa, mi linzwi la ka likaba fa tepu ya Mulimu yetuna kwabuse kwani, mi li ka atula lusika lo mwa lizazi la

maungulo. Kakuli, li fa ki—ki tepu ya silimba, mi likaba fa tepu ya Kuyakuile ka nako yeo. Yeo ki niti. Ni ku nyaza lusika lwa bakutazi lo luna ni mubonahalelo wa bulapeli, mi ba latula Mata a Linzwi ni ponahazo ya Yona kanti I pakilwe hande kuli U sa li Jesu Kreste, ya swana maabani, kacenu, ni kuyakuile. Na ba fa mulatu ka zona, ka Linzwi la Mulimu.

²⁰³ Ni lukela kuya kwa sepiso yeñwi, kapili, kakuli luna ni fela mizuzu ye lishumi ka ye ketalizoho.

²⁰⁴ “Kwani bona—bona kwani bona . . .” Sikamañi? Oh, mawi! Kalvari! Mi ba “Mu kokotela”, ka bulalu. Ne ba Mu kokotela, isiñi ka kulemuha Linzwi la Mulimu le li sepisizwe le li bonahalile. Mi kiñi ha ne ba kokotezi Muuna yani? Munahane fela? Mutuhele ni kutele fa muzuzu. Ki kabakalañi batu bani hane ba ka kokotela Muuna ya cwalo? Sina Maria . . .

²⁰⁵ Sina hane Ni balile buka nako yeñwi, yebizwa kuli *The Prince of the House of David*. Ne i ñozwi ki Ingraham, Dokota Ingraham. Buka yende! Ki papali, iswanela kuba ya niti neku leliñwi, ka libuka zeñwi za kale ze ne ngilwe ku musali yomuñwi ya bizwa Adina, kuli yena . . . Naile kwa Palestine, kuzwa—kuzwa kwani kwa Egypt, kwa Cairo, Ni lumela kuli neli cwali, kuli ayo feleleza litoto za hae. Mi nali teni ka nako ya—ya Kreste, mi na lukela kuñolela bo ndatahe. Ne kukaba hande hane mu ka i fumana ni ku ipalela yona. Ki, bunde luli, *The Prince of the House of David*. Yena muuna ya swana yana ñozi *The Pillar of Fire*; mi, kuzwa fani, Cecil DeMille anga *Milao Yelishumi*.

²⁰⁶ Cwale lu fumana kuli, mwa buka ye, yena Adina yo na ñozi. Mi ki hali, ka lizazi la ku kokotelwa, kuli Maria Magdalena, yena ya Na lelekile mioya ye sebene, a matela kwande fapila sicaba, ali, “Ki sikamañi Sa ezize? Ki sikamañi Sa ezize? Kwanda ku folisa bakuli ni kulika kulukulula baba li mwa litolongo! Ki sikamañi Sa ezize kwanda bunde? Yomuñwi ani bulelele!”

²⁰⁷ Mi muuna yomuñwi a mu bakula kubata ku mu lelekela kwabuse bwa patelo, mane, mi ali, “Kana mu ka lumela musali wa sikuba yani, fapila baprista ba hao?”

²⁰⁸ Ki fo he cwale. Mwabona? Ki sikamañi sa Na ezize? Hakuna sa na ezize. Kiñi ze ne ba Mu kokotelela? Kiñi? Kiñi? Kakuli ne ba si ka lemuha Yo nali Yena.

²⁰⁹ Yeo ki nto yeswana ni kacenu. Bakutazi, ni sicaba sa mazazi a, ni baluti ba luna ba kacenu, ba titimeza hahulu sicaba kulumela kuli Se ki “buloi, kamba diabulosi, kamba ngana ya butu, kamba buhata fela, kamba mufuta omuñwi wa makilikicani,” kufitela sicaba si sa lemuhi kuli ki ponahazo ya Linzwi la Mulimu ya lizazi le. Ki lisupo za lizazi la maungulo.

²¹⁰ Likeleke, haiba ha u wa siemba sa kopano ya bona, ba ka li, “Ah, kihande, zeo ki lika za kuikupulela fela. Bwani—bwani kona buhata. Kihande, mutalime fafasi fa mukete wa *Kuli-ni-kuli* ni wa *Kuli-ni-kuli*.” Kono mutuhele kuli nako yeñwi ba

bonise sika sa Niti kuba buhata. Uh-huh. Mutuhele kuli nako yeñwi ba bonise kuli Li fosahalile. Ha ba koni. Ha li si ka zibahala ka ku fosahala, mi ha Lina kuba cwalo, Ki Mulimu. Mwabona? Kono ba lata kusupa.

²¹¹ Ba nahana kuli, “Oh, kihande, kambe ki muuna yomuñwi yana ni libizo lelituna!” Kakuli ki sikwata nyana, sikwata nyana se si kendilwe, “Kihande, ne lu hanile mutu yani kuzwa mwa keleke ya luna.” Mwabona? “Yena, na tahanga kwa sikwata sa luna, mwabona, kono a zwelapili ku ya ni *se*, ni ku ya ni *sani*, mi cwale, mwa bona, ba yo fela. . . Kihande, mutalime seo sili sona, yo ali yena.”

²¹² Hanina taba. Ne ba ka bulela lika zeswana ka Pitrosi, Jakobo, ni Joani. “Mutu ya si ka ituta mi wa sitimbi,” ba bulela. Kono ne ba lemuhile, kuli sesiñwi ne si ezahalile kuzwa ka nako yani. Ne ba bile ni Jesu. Sani kona se ne si ezize shutano. Mwabona?

²¹³ Ne ba ezize cwalo kakuli ne ba sa zibi Yo nali Yena. Ne ba sa zibi kuli ponahazo ya Linzwi la Mulimu ne i sika yema fani mwa lizazi lani. . . Cwale, neli ka lizazi lililiñwi, mi yani neli niti; neli, ka zazi leliñwi, ku buluka fela milao ni lika zeñwi. Kono milao yeswana yeneli teni, ne ba i buluka, na ba supeza kwa nako yakuli ha Na ka taha ni kuba Muuna yo Na lukela kuba yena. Neba na ni siemba *se*, kono ne ba si ka nga siemba *sesiñwi*.

²¹⁴ Mi yani kona taba yeswana ye ba eza cwale. Bana ni keleke, mi ba “lumela ku Jesu Kreste,” ni kubulela kuli ba eza, ni lika zeñwi, kono ba latula hola ye lupila ku yona! Ba sa tisa nguli ya kale hape: mutu kamita u lumbanga Mulimu ka Sa ezize, utalima kwapili ku sa Ka eza, ni, kamba se si ka ezwa, mi ha lemuhi Sa sweli kueza, ni ku nyaziwa ka sona. Mwabona? Ba nahana kuli, “Mulimu ki yomunde. Ka Mwa bezi yomutuna! Ki sikamañi Sa Ka eza: Uka taha, mi ku be Kungelwa, zazi leliñwi, ni kuya kwa Hae,” ni kulatula lisupo luli ni ze komokisa ona fa ka nako yeo Mañolo abulela kuli Uka eza cwalo. Kumbwinja Sika sateni kaufela!

²¹⁵ “Haiba sibofu si etelela sibofu,” Jesu naize, “kaufela bona ba ka wela mwa musima.” Mulapele fela Mulimu kuli akwalule meeto a luna mwa mazazi a maungulo a. Ku lukile.

²¹⁶ Cwale, ki nto yeswana, ba eza ze swana ni kacenu. Ba latula ni ku kokotela Mulimu ya swana, kacenu, ka ku sa Mu ziba. Ka kuswana, ka ku Mu latula. Ni kueza, ka kulatula, lika ze ba eza kacenu, ha ba kokoteli Kreste hape, tenyene, kono ba nyefula Moya o Kenile. Mi ka kueza cwalo, ba cwalo. Kana ba shwaula cwani Moya o Kenile? Cwani?

²¹⁷ Ne ba U nyefula cwani kwani, kwa mulaho kwani? Kiñi, ne ba si ka U nyefula kwani; No si ka taha kale. Ne ba biza Jesu kuli, “Baalezebubi,” ba Mu biza kuli “Baalezebubi,” kakuli Na ziba likunutu za lipilu za bona, ni lika zeñwi. Se bali, “Yo ki

diabulosi.” Ka manzwi amañwi, “Ki munuhi wa litaba. Cwalo kona Mwa ezeza, ki ka kulaula ni kunuha. Ha ki sesiñwi kwanda kuba diabulosi.” Mwabona, ne ba sina mupolofita mwahala myaha ye mianda yemine, mi ne se ba hulile ku zona. Mwabona? Neba na ni fela milao ya bona. Se ba li, “Yo ki Baalezebubi.”

218 Mi Jesu ali, “Ni ka mi swalela ka zeo, kono cwale Moya o Kenile ha u so tile,” mwabona, cwale, “u sa bulela linzwi la ku U lwanisa, mi ha u na ku swalelwa.”

219 Muhupule, ikaba cwalo, mi haku konahali, ka mukwa kaufela, hakuna sishemo, ha u nyefula, ni kubiza Moya wa Mulimu, Linzwi la Mulimu le li pakilwe ka Moya . . . Mwabona, Linzwi li bulela ona *cwalo*, Moya kona o Li paka, mi U biza kuli “nto ye masila,” u silile mululwani wa sishemo ni katulo, mi haukoni kuswalelwa ka zeo.

220 Ki kabakaleo ha Ni fa mulatu lusika lo, ka mulatu, wa ku takisa, ku nyefula Mwana Mulimu ya bonahalile sina mo ne ku sepiselizwe kwa bapolofita kaufela, ni Kreste Kasibili, kuba mwa mazazi a maungulo; sina mo ne kuinezi mwa mazazi a Nuwe, mwa mazazi a Sodoma. Kunyefula! Mane, ba kokotela, kwa sicaba, Mwana Mulimu sinca, Ki Linzwi le li pakilwe. Linzwi lililiñwi la ku Li lwanisa halikoni ku swalelwa.

221 Cwale ki sikamañi so ka eza he? Ki fa ñi fo ka yema? Ba nyazizwe, ba libelela fela hola ya buhali bwa Mulimu kuli bu suluhe. Bu ka ba bubela.

222 Ba lata tuto ya ikupulezi mutu kuba ya likopano ni lituto za litumelo kufita mo ba ezeza kwa Lizwi la Mulimu le li bonahalile; lusika lwa batu lo. Oh! Ni—Ni lakaza fela kuli kambe Ni na ni nako yeñata ya se. Mwabona? Lusika lwa batu lo, lusika lo lu isinyelize sinulo ya *Mulimu*. Kono lu zamaya fo ku zamaile ba apositola. Kiniti.

“‘Mulimu,’ mu li? Kihande, babañwi ba bulela cwalo hape.” Mulimu wa Li paka.

223 Jesu naize, “Haiba—haiba misebezi haibuleli ka Na, konakuli muzwelepili fela mubulele kuli ki Na Ya bulela. Kono haiba misebezi ibulela, kihande mulumele misebezi, mwabona, kakuli ki yona hola.” Ali, “Wa ziba kamuso lizazi li ka benya, kamba bu ka sa ka malu amaswe; haiba lihalimu ki le lifubelu mi libonahala ku minahana, kamuso li ka ba hande.” Ali, “Mwakona kulemuha linako za lihalimu; kono lisupo za nako, hakuna ze mu ziba ka zona. Kambe mu zibile Mulimu, ne mu ka ziba lizazi la Ka.”

224 Mi se bali, “U ikutwa hahulu Wena; U i keza kuba Mulimu.” Mi ba Mu paheka mane fa sifapano.

225 Mi Moya o Kenile, kacenu, ha ki Mutu wa bulalu. Ki Mulimu, yena Kasibili, ya bonahalile mwa nama ya butu, ka Mali a Jesu Kreste, ku to kenisa bupilo bwa kuli Akone ku iponahaza

Iliyena ku bona. Mi ba kokotela lona Linzwi leli swana lani le li bonahalile. Mwa utwisisa? Ku kokotelwa kwa Kreste, kacenu, ki sicaba se si ka latula Mwana Mulimu mwahala sicaba, ka lika za Hae—Hae za Na bulezi kuli lika ezahala mwa lizazi le ka Linzwi la Hae. Mwabona?

²²⁶ Cwale, ponahazo yeswana, ilukela ku ba ye swana, haiba Ki Mwana Mulimu ya swana, kakuli Na bulezi ku Muñoli Joani 14:12, cwale, kuli, “Misebezi ye Ni eza mu ka ieza ni mina.” Maheberu 13:8, “Wa swana maabani, kacenu, ni kuyakuile.” “Ha muina ku Na,” Joani 15, “ha muina ku Na, mi manzwi a Ka aina ku mina, mukupe fela se mu lakaza mi si ka fiwa ku mina.” Eeni, sha!

²²⁷ Muhupule, nebali batu ba bulapeli hahulu bene ba ezize cwalo. Ne ba si ba kwande. Nebali batu ba bulapeli ba lizazi lani. Mi zeo kona ze ezahala kacenu, ki sicaba sa bulapeli; sifapano se si swana, taba yeswana kacenu. Kapili . . .

²²⁸ “Kwani ba Mu kokotela,” mi, he. Luli. Mi ba hana Linzwi la Mulimu le li bonahalile, kuamuhela lituto za litumelo za bona mwa sibaka sa Linzwi.

²²⁹ Kana sani kona se ba eza kacenu? Sani luli ki sona, kueza lika zeswana kacenu. Nali yena Linzwi; mi ba hana Linzwi. Sani kona siemba silisiñwi se Ni bata kuli mu si ke mwa si mbwinja, mwabona, Ni bata kuli mu si ke mwa mbwinja. Nali yena Linzwi, mi hane ba Mu hanile, ne ba hanile Linzwi. Mi ba si no Mu hana, mafelelezo ba Mu kokotela. Mi seo kona se ba ezize kacenu: ba hana Linzwi la Mulimu, mi ba amuhela lituto za litumelo za bona; mi ba kokotezi, patalaza, fapila kopano ya bona, musebezi wa Moya o Kenile. Mi bana ni mulatu, mi Na ba fa mulatu ka Libizo la Jesu Kreste.

²³⁰ Lilimo ze lishumi ka ze ketalizoho Ni Mu boni ha zamaya mwahala naha, mi niteni ba kumalela kwa lituto za litumelo za bona. Bana ni mulatu! Ne ba ngile Linzwi lene li ka tisa keleke, likeleke kaufela hamoho, ni kupanga tamahano yetuna mwahala Mapentekota ni babañwi kaufela; kufita kueza cwalo, ba Li hana, ni ku Li kasheza kafoo, ba Li seha, ni ku Li biza lika kaufela cwale.

²³¹ Mi cwale, ka tumelelano ya keleke, ka mulelo wa diabulosi, ba lika kutaha ni kubulela kuli, “Cwale lu ka taha, lu leke Oli.” Ba hanilwe. Mi bana ni . . . Bana ni mulatu wa ku takisa Jesu Kreste. Mu li nge ka likatulo za Mulimu, haiba ki ka manzwi a mina halina kubeleka. Mwabona?

²³² Ne ba hanile Linzwi la Mulimu le li bonahalile, ka ku amuhela lituto za litumelo za bona, mi basweli kueza zeswana ni kacenu. “Nali yena Linzwi,” Joani, Muñoli Joani 1. Maheberu 13:8 ili, “Ki ya swana maabani, kacenu, ni kuyakuile.” Cwale ba Mu takisa sinca.

233 Kana mwa ziba kuli Bibebe ibulezi kuli lwakona kueza cwalo? Ki babakai babaabela kubala hanyinyani? Kikuli muka nifa mizuzu ye lishumi ka yeketalizoho yeñwi yateni? [Kopano ili, "Amen."—Mu.] Ku lukile. Halu apuleñi cwale, fa muzuzu fela, "ku kokotela sinca." Ha lu yeni mwa Maheberu, kauhanyo ya 6, ni kubala fela hanyinyani. Maheberu ya bu 6, mi mubone haiba lu "kokotelela Mwana Mulimu sinca," mubone haiba za kona ku ezahala.

Mu li, "Hamukoni ku Mu kokotela ka nako ya bubeli."

234 Luka fumana haiba lwa kona kamba nee. Linzwi la Mulimu ki la niti. Kana ku cwalo? Ki Maheberu 6:1.

Ki fo he lusiyeni litaba za makalelo a tuto ya Krete, ha lu fiteleni ku za kupetahala; lu si ke lwa toma hape mutomo wa kubaka kwa misebezi yeshwile, ni wa tumelo ku Mulimu,

Ni wa lituto ya likolobezo, . . . ni wa ku beya mazoho, ni wa zuho ya bafu, ni wa katulo ye ka yema ko ku sa feli.

. . . ki mo lu ka ezeza, haiba Mulimu alata.

235 Mwabona, Paulusi ubata kuziba kuli lika ze fa ki za butokwa luli; likolobezo, ku be ya mazoho, zuho, Kutaha kwa bubeli. Lika ze kaufela ki za Kuyakuile. Ki za Niti luli.

236 Cwale mulemuhe:

Kakuli ha ku konahali . . .

Ha mu i bale ni na, timana iliñwi ye, Ni bata kuli mu ibale nina cwale, timana ya 4:

Kakuli ha ku konahali kuli bona ba ba kile ba bonisezwa liseli, mi ba lazwize kwa mpo ya lihalimu, mi ba abezwi kwa Moya o Kenile,

Mi ba lazwize kwa linzwi lelinde la Mulimu, ni mata a lifasi le li taha,

Bona bao ha ba kawa, kuli ba nacafazwe hape; kakuli fo ba i kokotelela Mwana Mulimu hape fa sifapano, ku mu shwaulisa ku ba bañata.

237 Cwale, kana lani ki linzwi la ka, kamba la Hae? "Mutu ya ba ni zibo yeo." Muhupule, ne ba si ka Li amuhela. Nebali balumeli ba sihalihali. "Kasamulaho lu amuhela zibo ya Linzwi la Mulimu," u li amuhela kuzwa kwa zibo, kuzwa kwa kubala ni ku Li bona, "mi ni ku Li hana, konakuli, ku wena, ha ku konahali kuli u piliswe." Kana mu balile seo cwale? Mwabona, "Mu amuhezi zibo ya Niti," fela, mu utwisise, na si ka Li amuhela.

238 Kuswana sina balumeli bani bene baile. Ki mufuta luli wa musipili. Wo, wa bulalu wo, mututo wa bulalu wo, ki mufuta fela wa yeñwi ya yona. Mutalime, mutalime kwa mulaho kwani.

Mutuhele ni mi bonise nto yeñwi cwale, fa muzuzu fela. Mu swalele ka mubulelelo woo. Mutalime.

239 Isilaele na ngile baana ba twelufu, alimuñwi mwa mushobo ni mushobo, toho ya kopano, ni kubaisa kwa mafelelezo a museto, yona naha ya sepiso, ni ku ba bonisa lika zende ze ne sa taha, zene banani. Mi ba yo kuta, inge ba bilaela, kuli, “Ne lu sa koni kueza cwalo.”

240 Kono nekuna ni bababeli kuzwa ku baba lishumi ka bababeli, Joshua ni Kalebu, bali neba talimile fa Linzwi. “Mulimu naize ki ya luna, mi lwa kona ni kufita kuli lu ihape.” Kana ku cwalo?

241 Neli sikamañi sani? Balumeli ba sihalihali. Mwabona, bona mane ne ba pepezwi mwa keleke. Nebali litho za sicaba. Nebali ma bishopu, sina kubulela cwalo, bene ba ile ko Linzwi la Mulimu ne li bonahalizwe kuba la Niti. “Ki yani naha!” Ne ba si kaba teni fateni. Ne ba sa zibi kuli iteni kwani. Kono ba taha ku to bona kuli neili teni. “Ki yani fani!” Mi Kalebu ni Joshua ba yo silela mwabuse, ni kutaha ni—ni—ni sishañat sa magilepu ni kuli bace amañwi a ona. Mi ba tatuba kwa naha yende, mi ni ku kuta ni kubulela kuli, “Ha lukoni kueza cwalo. Mwabona? Ha lukoni fela kueza cwalo.”

242 Ki se sikwata se si swana, mwa nako ya Jesu Kreste. “Muluti, lu ziba kuli Wena u muluti yazwa ku Mulimu.” Mwabona? Sihalihali! “Lu ziba kuli Wena u muluti ya zwa ku Mulimu. Hakuna mutu ya kona kueza lika Zo eza. Lu lemuha kuli Mulimu una ni kubateni kwani.” Kiñi hane ba si ka li amuhela? Kiñi ha ne ba si ka ikungela? Sihalihali! Sihalihali!

243 Ki ba fa mwa mututo wa bulalu; sisupo se si swana, ponahazo ye swana, Kreste ya swana, Moya o Kenile o swana, misebezi yeswana, Mulimu ya swana, Liñusa le li swana, mi habakoni ku Li amuhela. Bana ni ku itoboha kadi ya bona ya kopano. Ki sikamañi seo? “Ba bile ni zibo ya Niti.” Neba talimile mi ba bona kuli ki Niti luli. Habakoni ku I latula. Mitende ina ni kupaka kuli ne ba Li boni. Maswaniso, mitende, bupaki, zuho ya bafu, litaba za baalafi za bakuli, bana ni kubulela kuli ki Yena. Mi za kunuha, hakuna nahaiba iliñwi ya zona ye palile mwahala lilimo, yeñwi ni yeñwi ya zona neli fela ka swanelo, ha ba koni kubulela nto isili kakuli zani ki Mulimu fela. Kono ha ba koni ku Li amuhela.

244 Sikwata sa bakutazi sani mwa Chicago, mianda yemilalu ni babñwi ba bona, ne ba ka taha ku to kolobezwa ka Libizo la Jesu Kreste. Ba kai? Mulatu ki o mutuna hahulu. Ha ba koni kueza cwalo. Ki sikamañi sani? Bibebe ibulezi kuli, ha ba eza cwalo, ki sikamañi se ba eza? Ba ikambusa ili bona mwahala sishemo ni katulo. “Kakuli ha ku konahali kuli bona babane ba boniselizwe liseli pili,” ba tisizwe ku Li talima, “mi ba bile ni zibo ya Niti, mi ba lwazize kwa Linzwi lelinde la Mulimu, ha ba ka kuta kuzwa

ku Yona, ko ba lukela ku ncaafazwa hape, bali, ‘Kihande, cwale, Ni ka, eeni, . . .’”

245 Mina ba Presbyterian, mina ba Methodist, ni ba Baptist, ni ba Lutheran, mi ona Lika za Baana ba Pisinisi ya Evangeli ze, ba bulela kuli basweli “kukena mwahali,” ba tima Liñusa. Keleke ya hao ika eza cwalo. Ku kaba batu ka alimuñwi mwateni, luli. Kono, isiñi keleke; muna ni kuzwa mwa keleke, kuli mu Li amuhele. Mwabona? Yeo ki niti. Mutu ka buyena u lukile.

246 Kono cwale ha mu nahana kuli keleke ya Presbyterian ika amuhela Moya o Kenile, mi kaufela bona baisa mapampili abona kwani, mi, musike mwa be mu nahana cwalo. Mi munahana kuli mina ba Methodist mu ka eza cwalo? Hamuna kueza cwalo. Kana muhupula kuli mina ba Trinitarian mwa kona kuamuhela Libizo la Jesu Krete mi mu kolobezwe mañi ni mañi wa mina mwa . . . Hamuna kueza cwalo. Hamuna kueza cwalo. Kono mutu ka buyena uka taha ku to eza cwalo, yeo ki niti, mi seo kona sisupo sa Kutaha kwa Hae. Kono likeleke zani ze boni Niti, ni ku I hana mwa tutengo twa bona, “ha ku konahali.”

247 Kona kuli, bana ni mulatu wa ku kokotelwa kwa Jesu Krete. Mi Na ba fa mulatu ka Linzwi la Mulimu, kuli Mulimu u . . . “U ba fa mulatu cwani, Muzwale Branham?” Na ba fa mulatu, ka kuli Mulimu uitibahaze Iliyena mwa Linzwi la Hae, mwa mazazi a maungulo, ni ku itibahaza Iliyena ka kuzibala kuli Usali ya swana maabani, kacenu, ni kuyakuile, mi ba Li hanile kusina likute. Mi una ni mulatu wa ku takisa Jesu Krete, ka kunyefula Moya o Kenile. Yeo ki niti.

248 Lu mi isa mwa Maheberu 10, hape, mo li lu bulelela hape mwa Mañolo, ha ki kuli “ha ku konahali,” feela kono ki mbamba. Za ku kauhanya ku Mulimu, Kuyakuile. Ha ukoni kutaha fa Pila Mulimu hape, ha se u hanile Moya o Kenile ni ku U shubula.

249 Cwale, mwabona, “ba lazwise kwa Linzwi.” Mwabona, balumeli ba sihalihali!

“Oh, mu li micaha bani ne si balumeli?”

250 Ne bali balimeli, kamba balumeli baba i piza cwalo, kono hane litile kwa Linzwi. . . Ne bali Isilaele. Neba tile mwatasa mali. Neba tile mwatasa lisupo za Mushe. Neba boni lisupo zani ha li beleka.

Mulimu ali, “Ni ka mi isa kwabuse kwani.”

251 Mi ha li yo fita fa mulao wa Linzwi la sepiso ye ne na ni kutaha, ki sikamañi se ne ba bulezi? “Oh, halukoni kueza cwalo.” Mwabona?

252 Mi ki bao ba kuta, ni magilepu ni lika kaufela, ku to paka naha kuli ne li ya niti neiliteni. Linzwi la Mulimu li lukile. Mulimu naize, “Na mi fa yona.”

253 Kono likezahalo, “Mawi,” bali, “ne lu bonahala ike limpasu fela, ni mwa meto a bona. Halukoni kueza cwalo, hakuna taba kamba ki sikamañi.”

254 Lilimo nyana kwa mulaho muyaho wa kale oyemi fa ha u ba sina tabernakele, yomuñwi ataha, mi a zwela fande ni ku ni bulelela, kuli, “Billy, uka kutaza kwa misumo yemine, leliñwi la mazazi aa, ni Mañusa a cwalo ao.”

255 Se nili, “Ni ka kutazanga kwa misumo yemine, kakuli Mulimu wakona kuzusa bana ba Abrahama kuzwa kwa misumo ye.” Eni, sha. Ki Niti. Se nili, “Haiba una ni sesiñwi so kona ku nyaza ka Lona, kifo ha lu utwe.” Ni lata fela kukokoba, kono ha li wela kwa neku la kupatalaza sika, ki shutano. Eeni, sani kona se si ezashutano. Ku lukile.

256 Eehe, ka lituto za litumelo za bona ba Mu kokotela sinca. Cwale Maheberu kauhanyo ya 6, mi lu ya lu shetumuka. Mi lukona fela kubala kushetumuka ni, kushetumuka cwalo kulo fa. Luna ni nako yeñata. Ni ñozi Liñolo fa ko ku kaba, Maheberu kauhanyo yabu 6. Fela, Na sepa, kaufela yona. “Ha ku konahali kuli bona babane ba boniselizwe liseli pili, kuezwa baba abezwi kwa sanda sa Moya o Kenile . . .” Haluna nako ya kuya kwahule hahulu, kakuli Ni na ni Liñolo leliñwi le Ni bata kuli mubale fela fa nako nyana. Mulemuhe se, “Ba ikokotelela ili bona Mwana Mulimu sinca.” Ki sikamañi se ne ba ezize? Sikamañi? Ka kuba ni maikuto ateni, ni kuziba kuli Ki yona Niti, mi ni kufetuha ni ku I latula. Ne si ezize sikamañi? “Ha ku konahali . . .”

257 Kacwalo seo kona se i ezize naha ye. Sani kona se ba ezize batu ba. Kona se li ezize likeleke ze. Li hanile I hanile, mi li kokotezi Liñusa. Ba kokotezi Niti, kwa sicaba. Kana ne ba kokotezi cwani Jesu? Ba Mu swabisa, ku Mu tubula liapalo za Hae, ba Mu paheka fa sifapano ni ku Mu kokotela fahalimu fani, Muña wa Bupilo. Taba yeswana ba i ezize ni kacenu mwa lituto za bona za litumelo! Ba ezize nto yeswana. Ba tubuzi lika, ba tubuzi bu—bu bunde ni liapalo za Evangeli, ka kulika ku Li beya kusili fela, ni ku Mu paheka fa sifapahano. Oh, mawi! Kiñi?

258 “Kwani bona—kwani bona ba kokotela,” cwale linzwi la mafelelezo, “Yena,” Yena, Mutu yomunde hahulu yoo. Ki kabakalañi hane ba ezize cwalo? Ne ba si ka Mu ziba. Kiñi ze ba eza kacenu? Ha ba zibi kuli ye ki Niti. Ki—ki litumbi ku Yona. Ha ba I zibi. Leo kona libaka. Lituto za litumelo za bona ni lizo li ba keluselize kwahule ni Linzwi la Mulimu.

259 Cwale ku mina mo, ka kukwala fela cwale, muiseze hahulu kwateni muhupulo. Mwabona? Ni ziba kuli kwa cisa. Na futfulelwa, nina.

260 Kono, oh, muzwale, Linzwi le ki Bupilo haiba u ka kumalela ku Lona. Mutalime, Ha ki sika se lu bulela ka sona, se si kona kuezahala mwendi kasamulaho; Ki sika se sili ni luna kale mo mi sa ezahala cwale. Ha ki sika se sikaba teni; ki sika se siliteni

kale mane. Ha lu fi bupaki, “Lwa ziba Sa ezise; lwa ziba Sa ka eza,” kono cwale lu bulela Sa sweli kueza. Mwabona? Ye kona hola ya luna.

²⁶¹ Hakulata ha lukoni kupila ku fita kwa Kungelwa. Na kona kushwa kacenu; wakona kushwa kacenu. Ha ni zibi. Kono Ku ngelwa kwa taha. Foo—foo, zeo ha litaha, lu kabateni, musike mwa bilaela; uh-huh, kona mo ku kabelana ni ku babañwi babona kaufela mwahala masika, baba lumezi ni ku libelela. Neba zamaile mwa Liseli la lizazi la bona.

²⁶² Mi ki le fa Liseli, Jesu Krete wa swana maabani, kacenu, ni kuyakuile. Mu hane lituto za mina za litumelo ni kulumela Linzwi le. Ye kona Niti. Linzwi ki Niti. Jesu naize, “Linzwi la Ka ki Moya, Linzwi la Ka ki Bupilo.” Kana muka amuhela cwani Bupilo ha mu hana Bupilo? Kana muka nga cwani tuto ya litumelo, yeli lifu, ni Linzwi la Bupilo? Mufetuhela Linzwi la Bupilo, kunga lifu, mu ka amuhela cwani zepeli ka nako yeswana? Hamukoni kueza cwalo. “Linzwi la mutu kaufela libe lishano, tuto ifi kaufela ibe buhata.” Linzwi la Mulimu kona Niti.

²⁶³ Ni swabisa kuli mutu kaufela ani bonise, mutu kaufela . . . Mi Ni ziba kuli tepu ye iya mwahala lifasi kaufela. Mutu ufi kaufela, bishopu ufi kaufela, ya ka taha mwa sibaka mo ni balelanga, kamba fapila kopano ye, ni kusupa munwana kwa sibaka silisiñwi ko mutu kaufela akile a kolobezwa ka Libizo la “Ndate, Mwana, Moya o Kenile,” mwa Testamente ye Nca. Ni ka mi bonisa koo mutu kaufela yakile a kolobezwa . . . Ni bani bene ba kolobelizwe ka kushutana, ne ba na ni kutaha ku to kolobezwa sinca, kuli ba amuhele Moya o Kenile.

²⁶⁴ Ki sikamañi se mu ka eza ka zona? Muine kwande koo mwa lituto za litumelo za mina? Muinela kwande koo mwa lituto za mina za litumelo ni kushwa? Mu na ni mulatu! Ka mazoho a maswe, mu ngile Mulena wa Bupilo, ili Linzwi la Bupilo, mi mu Li takisize kwa sicaba.

²⁶⁵ Cwale ki sikamañi se ne ba ezize? Ne ba sa zibi. Kacenu batu ba zamaya ka ku sa ziba. Ha ba zibi kuli yeo ki Niti. Ba nahana kuli ki mufuta wa kutwano. Ha ba si ka kata mwa butungi kuli bakene mwa Moya wa sinulo. Ha ba lapeli hahulu. Ha ba bizi ku Mulimu ka tukufalelo.

²⁶⁶ Ba Li lwala fela ka bubebe, “Oh, kihande, Ni lumela kuli kuna ni Mulimu. Luli!” Diabulosi ulumela lika ze swana. Diabulosi wa li lumela hahulu kufita batu babañwi baba ipapata ku lumela. Diabulosi wa li lumela ni ku ngangama. Batu ba lilumela fela ni kuzwelapili. Kono diabulosi wa ngangama, ka kuziba kuli Katulo ya hae ya taha, mi sicaba sa lumela cwalo mi kusina ku iseza ngana kwa Katulo yetaha.

²⁶⁷ Mulatu wa ku Mu takisa! Luli! Ni fa mulatu lusika lo, ku ba fumana kuli bana ni mulatu, ka Linzwi leli swana lene li ba

fumani ni mulatu kwa simuluho. Yeo ki niti. Jesu naize, “Ki mañi ya kona ku Ni nyaza?” Nali yena Linzwi lene li ezizwe nama. Mi kacenu lona Linzwi le li swana li ezizwe nama.

268 Pitrosi na bulezi mwa kufa mulatu kwa hae, mwa Likezo. Ha lu ibaleñi fela. Pitrosi, ha boni se si ezahala, sene ba ezize, ki Moya. . . Mutalime, Pitrosi na yemela Krete, se ne baezize. Ni yemela se ieza Evangeli. Na. . . Pitrosi na ba fa mulatu ka kubulaya Muuna yani, Krete, Yanali yena Linzwi. Ni fa lusika lo ka mulatu ka kulika kubulaya Linzwi le li bonahalile mwa batu. Mutalime sa na bulezi Pitrosi. Mukalimelo wa hae o lukile hakulata no utwahalile ka muhuwo luli. Amu muteeleze mo mwa Likezo kauhanyo ya 2, ni kukala ka timana ya 22.

Mina baana ba Isilaele, mu utwe manzwi aa; Jesu wa Nazareta, ya supilwe, ki muuna ya pakilwe ki Mulimu mwahala mina ka limakazo, . . . lisupo, yeo Mulimu aezize ka yena mwahala sina . . . ba mina, sina ni mina ha mu ziba cwalo:

269 Whew! Mu nahane mo ne ba utwezi! Muteeleze ku zeo.

Mina baana ba Isilaele, mulena, mina baana ba keleke, mina baana baba kenile, mina baprisita, mina baana baba lukela kuba baana ba Mulimu, a mu utwe manzwi a; Jesu wa Nazareta na swanela ku supiwa mwahala mina . . .

270 Cwale Ni li ku mina baituti ba za bulapeli, ni ku mina sicaba. Jesu wa Nazareta, ili Moya o Kenile, Uteni mo ku Mutu wa Moya o Kenile, yanali Bupilo bone buli ku Yena. Uteni mo inza beleka mwahala sicaba, ni ku i patulula Iliyena ka lisupo ni ze komokisa Za ezize. Mi fa paheka fa mamota, ponahazo ya sayansi. Mi sicaba se si inzi mo, sene si shwile, ki se sa pila kacenu; bene ba cilwe ki kansa, baiketile kacenu; libofu, za bona kacenu; ni lihole, za zamaya kacenu. Ki Jesu wa Nazareta.

Yena, abetekwa ka mulelo o tiile wa Mulimu, ni ka kuizibela kwa hae kwapili a zibwa kwa musebezi wa Hae, mi mu mu kokotezi fa sifapano ka mazoho a baba maswe . . . mu mu bulaile:

271 Kana ki—kana ki kufa mulatu ko nji? U fa malatu kwañi? Kona Katengo ka Sanhedrin kani.

272 Mi Na kalimela, kakusasana cwana, swalisano ya likeleke. Ni fa mulatu Mapentekota. Ni fa mulatu ba Presbyterian, ba Baptist, ni kopano ifi kaufela mwa lifasi. Ka bumaswe, buitati mu ngile Linzwi la Bupilo ni ku Li kokotela fapila sicaba, ni ku Li nyefula, ni ku Li biza kuli “tumelo yefitelezi,” ili zeo Mulimu a zusize mwahala luna ku paka kuli Wa swana maabani, kacenu, ni kuyakuile. Ni fa mulatu lusika lo!

273 Mulimu u pakile Iliyena kuba ya pila. Mulimu u pakile kuli Le ki Linzwi la Hae. Ki sikamañi se munani kwanda sishañata

sa lituto za bulapeli ni lituto za litumelo! Ukona kubonisa kai Mulimu yapila? Kakuli u hanile Linzwi la Bupilo le li ka kufanto ye. Eeni, sha! Oh, ki hola yecwani mo lupila cwale. Whew! Kinto yeswana! Oh, Ni biza . . .

Pitrosi naize. . . mu mu ngile, *ka mazoho a maswe ni ku mu kokotela fa sifapahano:*

Yoo Mulimu. . . a zusize, kwa bafu, a mu lukulula ku ze sabisa za lifu: kakuli ne ku sina mwa ka tamelwa ki lona.

274 Ni ka lituto za litumelo za mina, ni tutengo twa mina, ni likopano za mina, ni mufuta wa bumulimu bwa mina, mu sa bulela. Mifuta ya mina ya bumulimu, mu latuzi mata a zuho ya Hae.

275 Kono hola ifitile, mazazi a mafelelezo ateni fa, foo Mulimu hana sepisize, ku ya ka Malaki 4, kuli Uka zuha mwa mazazi a maungulo, “mi na ka fetula lipilu za sicaba ku kutela kwa limbuyoti za makalelo ni Tumelo ya pentekota ya bashemi.” Mi hamukoni ku li latula, mi hamukoni ku li hanisa.

276 Cwale Na mi nyaza, mu na ni mulatu, na mi swabisa, ni ku mifa mulatu fapila Mulimu, kuli ka mazoho a maswe, a buitati, a likopano mu kokotezi Linzwi la Mulimu fapila sicaba. Mi Ni mi biza kuli muna ni mulatu ni kuli mulibelezi Katulo. Amen. Eeni, sha!

277 Ni biza nto yeswana yana ezize Pitrosi. Na bizize kubaka kwa lusika lwani. Ni bizeza lusika loo kwa kubaka, ku baka ku Mulimu, ni ku kutela kwa Niti ya makalelo mwa Linzwi. Amu kutele kwa Tumelo ya bashemi ba luna. Mu kutele kwa Moya o Kenile, kakuli Mulimu hakoni ku I cinca.

278 Mi Mulimu hana ize, “Lisupo ze lika latelela baba lumela,” Una ni kuina ni zona mwahala Kuyakuile kaufela. Ki Linzwi la Hae.

279 Ha mu bulela kuli, “Mu swalane mwa mazoho, kamba kuca mulalelo,” kamba nto yeñwi ye cwalo, kamba zeñwi fa tuto ya tumelo yani, kamba nto yeñwi ye cwalo; zeo mutu kaufela, cakolwa kaufela, ya sa lumeli kaufela wakona kueza cwalo. Mulikanyisi kaufela, lihule kaufela—lihule la kona kueza cwalo. Kunga mulalelo, kuba ni lika za mifuta yeo, wa kona kueza cwalo.

280 Kono Jesu naize ye kona ye kaba zibahazo, “Lisupo ze li ka ba teni,” isiñi kuli zakona *mwendi*, “li ka latelela, mwa masika kaufela, ku baba lumela! Ka Libizo la Ka ba ka leleka mioya ye maswe; ba ka bulela ka malimi asili, kubulela ka malimi asili; ni kuswala linoha; kunwa lifanu, halina ku ba tizeza kozi; kubeya mazoho a bona fa bakuli, ba ka foliswa.” “Kufolisa bakuli, kuzusa bafu, kuleleka mioya ye maswe; kakuli mu amuhezi kusina tifo, mufane fela kusina tifo.”

281 Ona mikiti tuna ya kupanga mali ye ni lika zeñwi, ni ku swalisana kwa lika za kacenu, ki kabakaleo batezi hahulu katulo. Eeni, sha! Oh, mawi!

282 Halu boneñi cwale. Eeni, sha. Luka biza kubaka, ni kufa mulatu kwa ka cwale.

283 Yona Kalvari yenca ye ki yona—yona keleke, libaka ze bizwa kuli, li kenile, tutala totu tuna, katala ka Bukatolika, katala ka Katolika, ba biza katala kabona. Ba Methodist, ba Baptist, ba Presbyterian, ba Lutheran, ba Pentekota, libaka ze kenile hahulu kufitisisa, kona Ko afumani hahulu kutabiwa kwa Hae koku butuku. Kalvari yenca! Ikai kana? Mwa libaka ze kenile, yona keleke.

284 Kana U kokotezwi kai? Kwa balisana. Mina baipi, mwa ziba hande kufita zeo! Ha ni si ka nyema, kono sesiñwi mwahali kuna sa bila. Mulimu u zibahalizwe hande mwahala mina.

285 Ki kai kwa Na tabakilwe miwayo ya Hae, kwa makupo a Hae? Ki kai kwa Na fumani kutabiwa kwa Hae? Fa Kalvari. Kana U i fumana cwani kacenu? Fa katala. I zwelela kai? Jerusalem. Ba zwa kai? Kwa kopano. Bona bene ba ipapata ku Mu lata, bani ki bona bene ba ezize cwalo. Bao kona baba eza kacenu. Kalvari ya Hae ya bubeli, ko Aa muhela kutabiwa kwa Hae kwa Linzwi, sani kona se si Mu taba. Ki Yena mañi? Ki yena Linzwi. Ki yena Linzwi. Kana ki kai Kwa tabelwa hahulu? Fa katala mwa libaka ze kenile, inge fela mo ne kuinezi linako zani.

286 Nina ni tukelo ya kufa mulatu kwa lusika loo. Nina ni tukelo ya kueza cwalo, kakuba mukutazi wa Evangeli ya Jesu Kreste, ni lisupo za Hae, ni kubonisa kuli Ki yena Mulimu. Ni na ni tukelo ya kutisa mulatu mwa lusika loo. Kakuli, kushenga ko kubuhali hahulu ku zwelela fa tutala, ko ba lwanisize mi bali, “Usike wa zwela kwande ku yo teezeza lika zani. Zani ki za diabulosi.” Ona mwa sibaka se si lukela ku Mu lata!

287 Mi ona lisupo luli za na bulezi Jesu kuli lika ezahala, “Linzwi la Mulimu li buhali kufita mukwale o lozizwe kafa ni kafa; lona Linzwi, li lemuha milelo, ya maikuto a mwa pilu.” Mi Li bizwa kuli diabulosi, kuzwelela kai? Fa katala, libaka ze kenile.

288 Oh, Mulimu, kana Ukona cwani kotalima fafasi? Fela—fela makeke, ku felile, sishemo. Hakuna se lukona kueza kwanda kuliba fela kwa katulo. Se luli kwani. Uh-huh.

289 Munahane ka zona. Kutabiwa ko ku butuku hahulu kuzwelela fa katala. Fani kona fo kuina ni Kalvari ya Hae yenca. Ba Mu kokotela, yena Linzwi, fa katala. Yeo ki niti. Kana, ne ba ka eza cwani zeo? Ka mikwa ya bona ya bulapeli. Yeo ki niti!

290 Kufiwa mushukwe kuzwa mwahala sicaba, ka basomi! Una ni kuwani ya miutwa, basomi! U tabelwa fa katala; u tiniswa kuwani ya miutwa ki basomi. Hanili Wa takiswa hape, sinca?

U tubulwa ki lituto ze ezizwe ki mutu, baluti ba likopano ba lwanisa Linzwi la Hae. Ba Li tubula, mwa maswabi, ba Li nyaza.

²⁹¹ Jesu naize, “Ba Ni lapela mbango.” Mwa *mbango*, “hakuna zende ni hanyinyani.” Ki mañi ye ba lapela? Ba lapela yena Mulimu ya swana yani. Ne ba lapela yena Mulimu ya swana yani fa sifapano sa Hae sa pili, mi neli milapelo ya mbango. Ki nto yeswana ni kacenu. Ba yaha likopano ze mwa mbango. Ba yaha mikopano bukutazi mwa mbango. Mwa mbango bana ni lituto za litumelo ze, ka kuluta batu lituto za batu, mi ni kulatula Linzwi la Mulimu. Bana ni mulatu wa ku takisa Mulena wa Bupilo, ka ku luta lituto za batu mwa sibaka sa Linzwi la Hae. “Ba Ni lapela mbango,” ba mu tubuzi, ba mu tabile, ba muapesizwe miutwa.

²⁹² Ha mu bona sani si ya mwa mukwakwa, mi babañwi ba mina likalibe ni milili yemitelele; kuli, “U siyalezi, nji cwani?” Muhupule, bao ki basomi, yeo kona miutwa ye utina. Mulimu na bulezi kuli ki kanya ya hao; u i talime ka muikumuso. Haleluya! I tine ka muikumuso, inge mo no ka tinela kuwani ya miutwa ya Mulena hao. I tine ka kuikumuda. U si ke wa swaba. Na bulezi cwalo, hakuna taba ka se ba bulela bo Jezabele kacenu. Seo ba ikangabeki ba ba yemela fa katala, bakokoteli ba Kreste, hakuna taba ka se ba bulela, itinele ka muikumuso. Mulimu na bulezi cwalo. Ikutele yona.

²⁹³ Ku apeswa mushukwe, ki basomi, miutwa. Kutabiwa kwa katala, ni lituto za litumelo.

²⁹⁴ Una ni Gologota yo munca, ko ba Mu isa: basali baba opeli ba, baba apala zekuswani, ba milili ye kukuzwi, lifateho ze pentilwe, baopela mwa likwata za baopeli sina Mangeloi, ni litalenta. Yani ki Yena Gologota wa Hae, ki macanci fela baba mapunu baba silelezwa ka mulao, inge kwa Sodoma ni Gomora.

²⁹⁵ Mubona nja ya musali izamaya mwa mukwakwa. Ka linako zeñwi hakuna neba nja ya muuna ye ka i latelela. Taba yeñwi i ezahale, kaufela zona li ka i latelela mwa mulaho. Kuna ni se si ezahalile ku yona. Mwa ziba libaka. Mutuhele . . .

²⁹⁶ Kanti basali ba kiñi ze ba tubulela liapalo, ni kuzamaya mwa mikwakwa ona cwalo? Musike mwa ni bulelela kuli ha ki nto yeswana. Ki ponahazo. Musike mwa nyaza batu. Kono ba silelezwa ka mulao wa Sodoma. Mulao wani u swanela kubulela kuli ha ku swaneli kuli ba be kwani.

²⁹⁷ Mi bakutazi fa katala baswanela kubanga ni ma pitikoti kufita kuba ni ma koti a bukutazi; bali kuyema fani mi ba li lumeleza, ni kuswaba kubulela ka ku li lwanisa, kakuli kopano ya bona ika ba lelelela kwande. Mu kokotela, kwa—kwa kopano, Linzwi la Mulimu le li bulela kuli, “Ki maswabisa kuli musali atine sapalo se si lukela kuba sa muuna.”

²⁹⁸ Na—Na nyaza nto yateni. Na—Na—Na—Na—Na—Na ba fa mulatu ka kutakisa Linzwi la Mulimu fapila sicaba. Basali

baba kutile milili, ba batina zekuswani, ni mushukwe. . . banze bayemi mwa kwaya!

²⁹⁹ Yomuñwi naize kuna, zazi leliñwi, musali yomuñwi na ni buzize, ali, “Kihande, u nahana kuli uka ifumana kai?”

³⁰⁰ Se nili, “Haiba Mulena u ni kupa kuli ni nope sikwata nyana, mwa lifasi, Ne nika—Ne nika saba.”

³⁰¹ Mi, ka temuho ya Moya, muyeme fani ni ku ba talima, ni kuyema fani ni kubona lika zecwalo zani fa mibili yabona; baba masila, baba busafa, ba mikwa yenyenyisa, ba mumuni ba sunko, kwande kwani baeza sina cwalo, ni kuyema mwa kwaya ye tina mikanjo ni kuopela mwa buino bwani, ni kutuhela sicaba ku ba bona. Ba ka li, “Kihande, haiba wa kona kueza cwalo, Nina na kona kueza.” Bupilo bwa Sikreste ki bupilo bwa kukena ni kuluka, kutokwa mulatu!

³⁰² Na ba fa mulatu, ka Libizo la Jesu Kreste, ka masila a bona ni busafa. Ba tizize Evangeli kwa maswabisa. Mi bani baba lika ku I yemela, ba bizwa “bafitelezi ba tumelo,” ba ibiza kuli, “Ki bukuba bwa kale.” Na ba fa mulatu, ka Libizo la Jesu Kreste.

³⁰³ Ki mahule fela baba mapunu fa mikwakwa, baopeli ba mwa kwaya, bazubi ba kwai, baba lata lisheha la masila, baana babalalu kamba ba bane, mi kasamulaho wa muuna wa busilezi, mi kupeto ba to opela mwa kwaya kakuli kuli ba na ni linzwi. Wena mututi ya ziyelehile, yanyandile mwa moya, u hanilwe ka mayemo a hao. U bala Bibebe yeswana yeo mutu ufi kaufela akona kubala, kono u hanile Moya wa Mulimu, kufitela Bibebe ibulela kuli uka “fiwa kwa buhata bo bu tiile, kuli ulumele buhata ni ku atulwa ka bona.” Kaniti u lumela kuli wa lukisa, mi Bibebe ibulela kuli mu ka lumela ni ku atulwa ka buhata bo buswana bo mu lumela kuba Niti.

³⁰⁴ Kabakaleo, Ni mi fa mulatu ka Linzwi la Mulimu. Mu luta sicaba mafosisa, ni ku kokotela milao ya Kreste, ya kukena ni Bupilo bo bupahami, kuli mutu yani akone ku zamaya mwa mukwakwa ni kuba mutu ya shutana.

³⁰⁵ Bakutazi ba yema mwa libapalelo la mbola, inge ba zuba kwai; lisitalalso; lika ze bolile kaufela ze ba itwaeza. Basali mwa kwaya ya bona, babatina tuputula, milili ye kutilwe, ni kuzwelapili ona cwalo, lifateho ze pentilwe, mi kipeto ba ba biza kuli, “Kezeli, mukete ni wa kuli,” ni Bibebe ya nyaza lika zani. Yani ki niti. Kuya kwa mikiti ni kuzwelapili, u sali membala wa keleke; ni kuba ni bupaki bwa hao, ni kupila ka nzila kaufela yo bata.

³⁰⁶ Musike mwa nahana kuli Ni bulela fela ba Presbyterian. Ni bulela ka mina ba Pentekota. Yeo ki niti. Nako yeñwi ne mu ziba Niti, kono ne mu hupula kuli hamuna ku I amuhela. Ne mu sa tusi mulisana wa mina. Mu—mu mulisana wa mina na sike kuba ni musebezi omutunwa ni ni ma dollar amañata hahulu cwalo ka sunda, ni keleke yende yetuna mwa kukutaza, ni kuzwelapili

ka tundamo mo ba ezeza cwalo. Haiba na ka nyaza zeo, kopano ya habo ne i ka mu lelekela fande; kona kuli una ni ku libuluka ona cwalo, una ni ku li bulela. Kabakalelo, ulekisize liswanelo za kupepwa kwa hae, bakeñisa busafa bwa palica ya lifasi, buitibali bwa Esau. Mi ki sikamañi sa ka bata? Bubeli bwa bona ba ka wela mwa musima wa katulo, mi ba nyaziwa. Na ba fa mulatu, sina mahule ba Evangeli.

³⁰⁷ Ne nili kwa kwaya, iliñwi ya libaka ze zibahala hahulu, libaka zetuna, ha ki kale hahulu, iliñwi ya litulo zetuna hahulu za Pentekota ku zeliteni. Mi Na to ipumana kuli ne ni inzi mwa sibaka sa muzwale mwa balelanga mi makwaya amane kamba a ketalizoho akopana hamoho. Mi ki ku iliñwi ya . . . zeñwi za likopano zende hahulu za Mapentekota. Mi ne ba sa zibi kuli Ne nili sibaka sa mukutazi alimuñwi mwa balelanga, kwa Oklahoma. Ne ni inzi fani, fafasi, mo ku balelanga mukutazi a si ka taha kale fa katala. Mi ha Ni to eza . . .

³⁰⁸ Nekuna ni ma Ricky kwani; ni ma Ricketta, mipende, hakuna neba alimuñwi wabona ya na bile ni milili yemitelele, mañi ni mañi wabona na kutile milili, mañi ni mañi wa bona ni mipende kwa lifateho, mañi ni mañi wa bona inza apezzi mikanjo. Mi ni mu Ricky yomunyinyani yana yemi fani, inza zamaya sina *cwana*, (mi muuna yomuñwi ku amuhela linubu), na eza inge kuli ki sibofu ni kuwani ya hae kwa toho, a zamaya cwalo u ya inza bulela litaba za bunyefuli fa kuamuhela koleko yani, ni liza ze cwalo. Kono aha yo fita fani alika kuopela pina yeli—*Mesia*, oh, mawi, mi—mi awa mama nana ni linzwi lelinde luli aopela ka bukwalu, kono nekusina lisale. Batili, ne i shwile, mwabona. Oh, mawi! Ki fo he cwale. Yani ki Gologota ya Hae ye nca.

³⁰⁹ Mu nahana sikamañi ku musizana yomunyinyani, kamba musali yomuñwi yomunyinyani mwahali mwani? Kiñi, kambe naka taha kwani, inza apezzi sina mwa na lukela kubela, ni milili ye mitelele, a si ka ipenta, ni lika ze cwalo, ne ba ka museha; ha na ka yema, mi cwale ha ne ba ka eza cwalo kwani, sikwata sa micaha sani, mwendi baba mashumi amalalu kamba mashumi amane a bona. Siemba se si ketilwe sa Pentekota, ni kueza lika ze cwalo! Mi kambe kalibe yomunyinyani yani na ka bulela sesiñwi ka zona, ne ba ka mu lelekela kuzwa mwa kwaya.

³¹⁰ Mutuhele kuli mukutazi wa Evangeli ayeme fa katala mi abulele sesiñwi ka zona, ne ba ka mu lelekela kwande a kopano. Mu kokotelela Mwana Mulimu sinca, ni ku Mu shwaulisa ku ba bañata. Evangeli ya Hae ye mu ipapata ku kutaza, mwa Mu kokotela. Ni fa mulatu lusika lo lwa ba ba hanile Kreste, ka Linzwi la Mulimu, ni ka mata a Lona a mazazi a maungulo a bupaki bwa kuli Usali ya pila. Eeni. Ba lwanisa Linzwi la Mulimu le li namile hande. Likopano za bona halikoni ku yemela Zani.

311 Likeleke zetuna ni likopano kona Kalvari ya Hae yenca. Na bulela hape. Ona, ona macanci matanya ba kacenu baba mapunu, kona baopeli babona mwa likwata za kwaya.

312 Muprisita yomutuna wa kopano ifi ni ifi ya ka huweleza sina muprisita wa lizazi lani, “Cwale taha u lu bonise makazo.” Uh-huh. Sani ne li sifapano sa makalelo.

313 Ki nto yeswana ni kacenu. Ni bile ni bona ha ba bulela kuli, “Kihande, cwale, wa zusa bafu wena, nji cwani? Kiñi ha u sa yi kwani? Una ni musali mwa mabita. Una ni mbututu mwahali mwani.”

314 Ba li ku Yena, “Lu Ku utwile ha u zusa bafu. Luna ni mabita atezi kwanu. Taha u to ba zusa.” Oh, kusa ziba ku ka pepa ku sa ziba. Mwabona? Uh-huh.

315 Likeleke zetuna, likwata zetuna, baprisita ba lizazi le, “Taha u lu bonise makazo yeo kopano yaluna haikoni kueza.”

316 Ne ni bile ni muuna, ha ki kale hahulu, yana bulezi manzwi ka za . . . kasamulaho nyana wa tukiso ya fa silimba yene Ni bile ni yona kwa Jonesboro, Arkansas, kubulela ka musali yomuñwi ya folisizwe. Mutangana yo neli wa kopano yeñwi ya keleke, mi ki ha yema kwa mulaho kwani mi ali, “Ni swabisa mutu kaufela kuli ani tiseze mi ani bonise makazo.”

317 Na yo nga dokota. Muuna na alafilwe, kwa butuku bwa kansa. Na yo nga musali yana bile mwa sipula sa mawili mwendi ka myaha ye mashumi amabeli; na folisizwe kwa kuopa mwa lingongo, na ina mwa sipula sa mawili. Na ba isa mi nali, “Cwale Ni bata masheleñi, madollar alikana wani sauzande.”

318 Ki hali, “Kihande, uh, uh, uh, uh, ha ki kwanu. Ki kwani kwa Waco, Texas, ko kuna ni nkambe ya luna.”

319 Se nili, “Ku lukile, lu ka ya fela kwateni lu yo ikungela zona.” Ali, Se nili, “U lukise lika mi lu ka ya kamuso.” Mwabona? Se nili, “Lu ka luma liñolo. . .” Na li, “Ki yo fa dokota ya ka bulela kuli sicaba se si bile ni kansa. Ki se fa fa pampili, x-ray. Ki yo fa musali yo baba yahile ni yena ba ziba hande ya na inanga mwa sipula sa mawili ka myaha ye mashumi amabeli, mi usweli wa zamaya ona fa cwale. Mi madokota, se ba bile dokota kasamulaho wa dokota kasamulaho wa dokota, kasamulaho wa dokota, ni lika kaufela, mi ki yo fa wa pila kacenu. Cwale, u bulezi kuli uka ‘fa ma dollar aeza sikiti.’ Ni bata ku a beya mwa masheleñi a bulumiwa. Na a bata.” Mwabona? Mwabona?

Ki hali, “Kihande, ki kwani kwa Waco, Texas.”

Se nili, “Lu ka ya kamuso.”

320 Ki hali, “Libelela fa muzuzu. Tuhela ni ku bulelele nto yeñwi. Ni ka nga musizana yomunyinyani. Mi ni nge kabemba ni mu sehe fa lizoho, mi kipeto u mu folise, fapila mizwale baluna. Mi ba ka ku fa masheleñi.”

Se nili, “Wena diabulosi tuwe!”

321 “Haiba ki Wena Mwana Mulimu, tuluka fa sifapano se.” “Lu bulelele ya Ku natile,” ni lisila la kwa toho ya Hae. Ba Mu nata, bali, “Cwale, haiba U mupolofita, lu bulelele mupol. . .” “Haiba U Mwana Mulimu, tuluka fa sifapano.”

322 Baeteleli ba libofu! Ba tokwa foliso ya mwa booko, mutu ya eza lika ze cwalo, kamba kubulela manzwi a cwalo. Kiniti.

323 Muhuwo wa kale, mane, “Halu Ku bone ha ueza makazo. Muluti, lu lakaza makazo ku Wena.” Kanti, zazi ni zazi, hola ni hola, ne li sweli ku ezahala ona cwalo, sina fela Mulimu mwa na ka li zamaiseza kuli li ezahale. Kono ne ba si yo. Kambe nebali cwalo, ne ba ka li biza kuli “Baalezebubi, ki diabulosi.” Mwabona? “Muluti, lu lakaza kuli kambe U ka eza mo lu Ku batela ku ezeza.” Kona cwalo. “Zamaya ko lu bata kuli Uye, eza ze lu bata.” Oh, eeni. Uh-huh. Ne ba sina swalisano ni Yena. Batili, sha. Ki kabakaleo neba na ni ku Mu zusa mwahala bona. Eeni, sha. Balika kueza nto yeswana ni kacenu. Mi ka tamaha ya likeleke, ba ka lifeleleza luli ku li peta, mwabona, kaufela bona ba zamaya hamoho. Mwa muhuwo o zibahala hande.

324 Fa lubona, hape, sibaka sa bulapeli hahulu, se sinde, baituti baba cuukile, ba nze ba biza hape, ni ku Mu lwanisa, ba biza. Baituti babande hahulu ba za bulapeli, baba lukela kuziba shutano; ona likeleke zetuna hahulu kufitisisa, ni baituti ba za bumulimu, ba Mu leleka kuzwa mwahala bona. Ha ba Li tabeli.

Mu li, “Zeo li fosahalile, Muzwale Branham.”

325 Konakuli no si yo fa kuli ubone *Masika A Supa A Likeleke*, kamba ku utwa ha kutazwa. No si yo, fani, Lusika lwa Keleke ya Laodesia ye ha ne luli ona inosi ye ne Mu kashelize kwande a keleke. Mi Na li fande, kwande, inza ngongota, kulika ku kutela mwahali. Ba Mu lelekela kwande kakuli habana tuso ni Yena. Ba Mu kokotela sinca. Amen! Kana lukona kufita kai?

326 Muhupule, mupolofita wa Linzwi la Mulimu na lu bulelezi kale, mwa Timotea wa Bubeli 3, haiba musweli kuñola. Haluna nako ya kubala fateni. Kono abulela, kuli, “Mwa mazazi a maungulo, basomi ba ka taha. Ba ka kaba bainuneki, ba ikumusi, baba lata minyaka hahulu kufita kulata Mulimu; baba seba batu ka buhata, baba sina buiswalo, baba buhali, ni baba toya batu babande, baba inuneka, baba itumbaeta, baba nani zibo hahulu; kuba ni mubonahalelo wa bumulimu, kono ba latula Mata ateni: ku ba ba cwalo musabe kwateni! Kakuli bao ki ba mikwa yeswala baba imezi, basali ba ba milili ye kutilwe,” liapalo zekuswani, lifateho ze pentilwe, “bazamaya kuzwa sibaka silisiñwi kuya ku, ni ku ba hohola ka kuhapiwa.” Yeo ki niti.

327 Ki hali, “Muzwe ku zeo, mwa lizazi la maungulo.” Ha lu utweñi mupolofita. Luzwe kwa lika zeo mwa mazazi a

maungulo. Bateni mo. Ni biza Keleke cwale. Eeni, sha. Muzwe ku zona!

³²⁸ Bana ni, bona, ba—ba baktazi ba lizazi le, balukela kuziba lika ze. Ne ba lukela kuziba Jesu mwa mazazi a Hae. Ne ba lukela kuziba. Mi cwale ba lukela kuziba cwalo, kono ha ba zibi cwalo. Kuswana fela sina baluti ba Majuda ba mazazi a Hae mo ne ba lukela ku Mu zibela ka lizazi la Hae, kona mo kuinezi kacenu, ka Linzwi la Mulimu le li pakilwe hande ka nako yani. Nali yena Linzwi, mi Na pakile kuli Nali yena Linzwi. Na pakile kuli Nali yena Linzwi la lizazi lani. Mi Mulimu u pakile kacenu kuli ki Yena Linzwi la lizazi le, Liseli la hola. Mi ne ba lukela kuziba ka nako yani, mi ba lukela kuziba zeo cwale.

³²⁹ Ne ba Mu kokotezi ka nako yani, mi ba sa Mu kokotela ni cwale. Na ba fa mulatu ka zona! Kiniti. Li sweli fela ku monyeha ku na, “Aba fa mulatu, kakuli Mulimu u ka ba lifisa zona!”

³³⁰ Majuda ba lizazi la bona. Mulimu hape, mwa mazazi fa lifasi, Jesu naize, “Jerusalem, Jerusalem, Ni ka ku babalela nako yekuma kai mwa sikwata sesituna, kono ha u lati.”

³³¹ Ka mo Mulimu a likezi, mwa mazazi a maungulo a, ku kopanya sicaba sa Hae hamoho, kono ha mu lati. Mu iketezi lituto za litumelo za mina, kacwalo he mu filwe kwa sinyeho. Kona sa na amuhezi Jerusalem; na bitezwi fafasi, a cisiwa, ha sa li yo u i congile. Mi ona cwalo kona mo ku ka bela, leliñwi la mazazi aa, kwa lika zetuna ze kaufela. Lituto za litumelo za hao zetuna ni likopano li ka shwa ni kuyunda, kono Linzwi la Mulimu likaba la Kuyakuile ni kupila kamita. Mwabona?

³³² Litombo za hae ze tungile lizwelela kwa ndu ya balikani baba ipiza cwalo. Munahane, munahane ka zona. Munahane ka zona! Mulite! Ni libelezi fa muzuzu. Baktazi, munahane fateni! Litombo za Hae ne li zwelela kai? Mwa ndu ya baba ipiza kuli balikani ba Hae. Sina mone ku inezi, kona mo ku sa inezi. Munahane ka zona! Fa Kalvari Na si ka potolohiwa ka—ka lisinyi, libangoki, kono ka baktazi bene ba ipapata ku Mu lata. Mi kacenu, fo Evangeli ha se i zibahalile hande, fo lisupo zetuna za zuho ya Hae ha li bonahalile mwahala luna, ha ki mikwakwa ya kwande kwani ye ku kama, kono ki bona baba bizwa kuli baktazi.

³³³ Bona baba lukela ku Mu lata, kona baba Mu beiya mwahali kacenu. “Haluna kuba ni Sika sani mwahala luna. Haluna kulumela kuli Muuna yo alu buse. Haluna ku li yemela. Haluna ku tamahana ka Zona, mwa munzi mo, haiba nto ye itaha ka nzila yeo. Ha ki nto isili kwanda kuba bulapeli bwa milimu. Ki diabulosi.” Kusina kuziba Linzwi la Mulimu, sibofu si etelela sibofu sesiñwi. Sina mo ne kuinezi ka nako yani, munahane, kona mo kuinezi cwale. Ona mo ne kuinezi fela ka nako yani, kona mo kuinezi ni cwale. Munahane!

334 Mata a Hae a kufolisa ni ku lukulula baana ni basali kuzwa mwa lilato la lifasi la kacenu le, kuzwa ku bo Jezabele babakona ku kuta milili yabona, ni kuipentaka kwa lifateho ni kupiza Bakreste; ni kuba ni bupilo bo bu cwalo, bazubi ba makwai, baba kona hahulu kubulela lisheha la masila. Baina fafasi ni kuba ni katengo ka babuleli, ni kuomana ni kuhohana, ni kubulela, ni ku sinyakana mabizo, ni—ni kuzwela kwande mwa mikwakwa ni kutina tuputula, ni lika kaufela ze cwalo; mi kipeto ba ipiza kuli ki Bakreste, fapila basali babañwi. Mwa hupula likande la ka la mutanga ya na ziba kuli nali mwana mulena, mukwa wa hae. Lu lukela kuba sikamañi? Baana ni basali, mi lu latula. . .

335 Baana ba bakutazi ba, tutala too koo A fumana hahulu kutabiwa kwa Hae, ba ikungezi ona mukwa wani wa kupila mwahala sicaba, ko ba Mu tabaka. Ba latula Mata a—a ku ba lukulula kuzwa ku lona, mi ba li nyatela kuba ona cwalo. Kanti, kwa shutana ni Linzwi la Mulimu, kuli musali a kute milili ya hae, kamba ku penta sifateho sa hae, kamba kutina tuputula. Ki ze shutana kwa Linzwi la Mulimu, kono ba li lumeleza, kueza Kalvari yeñwi (kuzwa kai? kuzwa mwa mikwakwa? kuzwa mwa sibaka sa manwelo a bucwala?) kuzwa kwa katala, kuzwa kwa katala.

336 Mi, hape, neli pilaelo neli ifi yeñwi? “U ikeza Iliyena kuba Mulimu.” Ba latula Bulimu bwa Hae. Balika ku Mu pazula ni kueza Balimu babalalu kamba babane ku Yena. Mi, Yena ki Mulimu; Nali Mulimu; Ukaba Mulimu kamita, wa swana maabani, kacenu, ni kuyakuile. Ha mu bulela ka Mulimu alimuñwi, ku bona, ba ku seha. “Lu lumela mwa bulalu bo bukenile.”

337 Ni lumela ku Mulimu alimuñwi ya kenile, eeni, sha, Mata a Hae a kufolisa, ku lukuluha, ni kunga sicaba se kuzwa mwa lilato la lifasi, ku ba lukulula sina mwa Na ezelize ku Maria Magdalena. Muhupule, nali Jezabele yomunyinyani yana ipentile, niyena. Nana ni mioya ye supile ku yena. Nali ya zamaya mapunu.

338 Kuswana fela sina musali wa kacenu fa mukwakwa kacenu; muye kai kaufela ko mu bata mi mutalime. Haiba ha mulumeli kuli batu ba kubamela kashandi ka musali ya inzi mapunu, mutalime mwa mukwakwa kacenu. Sina mo ne kuinezi mwa mazazi a Sodoma, kona mo ku kabelala. Mutalime kwande, haiba ha mu lumeli cwalo, muye fela kai ni kai. Mukwalule pampili, mukwalule mutende, mutalime fa limati la papazo, mu fumana sikamañi? Muhupule se ne i bulezi, “Fani bana ba bashimani ba Mulimu ha ba bona bana ba basizana ba batu kuli ki babande, ba ikungela basali.” Mutalime kwa neku la maswabisa mwa England, mutalime kwa neku la maswabisa kwanu, mutalime taba yateni kaufela, se ibile ndu ya buhule.

339 Kiñi hakuli cwalo? Kiñi Russia hane ibile ya swalisano? Bakeñisa bumaswe ni masila, ni kutokwa Mata kwa keleke ya Katolika. Mi kona libaka naha ye ha se hapilwe, swalisano ni tamahano ya likeleke, ni kuikopanya hamoho ni keleke ya Katolika. Zeo, swalisano ni Bukatolika lika kopana hamoho, mwa ziba, mi fa basweli ba lieza. Kiñi? Kakuli ba hanile Evangeli ye ba kauhanya ni kuba eza sicaba se si shutana! . . . ? . . . Kona libaka luli.

340 Mi bakutazi fa katala basweli ku itiisa ka zona, ka tikiti ya sico, ka mayemo a sicaba se si yemi ka lituto za litumelo, kuli, “Ni wa siemba sa *Kuli-ni-kuli*,” ba cincanisa tuto ni Mata a Mulimu; mu ba lukulule kuzwa mwa lusika lwa kupulumuka loo, sina Maria Magdalena.

341 Ona Mata luli akona kunga ya zamaya mapunu yani fa mukwakwa, ni ku mu eza kuli atinange litino ni kueza sina kalibe, ku muezza Mukreste, ba nyaza Mata ani, ni ku kokotela Mutu yana nani Ona, fa Kalvari.

342 Mi kacenu, yona Evangeli luli ni Moya o Kenile o ka nga baba mapunu ni ku mutinisa kuli atine sina kalibe ni kueza sina Mukreste, ba Li biza kuli “bufitelezi bwa tumelo.” Ha ba lati ku Li zwakanisa mwahala kopano yabona, ba Li lyanganisa lyanganisa mwahala bona, kakuli basali babañwi baeza ona cwalo. Ki sikamañi se ba eza? Ba Li kasheza fande, inge fela mo ne ba ezelize ka nako yani. Mi cwale ba kokotela Linzwi luli ni kubulela kuli Neli la lusika lusili. Na ba fa mulatu hape, eeni, sha, ka kuswana fela sina mo ne ba fezwi mulatu ka nako yani.

343 Sisupo sene si tisize kuli mioya yemaswe yebizwa Mpi itine liapalo. Muhupule, mutu ya tubula liapalo za hae u takani. Mwabona? Kucwani he ka musali? Mpi na yakani; na itubula liaplao. Mulimu na ngile Mata a Hae ni ku mu tinisa liapalo. Na apezi, ka munahano o iketile, aina kwa mahutu a Jesu.

344 Mutalime fa Mata ana ezize Bartimeasi wa sibofu kuli abone, mwahala lituto za litumelo za bona. Na li mwa lifasi hane kuna ni fela ku sa lumela ko kuñata sina mo kuinezi kacenu, kono ne li si ka Mu paleliswa. Na zwezipili. Na si ka keshebisa ka bona. A ba bulelela ali, “Mina mu ba ndata mina, diabulosi.” Na nyazize taba kaufela.

345 Mata ana kona kuzusa Lazaro kuzwa mwa libita, ni kufa musali wa kwa Neini mwana hae! O Mulimu! Mata ana kona kueza lika zani, ana kona kubulela ze ezahalile. “Kuna ni zepeli. . . Mbongolo, kuna ni mbongolo ye tamilwe ka makopanelo a nzila,” ni lika ze kaufela za Na bulezi kale. Yena Muuna ya na komile Mata ani, “Zwe fa alu Mutokwi. Aluna kuba ni Yena mwahala sicaba sa luna. U silafaza lituto za luna,” mi ba Mu kokotela.

346 Ki nto yeswana ni kacenu, “Moya o Kenile u zamaye kafoo,” hakuba ze ba tabela za Ona. “Wa nyaza ni kueza lika zee, ni ku

bulelela batu ba luna kuli lika ze ha lu lati kulyangana mwahala likopano za luna. Li lwanisa lituto za litumelo za luna.” Ba Mu kokotela hape. Oh, mawi!

Mulemuhe cwale halunze lu kwala. Lu lukela kukwala.

Mi, hape, ba Li biza kuli “tumelo yefitelezi.”

³⁴⁷ Mi ba Mu biza kuli “mufitelezi wa tumelo.” Se bali, “Na lyangani.” Mutu kaufela wa ziba kuli Bibebe ibulezi kuli, “Jesu nali cwalo,” Bafarisi bani ne baize, “muuna yo ki Musamaria, mi Wa pulumuka.” Cwale linzwi la *kupulumuka* li talusa sikamañi? “Kulyangana.” “Muuna yo wa lyangana. Ki sikwata sa batu baba lyangani baba Mu latelela. Ki Baalezebubi.”

³⁴⁸ Mi, hape, ba bulela nto yeswana, “Ki mufuta wa buloi. Ki kunuha ka kulaula,” ku Mu beya hape fa sifapano sa maswabi. Ki sifapano mañi? Ki maswabisa mañi? Linzwi la Hae le li pakilwe; ku Li bona bukuba, ku bulelela sicaba kuli Ki diabulosi. Kueza sika, ni kubiza . . .

³⁴⁹ Ki hali, “Ba biza misebezi ye kenile ya Mulimu kuli ‘ki moya o masila o li sebeza,’ hakuna kuswalelwa ku zona.”

³⁵⁰ Kueza maswabi a Linzwi la Hae, kulika ku Li bonahalisa ni ku Li biza kuli ki buhata kamba ki bufitelezi bwa tumelo, “Musike mwaya ku zona. Musike mwa ya mwa mikopano yani.” Uh-huh.

³⁵¹ Ki sikamañi se ba eza ka kueza cwalo? Ba nga limapo za bona za lituto za likopano. Yeo ki niti. Baluti baba lata kuzuma zuma minyaka baa, ba lifasi, baba sina bumulimu, lipulumuki za likopano, ba nga limapo za likopano ni ku kokotela Mwana Mulimu ka zona, sinca, kuzwelela kwa tutala twa bona.

³⁵² Kiñi ze ba ezeza cwalo? “Ba lata kulumbiwa ki batu,” ma digiri ao batu ba kona ku ba fa, “kufita lilato la Linzwi la Mulimu.” Na ba nyaza. Ha bakoni ku likanyisa lifasi, kakuli lina ni . . . Ha bakoni ku likanyisa Linzwi, kakuli ba ile kale ka lifasi. Ba ezize kale zeo. Lizazi la buipi le lupila ku lona! Kana se ha ki . . .

³⁵³ Kana Kalvari iliñwi haisika likana ku Mulena ka? Kiñi zo ka ezeza cwalo? Wena ya swanela ku Mu lata, mina baba ziba kuli Le ki Linzwi la Hae, mina baba kona kubala Sinulo kauhanyo ya 22, ili, “Yo kaufela ya ka zwisa Linzwi li liliñwi kamba kukeza linzwi kwateni,” kiñi ha mu eza cwalo? Kana Kalvari iliñwi ha i si ka Mu likana?

³⁵⁴ Ni yema mwa silelezo ya Hae. Ni muyemeli wa Hae, mi Ni mifa mulatu ka Linzwi la Mulimu. Mucince linzila za mina kusi cwalo mu ka ya kwa lihele. Likopano za mina li ka yunda. Ni mi fa mulatu Fapila Muatuli, kiniti, mina, ka mifuta ya mina ya bulapeli, buipi. Mi kiñi ha mu Li biza kuli . . . Kikuli Kalvari iliñwi ha i si ka likana?

355 Sina Pitrosi hana ize, “Bo ndata mina ba likopano,” Pitrosi na mi file mulatu ka . . . ali, “Ki ufi wa bashemi ba mina ya si ka eza cwalo?” Setefani naezize nto yeswana: “Ka mazoho a maswe mu kokotezi Mulena wa Bupilo.” Kana Jesu na si ka bulela kuli, Yena kasibili, “Ki mañi wa bo ndata mina ya si ka beya bapolofita bani mwa mabita? Mi mwa a kabisa kasamulaho?” Kona mo ku bezi ku mutu ya lukile mwahala masika!

356 Kona ni Na mo ni kalimelela batu ba ba ikumusa ba, baba hana Krete inge ba kwa likeleke ba kacenu baa. Mina, ba mikwa ya mina ya bumulumu, mu kokotelela Krete waka ka nako ya bubeli, ka kubulelela sicaba, kuli, “Manzwi aa ki a lizazi lisili, mi ha Ki a lizazi lee.” Na mi fa mulatu. Muna ni mulatu wa bubulai bo ne ba li wona, ka lizazi la ku kokotelwa. Mubake mi mufetuhele ku Mulimu, kamba mwa shwa.

357 Mi hape Ni li, “Fa,” likeleke, “bona,” baluti, “ba kokotela,” ka kunyefula, “Yena,” yali Linzwi. Mulimu abe ni makeke! Mutuhele ni bulele cwalo hape. Hakulata li lyangani fa tepu. “Fa,” likeleke, “bona,” baituti ba za bulapeli, “bakokotela,” ka kunyefula, “Yena,” ki Linzwi. Ki kabakaleo ha i bulela hape kuli:

Mwahala macwe asweli kupazauha ni lihalimu
le li lififi,
Mupulusi wa ka a inamisa toho ya Hae mi
ashwa,
Kono lisila le li kwaluha la bonisa nzila
Yelibha Lihalimu kwa tabo ya lizazi le lisa feli.

358 Ni bulela cwalo fa tepu ye, ni kwa sicaba se, Ni bulela se mwatasa susumezo ya Moya o Kenile nili: Ki mañi yali kwa neku la Mulena, ha tahe mwatasa Linzwi le! Mulimu kaniti uka tisa baba maswe ba, baba latula Krete, lusika lwa baha hana Krete mwa katulo, ka kunyefula, ku kokotela kwa Linzwi la Hae le li pakilwe. Ba taha kwa Katulo. Na ba fa mulatu! “Ki mañi yali kwa neku la Mulena,” ki Mushe yoo, “ha tahe kuna,” fani Siita sa Mulilo inge si lepelela fani kuba bupaki. Ki mañi yali kwa neku la Mulena, ha lwale Linzwi, ahane lituto za hae za litumelo, mi a latelele Jesu Krete ka zazi. Mi Ni ka mi katana kakusasana.

Halu inamiseñi litoho zaluna cwale kwa linzwi la tapelo.

359 O Mulena Mulimu, Mufani wa Bupilo Bobusafeli ni Mukalisi wa Linzwi le, Yana zusize hape kwa bafu Mulena Jesu, Yena ya zibahalile handende fapila—fapila lusika lwa sicaba se si sa lumeli. Se kubile nako yetelele, kakusasana cwana. Babañata bateni mo. Keleke itezi ya fufula. Batu ba yemi kwa ni kwa. Mi matepu asweli kupangiwa, kuli aye mwa lifasi kaufela, kukena mwa libaka zeshutana. Bakutazi ba ka iutwa ye mwa libaka zabona mo ba balela. Na ba lapelela, Mulena. Manzwi a awele hande nde ka butungi mwa lipilu, asehake ka butungi, kupumaka lifasi kaufela. Kuli ba bulele cwana . . .

³⁶⁰ Mukutazi yomunyinyani wa Methodist yo kwani kwa Kentucky, ataha kuna zazi leliñwi, mi ali, “Hane Ni utwa *Masika A Likeleke Zesupa* ani, Ne ni utwile ha i huwa kuli, ‘Amuzwe mwa mamota a Babilona ao,’” ali, “Na zwa mwateni ni kuikela. Ha ni zibi kwa kuya kamba sa kueza, kono Ni zwile.” Ku fuyolwe bundume bwa mucaha yani, ni musala hae, ni bana bababeli kamba babalalu.

³⁶¹ Mulimu, mi babañata ha ba fumane nzila ya bona kwa Linzwi la Mulimu, nzila fela ya Bupilo, kakuli Yena ki Linzwi. Ni lapelela mañi ni mañi, Ndate. Fokuñwi ka kubulela lika ze, ha ki ka sithuhu; ki mwa lilato, kakuli lilato la sikulula. Mi Na lapela, Mulimu, kuli sicaba si utwisise kuba ona cwalo, kuli si talusa sikuluho. Wena Yana ba sikuluzi, ni ku ba lapelela fa sifapano, wali, “Ndate, ba swalele. Bona, ki libofu, bona—bona haba utwisisi se ba eza.”

³⁶² Ni lapelela bakutazi bani kacenu baba takisa Linzwi hape, ka kunga lituto za litumelo za bona ni lituto za bulapeli, ni ku li yolisa ka Linzwi la Bupilo. Mi cwale, fapila sicaba, ba—ba hanyeza Niti ya luli yeo Mulimu apaka ka yona kuba Niti ya Hae. Lwa ba lapelela, Ndate, kuli U ba bize kwa Mulalelo wa Linyalo hape. Mi ha kutahe nako ye, mi basike kufumana buinyazo, kakuli Ni lemuhu kuli pizo ya mafelelezo ifelile kale. Nako yakona kufela cwale. Ni sepa kuli ku si kwaba cwalo.

³⁶³ Fuyola kopanao nyana yeliteñi ye mo, mianda anda yelikani ya batu baba kopani mo kakusasana cwana, zazi le ci cisa lee, le li telele, mwendi ibile lihola zepeli kamba kufitelela, sebelezo yatani, ni kuteeleza. Ha ba si kananuha mane. Ba inzi ba kuzize ni kuteeleza. Buñata bwa bona ba libelezi milalelo yabona, mi basali bali kuyema ni limbututu za bona, mi ba libelezi. Ba swalelezi kwa Linzwi kaufela.

³⁶⁴ Mulena, Ni lemuhu se si ka ezahala kuna ka Lizazi la Katulo haiba Ni lyanganisa sicaba sani. Na lemuhu, Mulena, ka kuziba ni temuho luli ye Ni kona. Kuli, Ni lika ku ba isa kwa Linzwi, ni kuba tuhela kuli bapile ka Linzwi, kuba bulelela kuli Wena u “ya swana maabani, kacenu, ni kuyakuile,” kuli Moya o Kenile omutuna ki yena Jesu Kreste, mwa mufuta fela wa Moya o Kenile, yena Muuna ya swana. No bulezi cwalo. “Fa nako nyana lifasi halina ku Ni bona; kono mina mu ka Ni bona, kakuli Ni kaba ni mina, mane mwahala mina.” Mi Ni ziba kuli yo ki Wena, Mulena. Mi lwa Ku lumela, kakuli lwa Ku bona ha ueza lika zeswana mwahala luna.

³⁶⁵ Lwa ipa ili luna kacenu, ka buiswalo, lueza cwalo mo mwa puteho ye ni fa matepu. Mulena, ka muzuzu fela woo, mi muuna kaufela ni musali, mushimani kamba musizana, yali—yali teni mo, kamba ya yemi fande, kamba ku teezeza fa tepu, mi luna ka nako ye lu be ka mayemo sakata ni kuipa ka kutala luna bañi kwa sebelezo ya Mulimu.

³⁶⁶ Zamaya mwahala sicaba, Mulena, mwa Mata, mi ufolise bakuli. Ba bulezi kuli bana ni mushimani wa sihole ya inzi fa. Tuhela kuli Moya o Kenile omutuna wani. . . Lwa ziba, u sa ina fela fa Pila Hae sina cwana, Uka eza cwalo. Haiba Wakona kufita fa silimba ni mazimumwangala, kwande mwahala linaha, ni kufolisa bakuli, “No lumile Linzwi la Hao mi La ba folisa,” Wakona kueza nto yeswana ka muzuzu woo. Na lapela, Mulimu, kuli U folise mutu kaufela ya kula, sihole kaufela, mukuli kaufela, mwahali mo ni baba utwa Manzwi aa. Mulimu, lumeleza cwalo. Tapelo yaka ki ya bona.

³⁶⁷ Ka—ka lilato la Kreste mwa pilu yaka ni maikuto a baba tokwile, Na ba tisa, Mulena, ku Wena, fa aletare ya sitabelo, koo mubili wa Mali wa Ngunyana yani u fumaneha kuba tifo ya libi za luna ni matuku, inge ainzi fani. Ni kupela sishemo kwa sicaba. Ni bata kuyema sina Mushe mwa na yemezi, mwa pakani ku bona, Mulena, ni kubulela kuli, “Mulimu, u ba utwele butuku, bona, fa nako nyana fela, ni kubafa kolo yeñwi.” Usike—usike wa eza zeo cwale, Mulena. Tuhela—tuhela kuli Evangeli i zamaye fa pata nyana.

³⁶⁸ Bona—bona ba nyazizwe, Mulena. Ni lapela kuli sishemo sa Hao sesituna ni muhau li—li fiwe ku mutu wa mafelelezo yana ni libizo la hae mwa Buka. Mi Ni ziba kuli baka eza cwalo. Ha ki butata ku lapelela Linzwi la Bumulumu, kamba kulwanisa—kamba kulwanisa. . . Linzwi la Bumulumu, Ni talusa kubulela cwalo, Mulena; lona Linzwi le li sepisizwe, lona Linzwi le li pakilwe, lona Linzwi lene li ketezi sicaba se kwa mulaho kwani kusikaba kale mutomo wa lifasi. Ha ki—ha ki nto yetata ku—ku lapela kuli U pilise be mabizo abona a mwa Buka, kakuli Ni ziba kuli Uka eza cwalo. Jesu na bulezi cwalo, “Kaufela ba Ni file Ndate baka taha.” Mi hakuna mutu yakona kutaha konji haiba u filwe cwalo.

³⁶⁹ Cwale Na lapela, Mulimu, kuli kai ni kai Manzwi awele kwateni, hamoho cwalo fa tepu ni mwahali mo, kuli Moya o Kenile uka biza mutu kaufela ya lemuhilwe kale cwale, kuzwa kwa mutomo wa lifasi fani mabizo a bona ha na beilwe mwa Buka ya Bupilo ya Ngunyana. Ha ba utwe Linzwi la Mulimu ha li bulela kacenu, mwa linzwi leli yenyinyani lani, le li sisani, Linzwi lani mwa lipilu za bona, kuli, “Ye kona Nzila, zamaya ku Yona.” Lumeleza cwalo, Ndate. Na kupa ka Libizo la Jesu.

³⁷⁰ Mi halunze lu tisa litho za luna mwa sicaba mo. Haiba mu lumela kuli ye ki Niti, mi mina—mina. . . Ni beile lizoho, ni beya lizoho la ka fa litaulo ze beilwe fa, ni libyana za bakuli ni baba zielehile. Ni bata ku mi buza puzo, ka kusepahala cwale.

³⁷¹ Hani si ka taha kwanu ku to utwiwa fela. Ni—Ni—Ni katezi. Ni botehile luli. Hani mwanana mo ne Ni belanga, mi Na—mi Na ziba kuli mazazi aluna a balilwe. Mi Ni ziba kuli Ni lukela kubeya mwateni nto yenyinyani kaufela ye Ni kona, kwa Mubuso

wa Mulimu. Ni lukela kukutaza nako kaufela ye Ni kona kuba ni kolo. Ni na ni kuya, Ni lukela kuya kamba Ni ikutwa cwalo kamba nee.

³⁷² Ni tile kwanu kakuli Ni—Ni ikutwa kueza cwalo. Ni—Ni bata kueza cwalo. Na mi lata. Mi ha Ni buleli lika ka buhali ni ka tata, ku—ku. . . kakuli Ni bata kueza cwalo. Kuna—kuna ni kunjanja mwahala ka. Yona taba ye nyakisizwe ki yona taba ye ni hapeleza kueza lika ze. Ni bulela ka bunolo, ka lilato. Hani talusi ku omanya basali ba luna kamba baana ba luna. Hani talusi kueza cwalo, muzwale, kezeli. Ni talusa fela ku mi tisa kwa—kwa sibaka se si buhali, ko mukona kubona sikuluho ni tupa ya Mulena, kuli mulukela kutaha mwateni cwale. Musike mwa zwafa; mwa libelela nako yetelele cwale.

³⁷³ Ni mina baba lakaza kutaha kwa neku la Mulena, ni kuipeya ko kutezi mwa lipilu za mina, fapila mwa sicaba cwale, kamba ibe kwa libaka ko ku kaya matepu aa; kana mina, ni litho za mina ze inami. . . Musike mwa nanula mazoho a mina haiba ha mu talusi cwalo. Cwale haiba luli mutalusa ona cwalo, mubata kutaha ku Mulena, ka bupilo bo bu kenile hahulu, kikuli hauna kunanula lizoho la hao cwale. Wena, Mulena aku fuyole. U ipa ili wena sinca ku Kreste, ka kulika kulwala kunyefuliwa. U li, “Na itakaleza kacenu kunga kunyefuliwa.”

³⁷⁴ Ni nanuzi mazoho aka mwa halimu, nina. Ni, Ni bata kunga kunyefuliwa kwa Jesu Kreste kuna. Ni tina ka tabo libizo la kubizwa “mupikuluhi ya kenile,” kaufela mo kona mutabela ku li bizeza. Ni li tina ka muikumuso, kakuli ki ka mulelo wa Mulena. Ni li tina ka muikumuso.

³⁷⁵ Kana mina kaufela ha mulati kueza zeswana? Nanula mazoho a hao, ni kubulela kuli, “Ka sishemo sa Mulimu, Ni—Ni—Ni bata. . . Nina. . .” Balutiwa ba kuta, ba hupula kuli neli likute lelituna fa kulwala kunyefuliwa kwa Libizo la Hae. Kamba, mu bata kulwala kunyefuliwa kwa muika wa Hollywood, kamba nto yeñwi ya mazimumwangala, kamba membala yomuñwi wa keleke, kamba nto yeñwi? Kamba, kikuli mubata linyefulo za Linzwi la Jesu Kreste? “Ni fe kunyefuliwa kwa Linzwi, Mulena. Ni ziba kuli Na lwezi kunyefuliwa kwa Linzwi la Mulimu. Tuhela ni li lwale, nina, Mulena.”

Mi sifapano sesi kenile se Ni ka si lwala,
Kufitela lifu li ni lukulula,
Mi ni ye kwa hae, ni yo tina mushukwe.

³⁷⁶ Ku kaba mushukwe wa bulena waluna zazi leliñwi. U sweli wa pangwiwa cwale. Mi bupilo bwa lifasi le ha se bu felile, konakuli lu ziba kuli ikaba nako yeswanela.

³⁷⁷ Cwale hakuna sibaka kwa kutisa sicaba kwa aletare. Sipula sa hao, fo uinzi, i be aletare. “Buñata bwa babane ba lumela. . .” Halunze lu lapela.

378 Ndate yakwa Lihalimu, ku bonahala kuna inge kuli lizoho kaufela la banana ni babahulu, li nanuhile, mwahala sicaba se. Mi Ni lapela kuli, nako kaufela tepu haika liziwa, batu ba nanule mazoho abona mwa halimu, ni ku kubama mwa muzuzu; bondate ni boma ba tahe hamoho ba swalane kwa mazoho, ni kubulela kuli, “Mulatiwa, lubile ma membala ba keleke nako yetelele hahulu. Ha lu tahe ku Kreste.” Lumeleza cwalo, Mulena.

379 Fuyola sicaba se kwanu. Ni lapela kuli U ba fe, Mulena, bupilo bo bu kenile. Buñata bwa bona, Mulena, ki sicaba sesinde. Ki—ki sicaba sa Hao; ha ba si ka ziba fela kale Niti. Mi Ni lapela kuli U ba bonise Niti ya Hao, Mulena. “Linzwi la Hao kona Niti.”

380 Sina ha No bulezi ku Joani, Ni sepa ki kauhanyo ya 17, No ize, “Uba kenise, Ndate, ka Niti. Linzwi la Hao kona Niti.”

381 Mi Yona hape, Linzwi la Hao, isali Niti. Kamita ki Niti, kakuli Ki Mulimu. Mi Na lapela, Mulimu, kuli U ba kenise ka Niti. Fo kikuli, keniswa, ku ba kenisa kwa lituto za litumelo kaufela ni likopano. Ba kenise kwa lika kaufela za lifasi, ba tahe kwa bupilo bo bu kenile bwa Linzwi. Lumeleza cwalo, Mulena. Ki ba Hao cwale. No sepsize kueza cwalo. Mi kakuba mutanga Hao, Ni fa tapelo yaka mwa sibaka sa bona. Ka Libizo la Jesu Kreste.

382 Cwale ni litho za luna ze inami, halu opeleñi pina ye halunze lu zwelapili kulapela.

Jesu u lifile kaufela zona,
Kaufela ku Yena . . . (Munahane fateni!)
Sibi . . .

383 Maabani Ne nili mwa—mwa sibaka, mi muuna cwana na ni pima fa suti ya ni lekezi muzwale wa mwa keleke mo. Ki hali, “Suti ya hao ne i bonahala kucisa, mi Ni ku lekezi ye bata.”

384 Mi Na yo ipumisa, mi ki hali, “Ali, liheta la hao la bulyo se li weyuka mwatasi. Ku bonahala kuli u kile wa lwala mutiyo o bukiti zazi leliñwi.”

385 Mi Na hupula kuli, “Eeni, mutiyo wa sibi. Kono Jesu a lifa kaufela.” Muteeleze halunze lu i opela.

Jesu u lifile . . . kaufela,
Mi kaufela, bupilo bwaka kaufela, ku Yena
Ni . . . (Sibi ne si ezize sikamañi?)
Sibi ne si siile sitampatampa se si fubelu:
Yena asi tapisa busweu twaa sina litwa.

386 Mulimu, u lu utwele butuku. Sina nako ye tungile ye, tuhela kuli Linzwi li nwele mwa butungi, Mulena, kwa pilu. Tuhela sicaba, ni ha ba ka liyeha ku za mulalelo wa bona . . . Kono, Mulena, Se kwateni si fitelela sico. Bo ki Bupilo. “Linzwi la Ka ki sico,” No bulezi. Mi kona Se si fepa mioyo ya luna yelapile.

387 Cwale lunge, Mulena, lu bupe. Mulena, ni lwale hamoho ni bona. Ni bata kuya ni bona. Ni ya kwa Kalvari cwale, Mulena,

ka tumelo. Ni ya ni kopano ye. Cwale aku ni bupe fela, Mulena. Ni fosize. Linako zeñata ze Ni. . .

³⁸⁸ Kwanu nako nyana yefitile Ne ni ka tuhela fela kukutaza. Sicaba ne si sa ni utwi. Ne ba zwelapili fela kueza lika zeswana, mi Na—Na filikana. Na ba ni sitombo mwa moya. O Mulimu! Lisunda nyana zefitile, ha No ni file sisupo sani kwani, isiñi. . . ni kubala Bibeles, ni kubona kuli No bulelezi Mushe, inge fela tolo yani mo ne ibezi, kuli nekuna ni lilundu, hape, mi ne kuna ni sisupo ku yena. Mi cwale kwa mafefeleso a zona, ka kuziba kuli Ne—Ne ni siile batu babañata baba kula; bulumiwa isiñi fela bwa kupolofita, kono mwa kuluta Linzwi, ni—ni ka kulapelela bakuli. Wa tuhela mutu ha wa inza shwile fafasi, mi wa mu zusa hape, ka bupaki bwa kuli ne li niti. Wena kamita u paka Linzwi la Hao.

³⁸⁹ Cwale, Mulena, Li pake ona fa ha Ni li fapila Lubona lwa Hao. Unge mañi ni mañi wa sicaba se, Mulena, zwisa lifasi ku luna. Ninge, Mulena, halunze luli fapila Kubateni kwa Hao. Inga fela lifasi, hamula lipilu za luna, Mulimu, ona fa cwale. Comola lifasi mwatani ni lipilaelo za lifasi ku luna. Ha lubeñi Bakreste baba ipeile hande, O Mulimu, baba lata ni ku ba bande, lunze lu lwezi muselo wa Moya. Nji cwani, Mulena? Lu fapila Lubona lwa Hao. Sibi si siile sitampatampa se si fubelu ku mañi ni mañi wa luna, kono Mali a Hao akona ku si takula, Mulena, ni ku si fetula kuba busweu sina litwa. Lumeleza cwalo, halunze lu libelela ku Wena. Lunge; lu ba Hao; lu ipeile bupilo bwa luna ku Wena. Ka Libizo la Jesu Krete, lumeleza cwalo, Mulena, ku mañi ni mañi wa luna.

³⁹⁰ Hmula pilu yaka, Mulena. Ni bona mafosisa a ka kaufela. Ni bona mafosisa aka. Mulimu, kuzwa ka nako ye, Ni lika kupila ka bunde mo Ni konela, kuli ni Ku tuse. Ni bata ku ya, Ni bata ku neela bupilo bwaka sinca ku Wena, mwabuse mo kakusasana cwana.

³⁹¹ Kasamulaho wa kutisa kalimelo ye ku ba—ba balikani baka ba za bulapeli kwande kwani, mi ni lukela kubulela lika ze tata, kono, Mulena, Ni li ezize ka susumezo ya Hao. Ni ikutwa kuli U ni bulelezi kueza cwalo. Cwale se li zwile fa maheta aka, Mulena. Ni—Ni tabile kuli li zwile. Ha ba eze ka lona kaufela mo ba ka ezeza, Ndate. Ni lapela kuli ba li amuhele. Ni lapela kuli U pilise mañi ni mañi, Mulena.

³⁹² Ha kutahe ancafazo ya baba lukile, ni Mata amatuna atahe mwahala Keleke I si ka ya kale. Ni. . . Ha ki nto yetata kulapela cwalo, kakuli No sepisize cwalo. Mi lu talimezi, Mulena, ka kuhoha kwa bulalu kwani ko lu ziba kuli ku ka lu ezeza lika zetuna mwahala luna.

³⁹³ Na ni wa Hao, Mulena. Ni ine fa katala fa, ka kuipa fela ka mo Ni zibela kuezeza. Zwisa lifasi ku na, Mulena. Zwisa lika ku na ze shwa; u ni fe ze sa shwi, ili Linzwi la Mulimu. Ni kone

kupila mwa Linzwi lani ka tokomelo luli, kufitela Linzwi liba ku na, mi Na mwa Linzwi. Lumeleza cwalo, Mulena. Mi Ni si ke na zwa ku Zona. Mi Ni swale Mukwale wa Mulena wani ka tokomelo, ni ku U humalela ka kutiya. Lumeleza cwalo, Mulena.

³⁹⁴ Lu fuyole hamoho. Lu batanga ba Hao, halunze luipa ili luna ku Wena kakusasana cwana, sinca, mwa lipilu za luna. Lu ba Hao, ka Libizo la Jesu Krete, kwa sebelezo.

Jesu . . .

Mulimu aku fuyole! Muzwale Neville.



KUFA MULATU LOZ63-0707M
(The Indictment)

Liñusa le ka Muzwale William Marrion Branham, neli kutalizwe lwa pili mwa Sikuwa la Sunda kakusasana, Sikulu 7, 1963, ili fa Branham Tabernacle mwa Jeffersonville, Indiana, U.S.A., iingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatisizwe ni ku hasanyiwa kiba Voice Of God Recordings.

LOZI

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitususwe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangeli ya Jesu Kreste. Buka ye hailekisiwi, kuatiswa mwa buñata, ku nepelwa fa moya wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa mashelēni ku sina tumelelano niba Voice Of God Recordings®.

Ka litaba zeñata kamba ka libuka zeñwi ze liteni, shangwe muñolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org